

1
LEGATIO
MARCHIONIS LAVARDINI
ROMAM,

Ejusquè

CUM ROMANO PONTIFICE
INNOCENTIO
UNDECIMO
DISSIDIUM.


Ubi agitur

DE JURE, ORIGINE, PRO-
GRESSU, ET ABUSU QUAR-
TERIORUM FRANCHITIARUM
SEU ASYLI, &c.

Et

Refutantur Rationes à La-
vardini Advocato productæ, in Li-
bello Gallico, cujus initium:

Si L' Auteur, &c. Anno 1688.




Anno recuperatæ Salutis

MDCLXXXVIII.



PRÆMONITIO.

Monemus, ne quisquam religioni ducat lectionem hujus libri, quamvis non præ se ferat nomen Auctoris, Typographi, Loci aut Ordinarij approbantis. Verè namquè in lucem prodit Superiorum permissu, & cum facultatibus requisitis. Oportuit tamen ea nomina taceri ob rationabilem causam.





AD LECTOREM.

Nondum calamum posueram,
 quando nova scribendi cau-
 sa se offert ex militari Mar-
 chionis Lavardini Oratoris Gallici
 Romam ingressu, quo non urbem
 tantum, sed Europam omnem no-
 vo exemplo, inusitatoquè concussit.
 Hactenus Principum Legatos, quippe
 pacis administros Mercurio similes
 vidimus; hodie Martem induerunt,
 armatosquè se ostentant, caduceo in
 gladios mutato. Erit ergo, quem
 cupido incessat causas, modumquè rei
 perdiscendi, quæ omnium oculos per-
 strinxit; & posteritas quoquè gra-
 tiam habebit, tam nova & grande

A 2

peri-

periculum minantia ingenuè narranti, nam hæc causa scribendi mihi fuit; cum enim præviderem pro partium studijs calamo pugnatum iri, ego, qui veritati unicè me addixi, nec ab alio gratiam expecto, statui arenam occupare, & candidâ, liberâq; affectibus narratione, trophæum veritati figere. Video Galliam Romanamquè collidi, maximum videlicet Regum, cum maximo Pontificum; istum innocentia tutum, illum potentia, fortunaquè suâ nixum: utri victoria cedit, incertum mortalibus, & in arcana Divinitatis repositum; nec enim semper aut potentior causa, aut melior vicit. Ego, si ex votis decideres possit, pacem utrinquè optaverim. Caterum utcunquè id cadat, narrandi, quàm augurandi peritior rem totam à suis principijs evolvam.

Video

Videō quidem jam aliorum calamis hoc argumentum libatum esse, ac praesertim nuperâ scriptione, quâ Pontificis Innocenciÿ XI. Bulla contra Lavardini Apologiam defenditur, Italico sermone, idque tam facundè, solideque, ut nihil habuerint Adversarij, quod responderent, contenti solùm silentio ac pudore cladem fateri. Prodiit quoquè alia scriptio (a) Gallico sermone, quâ Talona Regij Advocati Declamatio, injurijs plena, egregiè refutatur. Ego ne quid supersit veritati noxium, Libellum Galli cujusdam anonymi convincere aggredior, quo Lavardini Apologiam sustentat, inani consilio, si clamores excipias, Tartarorum videlicet more, quibus

A 3

stre-


(a) Titulus libelli Gallici est: *Refutation d'un libelle Italien, &c. &c.*
Anno 1688.

strepitus pro pugna est. Et tamen quia multis abundat, quæ aut lenocinio Gallici sermonis, aut specie veritatis incautos fallant, confutandum suscepi. Quod si aliquis opponat mihi, nihil mea interesse, quid Romam inter, Galliamquæ agitetur, nec meorum esse partium, hoc certamen dirimere? confestim respondebo, quod olim, inq̃ simili causa, ex silvis suis respondit Hieronymus: (a) Canes latrant pro Dominis; tu non vis me latrare pro Christo? mori possum, tacere non possum. Sed age rem ipsam aggrediamur.



DE

(a) *S. Hieron. l. 3. contra Rufin.*



DE JURE, ORIGINE, Progressu & abusu Quarterio- rum Franchitiarum seu Asyli, &c.

S U M M A R I A.

1. *Legatos Jure Gentium inviolabiles esse, nec subiacere Juri Talionis; non tamen Jure Asyli gaudere.*

2. *Infiniti ex hac Immunitate abusus Asylorum & Immunitatum (quas Franchitias & Quartierios vocant) Historia Chronologicè, fuseque exponitur, ac validissimè concluditur, hanc Immunitatem à Principum Legatis injustè usurpari, nec unquam à Summis Pontificibus toleratam esse.*

3. *Innocentij XI. contra Franchitias Edièta, & quas ob causas?*

4. *Reges omnes Innocentij Diplomati acquiescunt solâ Galliâ reluctante. Ingressus Romam Marchionis Lavardini.*

5. *Lavardinus Excommunicationem incurrisse declaratur. Pontificis moderatio.*

6. Respondetur ad Libellum Anonymi:
 & primò ostenditur, nullam Lavardino ab
 Innocentio XI. Pontifice Maximo injuri-
 am factam.

7. Nihil contra Jura Legatorum actum
 esse, cùm Pontifex Lavardinum pro Lega-
 to non habuit.

8. Romam esse communem Patriam, sed
 non ideò Lavardinum aliter à Pontifice ex-
 ceptendum fuisse.

9. Magna esse Gallorum in Ecclesiam
 Romanam merita, sed non minora Ecclesia
 Romana in Gallos.

10. Refelluntur, quæ de ignorantia Di-
 plomatis Pontificij Gallus enarrat.

11. An Lavardinus sine debita forma
 Excommunicationi subjectus fuerit?

12. An verum sit, Reges præsertim Gal-
 lia, ejusque Ministros excommunicari non
 posse?

13. Cur non ipso Pontificatûs sui initio
 Asyla, & Immunitates Legatorum Inno-
 centius deleverit?

14. An verum sit, Lavardinum verbis
 Bullæ comprehensum non esse?

15. Nihil

contra Apologistam Lavardini. 9

15. *Nihil obstare exemplum Sixti V.*

16. *An Innocentius ex voto Cardinalium Bullam ediderit?*

17. *An in causis temporalibus locus sit Excommunicationi? & quid de minis & periculis à Lavardino declamatis?*

18. *An excusari possint, quæ Romæ Lavardinus commisit?*

19. *An consultius sit Asyla Ecclesijs adimere, quàm Palatijs Legatorum?*

20. *An Pontifici Romano scandala adscribi possint à Lavardino narrata?*

21. *An Lavardinus excusari possit exemplis S. Ludovici, & Philippi Pulchri, quos sprevisse Censuras dicit?*

22. *Refellantur, quæ de sacro in Gallijs fœdere Pontifici opponuntur.*

23. *An verum sit, durius cum Lavardino actum, quàm cum aliorum Principum Legatis lese Majestatis reis?*

24. *An Pontifex debuerit abstinere Censuris, quia istarum usus sæpè noxius?*

25. *An verum sit, Cardinalium vota, qui Bullæ subscripserunt, esse subreptitia?*

26. *An Pontifex Innocentius ex Consilij*

pendeat Religiosorum ignorantium, & minorum, ut vocat, Prelatorum?

27. Refelluntur, quæ Lavardini Advocatus pro quatuor Propositionibus narrat.


28. An Bulla Pontificia Legatos non liget, quia Personam Regis representant?

29. An Prescriptio Lavardinum juvet?

30. An Pisana conventio?

31. An Pontifex Innocentius malè in Gallos animatus sit?

32. Quo animo Pontificem esse oporteat, si armis Galli experiantur?



I.

PRincipum etiam hostium Legatos immunes sanctosquè esse, nec posse injuriis violari, res certa est, ac omnium Gentium exemplis usuquè recepta; nec aliud magis omnium populorum abominatione ac probro damnatum, quàm Legatos contumeliâ affecisse. Id verò tam notum est, ut rationibus & exemplis etiam Barbarorum super-

superfedeam. (a) Sed nullibi magis ut Romæ, florente Republicâ, Legatorum immunitas valuit, adeò ut etiam seditiosis, & clandestinis consilijs imperium turbantibus parcerent, contenti eos observare, aut finibus proscribere, aut hosti, à quo missi erant, ad pœnam remittere. Unde communior Politicorum sententia est, in Legatos, etiam periculosa molientes; animadverti non posse; alioquin si nulla Legatis impunitas, quàm innoxijs, quid plus illi haberent, quàm reliquum vulgus mortalium? nec unquam ratio & prætextus Principi deesset Legatum persequendi, præsertim, quia Legatus Principem repræsentat; Unde quantacunque Legati sit culpa, Principis dignitati nocere non debet, quamdiu hic ratam non habet. Abundantque exempla maximè Romanorum, qui

A 6

nullâ

(a) *Vide Grotium de Jure Pacis & Belli. l. 2. c. 18. & L. si quis ff. de Legation. Joseph. histor. antiq. lib. 15.* (.)

nullâ delicti specie, ut Legatum punirent; permoveri poterant, juris Gentium reverentiâ. Insigne hujus rei documentum apud Livium. (a) Tarquinij Româ proscripti Legatos miserant, qui à Senatu regios thesauros repeterent; prævaluitque sententia, ut omnia redderentur; interim Legati nobilium animos pertentant, corrumpuntquè; & dies condicta, quâ Tarquinij in urbem reciperentur. Conjuratio ad Senatum delata; rei in vincula conjecti, securique percussi. *De Legatis*, inquit Livius, *parum addubitatum est, & quamquam visi sunt commisisse, ut hostium loco haberentur, jus tamen Gentium valuit.* Dion quòque in excerptis Legatorum: *Cum juvenes quidam Legati à Carthagine Romam venissent, ibique contumeliosè quædam fecissent; missi sunt Carthaginem, traditiquè Carthaginensibus, ab his verò nihil ijs nocitum.* Tertio bello Punico Consules cum exercitu in Affricam missi sunt jussique æmulam Imperij solo æquare. Romanos

cum

(a) *Liv. l. 2.*

cum classe appulfos , Legati Carthaginiensium in castris adeunt, auditoquè Senatûs mandato, plenam doloris, querelæ, indignationis, contumeliæque orationem effundunt, reverentiæ obliti, & insultantibus potiùs quàm rogantibus similes ; quibus Consul Censorinus: *Excedite castris incolumes, nam adhuc Legati estis.*

Addit Grötius, ne quidem jure Talionis violari Legatos posse: jus enim Gentium non solùm cavet dignitati Legatum mittentis, verùm etiam securitati ipsius Legati (alioquin nemo velit officio fungi, si tutus non sit) & ideò Jure Gentium, non solùm cum Principe, verùm etiam cum ejus Legato tacitè contractum, pactumque videtur ; sicque non quidem Principi fit injuria, si jure Talionis Legati malè habeantur, sed ipsis Legatis, quippe innocentibus, nec culpâ Principum obnoxijis. Non desunt quidem exempla Legati, malè accepti, habitique jure talionis, sed quod flagitium

exemplis vacuum? Planè si meliorum Principum, & Rerumpublicarum exempla consulas, Romanæ præsertim (apud quam summa cura publicæ, inviolatæquè fidei) videbis nihil in Legatos talioni licuisse. Narrat Appianus *de Bello Punico*, Romanorum Legatos malè à Carthaginensibus habitos esse, cumquè urgeretur Scipio, ut eodem jure Punici Legati, qui in castris erant, haberentur; respondisse: *Nihil quod Romanorum institutis indignum sit, fieri patiar.* Iidem Pœni à Romanis, ingenti clade acceptâ, petendæ paci consilia agitabant, sed nemo Romam ire ausus, quòd timerent, ne eodem modo eorum Legati acciperentur, quo ipsi Romanos accipissent, injectis Cònsuli Cornelio Asinæ catenis; solus Anno fiduciâ Romanæ virtutis profectus est; & cùm sermonem de finiendo bello cum utroquè Consulum sereret, eique Tribunus militum diceret, posse illi meritò evenire,

re, quod Cornelio accidisset : (a) Consules Tribuno tacere jussu : *Isto metu, inquiunt, Anno fides Civitatis nostræ te liberat.* Planè Romana fides eò Imperium provexit, quò Politicorum nostræ ætatis artificia nunquam pervenire, DEO etiam in hostibus suis virtutem amante. Eadem Venetorum Reipublicæ magnanimitas : Selimus II. Marcum Antonium Barbarum Venetorum Legatum custodiæ tradiderat; postea alium Legatum Venetias misit Cypro repetendæ, aut si Senatus abnueret, denunciando bello. Is cum paria formidaret, magnificè à Venetis responsum : *Non esse morem Reipublicæ, ut Jura Gentium in Legatis violari permetteret.*

Eadem immunitate gaudent comites & vasa Legatorum, unde in antiqua fecialium forma hæc habebantur : *Rex facis ne me tu Regium nuntium Populi Romani Quiritum, vasa, comitesque meos?*

(a) *Valerius Maxim. lib. 6. c. 6.*

meos? Frustra enim esset immunitas Legatis data, si à Comitibus, rebusquè eorum vis non abesset, sine quibus vita dignitasque Legatorum esse non potest.

Jus Asyli domibus Legatorum, pro omnibus, qui illuc confugiunt, planè juris Gentium non est, nec ullæ Leges de hac re ostendi possunt: imò juri gentium repugnat, delicta reosquè impunè ferri, maximo publicæ quietis damno. (a) Jura Gentium omnibus communia sunt, at tale non est hoc jus Asyli, nam nec Parisijs, nec in alijs quàm plurimis Aulis locum habet; idque etiam Grotius fatetur, & Wicquefort in Tractatu Gallico, quem de Jure Legatorum scripsit. Alioquin major Legatorum Palatijs, quàm ipsis Ecclesijs immunitas esset, in quibus non omnibus flagitijs Asylum patet. Aliæ quòque exceptiones sunt, quibus

(a) *Grotius de Jure Pacis & belli l. 2. c. 18. n. 8. M. de Wicquefort nell' Ambassadeur Sect. 18.*

quibus hæc Legatorum immunitas re-
stringi debet, & quas poſtea recenſebi-
mus.

II. Cæterum, ut fieri amat, hoc im-
munitatis Privilegium infinitis abuſibus
corrumpi cepit, Romæ præſertim, ubi
tot Aſylis apertis, quot Legatorum Pala-
tijs, adjectiſque inſuper ingentibus urbis
Regionibus, quæ Palatijs adjacent; tota
ferè Roma in Aſylum, aramque impieta-
tis tranſijt, nullum enim tam atrox faci-
nus, cui non ark & ſecuritas in aliquo
Legatorum Palatio, aut ſi non omnia
ſcelera Palatium caperet, non in vaſtis
areis, vicisſque Palatio confinibus. Cre-
deres revixiſſe Romulum, qui beneficio
Aſyli vacuum urbem Latronibus popu-
lavit. Romani Pontifices cum non
poſſent domi ſuæ, in ipſaque Regia, &
Metropoli Chriſtianæ Religionis exul-
tantem & impunitam impietatem ferre
ingenti fidelium ſcandalo, qui videbant
plus Romæ flagitijs licere, quàm alibi
gentium, idque ignaviam Principis
dicerent, conſonnati ſunt licentiam re-
petitis

petitis edictis coërcere, finemquè abusi-
bus ponere.

Id verò ut se habuerit ; altiùs repe-
tendum duxi, basin enim ac fundamen-
tum totius rei complectitur. Obser-
vandum igitur est, Jus Asyli antiquis-
simum esse, & quamvis primò immuni-
tas Asyli quibusdam tantùm Civitatibus,
sacrisquè locis concessa fuerit, unde in
antiquissima Judæorum Republica *Civi-
tates Refugij*, & in Atheniensi *Aram mi-
sericordie* (a) legimus; paulatim tamen,
ut fieri amat, ipsa Immunitas adeò ex-
tendi, proferriquè cæpit, ac in abusum
verti, ut ad quamlibet Cæsarum statuum
Asylum metarentur; nec perditis ho-
minibus ac ultimum supplicium meritis,
promptius remedium eludendæ Justitiæ,
quàm si Cæsaris imaginem amplecteren-
tur; hanc verò scelerati quique in sinu
gestabant, ut præstò esset, quò post
delictum confugerent. Quantum hæc
licentia processerit, eleganter Tacitus de-

ἐλέεθ βωμός. Pausan. in Attic. lib. 1.

describit. (a) *Insidebat*, inquit, *deter-
rimo cuiquè licentia impunè probra*, & *invidiam in bonos excitandi*, arreptâ *Cæ-
saris imagine*; libertiquè etiam ac servi *Patrono vel Domino cum voces, tum ma-
nus intentarent, ultro metuebantur.* Igi-
tur *Cajus Cestius Senator* differuit: *Prin-
cipes quidem instar Deorum esse, sed nequè
à Dijs nisi justas supplicum preces audiri.*
Abolitas Leges & funditus versas, ubi
in foro, in *Limine Curie* ab *Annia Ruffina*,
quam fraudis damnavisset, probra sibi
& minæ intendantur, neque ipse au-
deas jure experiri ob effigiem Impera-
toris oppositam. Credas Tacitum ho-
diernum Romanæ urbis statum de-
scripsisse, si quod ille de Principis
imagine, tu de Principis Legato di-
cas. Ex hoc more ad statuas con-
fugendi ortum proverbium: *Statuam
amplecti.* Philostratus de statua Ti-
berij: (b) *Impietatis damnatus qui-
dam*

(a) *Tacitus in Annal. l. 3.*

(b) *Philostr. l. 1.*

dam fuit, quòd servum suum verberâset, qui drachmam argenteam Tiberij imagine signatam habuisset. Sæpe à Senatu, ac Cæsaribus (a) Romæ laboratum est, ut hanc corruptelam delerent, extantque adhuc Principum Leges, hujus testes licentiæ, & edicta quòque pœnis armata. Nam primò causa illius, qui ad statuam confugerat, statim à Judicibus examinabatur, si noxium reperissent, duplici pœnâ castigabant, & quòd deliquisset, & quòd statuam profanâset scelerato amplexu, ac velut criminum protectricem. Id ex Tacito patet, aliisque locis ad marginem supra notatis. Deinde invalescente abusu, non tantùm Principum statuæ, verùm etiam ipsa Deorum templa criminosis sublata, adeoque Auctoribus Senatus Consulto decretum fuerit, totâ Graciâ novem tantùm Delubris jus Asyli permittendum esse. Quod

V. L. 1. C. de his, qui ad statuam Pr. conf. l. 8. ff. de var. & extraordi. crim. l. 28. ff. d. pœnit. &c.

Quod fi tanta cura fuit Idolórum cultoribus hoc malo urbem liberandi, quanta Pontificibus effe debuit, quibus neceffitas incumbit efficiendi, ut Roma nonfolùm innocens fit, fed etiam fancta? Diftinguam per annos, quid in hac re finguli Pontificum effecerint, ut tantò clariùs conftet, quàm recens fit abufus magis quàm privilegium, quod Gallici Oratores tanto conatu, tantâque offenfione Orbis Chriftiani fibi ufurpare contendunt.

Anno ergo *MCCCLX.* electus eft Urbanus V. quo tempore Cardinales jus Afyli ufurpabant; at Urbanus penitùs fuftulit: id ei Petrarcha his verbis gratulatur: *Audiebam te licentiam peffilentem falubri falce rigoris aequiffimi praecepsiffe, illam dico, quæ fcelestos homines graviffimis facinoribus perpetratis ad Cardinalium domos fugere folitois Legum modis, ac digno fupplicio eximebat.* Ubi adverte, Urbani tempeftate hunc abufum folis Cardinalium ædibus conclufum, Legatiffque Principum ignotum fuiſſe; néque

nequè enim istos Petrarcha sileret, & ad solos Cardinales abusum restringeret, si soli non essent.

Anno MDLII. Julius III. publico edicto omnibus Baronibus, Comitibus, Domicellis, Principum Oratoribus, Episcopis, Archiepiscopis, Cardinalibus severè prohibet, ne jus Asyli aut Franchitiarum usurpare audeant, declaratquè læsæ Majestatis reos, qui Justitiæ ministris, ne illorum Palatia, plateasquè adjacentes ingredienti, resistere audeant, ac insuper abominandum ac detestabilem abusum vocat. Ubi adverte ex hoc Julij Diplomate constare, Asylum & immunitatem localem, non fuisse eo tempore habitam, agnitamquè pro jure Regijs Legatis debito, sed pro injustissima potentiorum invasione: si enim jus aut privilegium esset Legatorum, non Comites, non Barones, non Episcopi, & Cardinales eo uterentur, & tamen æquè isti ac Regij Legati illud sibi vendicabant. Et quî posset à Julio res *abominanda & detestabilis*

bilis vocari, fi jus, aut privilegium eſſet? nec ullus aut Principum, aut Legatorum de injuria conqueſtus eſt, aut Diplomati adverſatus; quod manifeſto argumento eſt, non habuiſſe illos pro jure aut privilegio Legatis debito, alioquin fi jura & privilegia ſua violari crederent, nunquam id ferrent, aut ſaltem non ſilerent. Præſertim cùm Julius ipſo anno vulgati Diplomatis cum Henrico Galliaë Rege pacem iniviſſet; quis verò credat voluiſſe recentem pacem turbare, violatis Galliaë Legatis, eorumquè privilegijs? Illud quoquè pro Julij, aliorumquè Pontificum Diplomatiſus diligenter notandum eſt, in præſati Julij III. Pij IV. Gregorij XIII. & Sixiti V. Bullis non reperi vocem *Quarteriorum*, ſed tantùm *Franchitiarum*: Illa enim magis exprimit novellum jus Aſyli, quod à paucis annis Legati uſurpârunt, quodquè pro Legatorum arbitrio plures plateas, ædeſquè complectitur, ex quibus facilè parvam aliquam Civitatem componas.

Anno MDLXI. octo videlicet annis post Julij Diploma, aliud à Pio I V. in eandem sententiam vulgatum est, quo omnibus Cardinalibus, Oratoribus ac Magnatibus Romanae urbis prohibetur, ne Asylum aut receptaculum delinquentibus præbeant, nevé aedes suas, aut alia quaecunque loca Franchitias appellare audeant. Appellatque hunc Franchitiarum abusum rem pessimi atque perniciosi exempli, enormem & detestandam. Ubi iterum observa, fuisse hoc Asylum non à solis Principum Legatis tanquam jus aut privilegium proprium, sed passim à potentioribus, ut in rapto fieri solet, occupatum. In eodem Diplomate Pius testatur hanc ipsam immunitatem seu Franchitiam non ab ipsis Cardinalibus aut Oratoribus, utpote modestis & Justitiæ cultoribus, sed plerumque ipsorum familiarum culpâ & facto processisse. Non ergo hoc jus fuit aut privilegium (id enim primò, præcipueque Dominis competeret) sed famulantium usurpatio & violentia. Neque hîc quòque ulla Legatorum querela aut indignatio

dignatio legitur, quali injuriam parentur. Idem Pius *Anno MDLXV.* graviter contra aliquorum Cardinalium, Magnatumque licentiam in Confiftorio invectus eft, reos fuis ædibus receptantium: proteftans, id nupero Diplomati fuo adverfari, feque omiffis legibus, edictisque jam tandem ad facta & pœnas proceffurum.

Anno MDLXXIII. hoc eft duodecim annis poft Pij edictum, Gregorius XIII. Julij & Pij Edicta, pœnasque confirmat, & Franchitias non à folis *Principum Oratoribus*, fed primo loco à *Præmatibus*, & Cardinalibus, ac deinde à *Principum Oratoribus* ufurpatas effe teftatur, non ergo hoc Legatorum privilegium fuit, fed Cardinalium & Præpotentium ufurpatio, quos Legati imitati funt æmulatione auctoritatis, atque, ut fieri folet, exemplo in alios aliosque graffante.

Anno MDLXXXV. Sixtus V. fimili omninò Conftitutione Franchitias feu jus Afyli perfecutus eft, declaravitque

priorum Pontificum Bullas, pœnasquẽ inflictas non tantũ comminatorias fuisse; quique illas transgrederentur, non solũ ficto, sed vero Majestatis delicto obstrictum iri. Post Sixti Diploma usque ad Urbanum VIII. non extant aliæ de hac re Pontificum Constitutiones; nam cùm lex justa esset, & Sixtus in ijs præsertim, quæ ad Justitiam, quietemque publicam pertinent, nemini parceret, nullo plebejorum aut Magnatum discrimine; credi omninò debet Jus hoc Asyli penitus profligatum esse. Sanè Trajanus Boccalinus (a) in suis ad Tacitum Commentarijs (vixit Boccalinus sub Paulo V. quindecim circiter annos post obitum Sixti) testatur, post tempora *Gregorij XIII. quando non Cardinales tantũ, Magnatesquẽ, sed ferè nobilium quilibet jus Asyli sibi vendicabat, hunc abusum ita sublatum esse, ut Domui Dei plena securitas redderetur, & scelerati ubiquẽ ac nullã locorum exceptione*

(a) Boccalinus Commentarijs in Tacit. lib. 3. fol. 219.

ne punirentur. Ubi observa, abusum hunc Asyli ex nullo jure Legatorum provenisse; sed ex promiscua Magnatum ac nobilium licentia. Haud equidem ignora, etiam post Sixti Constitutionem hujus mali scintillas aliquas micuisse reis in Magnatum Palatijs impunitatem quærentibus; sed non ideò securi erant, quippe Ministri Justitiæ omnes vias, areasquè Legatorum Palatijs contiguas percurrerant, nullo obistere & repugnare auso; Idque ex publicis monumentis & tabularijs constat, in quibus quàm plurima hujus rei exempla occurrunt.

Anno MDCXXVI. Cùm iterum aliquæ hujus abusûs reliquiæ gliscere inciperent, Urbanus VIII. Julij, aliorumquè Pontificum constitutiones renovat, additâ etiam pro qualitate delicti poenâ mortis, in omnes, quoquoque Justitiæ effugiendæ causâ in Baronum, Cardinalium, aut Legatorum ædes se reciperent, eorumquè nomen invocarent. Repetitum fuit hoc edictum Urbani à Romanæ

urbis Gubernatore Racagna anno 1634. Pontifice id ipsum per Chirographum urgente.

Anno MDCXLIII. sub eodem Urbano ingenti diffidio inter Hispanicum Oratorem Marchionem (a) de los Velos, & Lamecensem (b) Episcopum Lusitaniæ Legatum exorto, totâ nocte Hispanici, Galliciquè Oratoris (ad quem se Episcopus receperat) Palatia militaribus manipulis, excubijsque observata sunt. Imò Hispanico Oratore ad ædes Cardinalis Albernozj deveccto consultandi causâ, alia militum Centuria, custodiendo Palatio Cardinalis à Pontifice missa: nec tamen ulli Legatorum in mentem venit, quamvis Palatia sua militaribus custodijs obsepta viderent, ut de violata Legatorum immunitate conqueri auderent.

Anno MDCXLIX. Innocentio X. Pontifice, cùm duo (c) sicarij per hortos

(a) *Marchese de los Velos.*

(b) *Monfig. Vescovo di Lamego.*

(c) *Balli de Valences.*

tos Quirinales totidem nobiles Neapolitanos interemissent, peractoque homicidio Oratoris Gallici Palatio se abdidissent; immissi continuo cum militum Centuria satellites, ingressique Palatium sicarios ad supplicium eduxere, Gallico Legato ne verbo quidem auso repugnare. Denique non tantum ex quam plurimis exemplis, actisque & Protocollis, ac Tabulariis publicis; sed etiam totius Romæ testimonio certum, notoriumque est, sub Urbani & Innocentij longis Pontificatibus liberum fuisse Justitiæ cursum, nulloque immunitatis aut Asyli prætextu impeditum; imò sub ipsius Alexandri VII. initiis, quid hæc Legatorum immunitas & Asylum, seu Franchitiæ essent, Romæ ignoratum est.

Anno MDCLV. Sueciæ Regina in-
genti magnificentiâ Romæ excepta, ac
omnibus regiis honoribus culta cùm Pa-
latium Farnesium, quo postea Galliæ Le-
gati usi sunt, ad habitandum delegisset;
nunquam de hoc Asylo aut immunitate
postulanda cogitavit, quamvis Regina
B 3 esset,

esset, nec etiam *anno 1659.* quando Romam reversa est. Licet postea *anno 1668.* tertio Romam delata, cum videret hanc immunitatem à Legatis prætendi, ipsa quoque eodem jure frui voluerit.

Anno MDCLXIV. Conventio Pisana inter Pontificem Maximum Alexandrum VII. & Regem Christianissimum Ludovicum XIV. inita est, litesq; utrinque compositæ, quæ ob violatam (a) Ducis Crequij Gallici Legati personam insolentiâ Corsicæ militiæ magna Italiæ mala minabantur, & quamvis ea conventio non admodum læta fuerit Apostolicæ Sedi, in ea tamen maximè, clarequè eluxit, quantum Galliæ Legati ab ea immunitate, ac jure seu privilegio Asyli abfuerint, quod modò minaciter, impenseque postulatur. Cum enim Galliæ Legatus injuriam à Corsis acceptam vehementer amplificaret, eamq; reparari enixissimè petèret, inter alios pacis articulos, à Principe Matthia fratre magni Etruriæ Ducis Romam transmissos, is etiam

(a) *Duca di Crequi.*

etiam fuit: Ut ad majorem Gallici Legati fecuritatem, non ampliùs Apparitoribus feu satellitibus, militibusquè licentia permitteretur Farnesiam plateam (in qua Legatiædes) obeundi. Ad quem articulum (uti ex Tabularijs & documentis Statûs secretariæ conftat) nomine Pontificis responfum eft: Non poffe in hanc conditionem nullâ ratione consentiri; curaturum tamen Pontificem tam Gallico Legato quàm ejus palatio, familiequè eam obfervantiâ, cultumquè exhiberi, quem in alijs Principum aulis mos fit Legatis præftari. In quem locum Auctor Hiftoriæ fuper hoc argumentò Typis vulgatæ hunc Commentarium fcripfit: Platea, aræque Farnesie immunitatem, quod attinet, non potuit illa à Pontifice cedi; quid enim id aliud efferet, quàm Pontificem Dominium ac Jurisdictionem abdicare, & illius Urbis partis & quàm plurium locorum, quæ ab alijs Legatis Romæ obtinentur, quasquè exemplo Gallici Legati æquè exemptas, immunesquè ac Pontifici ab-

tractas omnes Legati velint? (a) Hæc Responsio tam æqua visa est Galliæ Legato, ut postulatis abfisteret, contentus in colloquio de hac re habito cum Raspono Alexandri Plenipotentiariorum: Ut deinceps curaret Pontifex debitam venerationem Galliæ Legatis exhiberi, idquæ ut fieret, eas cautelas adhiberet, quæ alijs Legatis ac præsertim Nuntijs Apostolicis adhiberi solent. Et in articulo 9. Pisanæ Compositionis inter Rasponum & Bourlemontium Pontificium, Regiumquæ Plenipotentiariorum nullâ Franchitiarum Asylyvè mentione, ita demùm conventum est: (b) Serio enixequæ Pontifex Maximus Ministris suis imperabit, ut Galliæ Legatos eâ veneratione ac honore prosequantur, quæ illis debetur, qui tanti Regis, Ecclesiæq³ Primogeniti, tamquæ à Summo Pontifice amati, cultiquæ personam sustinent.

Aliquot menses post Pisanam Con-
ven-

(a) *Monfig. Rasponi Anno 1663. die 3. Junij. (b) Monfig. Rasponi M. Bourlemont Anno 1664.*

ventionem Dux Crequius Romam repetiit, nihilquè ab eo tentatum (brevis videlicet tempore, quo Romæ hæsit) ut videri posset immunitatem, Afylumquè prætere tam ardentè ab illo priùs expetitur, tamquè ab Alexandro conftanter negatum. Patet ergo ex his omnibus, quæ in Pifana Conventione ac etiam poft illam contingere, nunquam jus Afyli & Franchitiarum ad principum Legatos pertinuiſſe; nec enim Gallus inter alias conditiones Pontifici propoſitas hoc jus peteret, ſi jam haberet. Ille quoque loquendi modus, quo Crequius uſus eſt, videlicet: *Ut deinceps ad majorem Legatorum ſecuritatem non ampliùs permittantur Miniſtri juſtitia Farnefiam plateam percurrere.* His, inquam, verbis apertè Gallus confitetur novi aliquid à ſe peti, & hætenus Legatis inconceſſum. Ipſe quoque Pontifex Alexander, quamvis neceſſitate adactus duriffimis conditionibus annuiſſet, nec tamen induci potuerit, ut Afylo conſentiret, omninò palàm fecit, hoc jus ad Legatos

non pertinere; quî enim Gallis negaret debita & necessaria, qui pejorum metu tam multa concesserat indebita, nec necessaria? sed & Crequius Galliæ Legatus, quando nullam ampliùs Asyli mentionem fecit, acquievitque neganti Pontifici, ac dum Romam reversus est, nullam ampliùs hujus privilegij curam aut desiderium præ se tulit, planè ostendit, illud Legatis non deberi; alioquin si deberetur, nunquam ferret se illo privari, præsertim Rege jam armato, & Pontifice belli avertendi causâ in omnia prono. Crequio Duci Legatione Gallicâ abeunti Dux (a) Chaulnes successit. Hic equidem aliqua molitus est, quibus hoc jus Asyli vèndicare videbatur, sed Pontifice non solùm invito & repugnante, verùm etiam liberrimè omniq; loco ac etiam in vicinia Palatij Farnesij (ubi Chaulnes morabatur) Justitiam, ut postea dicetur, administrante.

Anno MDCLXVII. Clemens IX. Pontificatum adeptus est. Hic mitissimis

(a) *Duca di Chaulnes.*

mis licet moribus, ac in Galliam præsertim indulgentissimis, nunquam tamen passus est à Principum Legatis Asylum aut Franchitias occupari, idque Romæ notorium est: constatq; ex Tabulariis & Protocollis eo tempore scriptis, in Caupona ad Gallum Farnesio palatio vicina (quam Galliæ Legatus de Chaulnes incolebat) in delinquentes animadversum esse. Non ergo sub Clementis IX. Pontificatu hoc jure Asyli & immunitatum Legati gaudebant.

Anno MDCLXX. Clemens X. in Pontificem delectus est, & hoc præsertim tempore abusus Franchitiarum apud Legatos invaluit. Hi enim non contenti hanc immunitatem & Asylum sibi arrogare, eo quoque omnes domesticos, Familiares, Opificesquè potiri volebant, quotquot Legatorum insignia, quamvis ab istorum palatiis remotissimi ædibus suis præferrent. Deinde non tantùm cum Romam primùm inveharentur, sed toto tempore, quo illic morabantur, haud permissum Telonariis accedere,

suoque officio fungi, magno Domestico-
rum lucro, sed ingenti Cameræ Aposto-
licæ damno: & quamvis Pontifex, man-
suetudinis Sacerdotalis memor, vi pœ-
nisquè abstineret, semper tamen & Ro-
mæ, & in Principum aulis contra hos
abusus declamatum est, adeò, ut null⁹ le-
gitimæ possessioni aut præscriptioni lo-
cus esse potuerit, quippe invito semper
Domino, & juri, dominioquè suo nun-
quam cedente; non ergo hæc præscri-
ptio dici potuit, sed usurpatio, quæ nun-
quam legitimum titulum parit, alioquin
& latrocinia defendi possent, & quid-
quid vi aut potentiâ à debilibus extor-
quetur. Crediderim ego, his Legato-
rum conatibus ansam dedisse simultates,
quas cum Cardinali Alterio exercebant
ob novum edictum, quo Legati vectiga-
libus subdebantur; resque eò processit,
ut obductâ catenâ tormentis pulvere,
plumboquè oneratis, auctisque militum
excubiis Portæ Quirinales observaren-
tur.

Hæc,

Hâc, inquam, occasione crediderim, Gallum, Hispanum, Venetum, Cæſareumq; Legatôs (qui in communi cauſa velut ex condicô, unitimq; agebant) de uſurpandis, proferendisquè Aſylis cogitâſſe. En Æram, annumq; natalitium iſtius tam recentis abuſus, & quem tamen Lavardinus tam vetuſtum deprædicat, ut ſaltem antiquitate venerabilem reddat. Quanquam ne illo quidem anno dici poteſt fuiſſe natus, cùm, ut ſuprà monui, nec poſſeſſio, nec præſcriptio naſcatur, quando & quoties Dominus reclamât.

In hoc rerum ſtatu Anno videlicet *MDCLXXVI.* Pontificatum inijt Innocentius IX. Prima hujus Pontificis cura illa fuit, ut corruptelas Aſyli proſtigaret, utque tanto malo ſuaviùs mederetur, minori què dolore, non cum Legatis, ſed cum Principibus, qui illos miſerant, res peragi cœpta. Iſtis, quàm ingentia, & quàm multa eſſent mala, quæ ex hujusmodi immunitatibus provenirent, efficaciter demonſtratum, ac præſertim

Christianissimo Regi per Varesium (a) Pontificis Nuntium. Hic enim, ut ex epistolis liquet, quas Romam de hoc argumento dedit, sæpè multumquè cum Pompona, ipsoq; Rege locutus est, evicitquè validissimis rationibus, ut sæpè per Pomponam pollicitus Rex fuerit, se in hac causa non minùs Pontifici, quàm alios Reges gratificaturum, nec inter istos se ultimum fore. Idemq; postea Varesio Nuntio Rex ipse repetiit. Regius quoq; Confessarius Pater la Chaise Varesij rationibus se victum professus est, addiditquè, Patrem Olivam Societatis Generalem, cùm sibi de hoc argumento scripsisset, falsum esse: *Recordari se, hunc Immunitatis abusum à paucis annis cepisse.* Hæc Regij Confessarij tam ingenua contestatio tantò pluris esse debuit, quantum ab eo profecta, qui Principis conscientiam moderabatur, & cujus partes erant non monere tantùm, sed etiam vetare, quidquid animam Principis perdere posset. Quis jam non crederet,

(a) *Monfig. Varesi Sig. de Pompona.*

deret, fecurum effe Pontificem tot Regiis promiffis? & tamen mutavit aula; re-
fcripfitque Varesius, propofuiffe Regem
Immunitatem tueri, & hanc inter jura
reponere Galliæ debita, longifquè retrò
annis poffeffa. Creditur hanc mutatio-
nem Româ ab Eftreo Duce proveniffe,
cui non pauca emolumenta à delinquen-
tium patrocinio.

Evenit intereà, Apparitorem, quî
ex loco haud procul Româ redierat, in
platea Farnesia ab Eftreo Legato detine-
ri. Id caufam Pontifici dedit, regias
aures iterùm pulfandi, edicendique Car-
dinali Rospiglioso, qui pro Eftreo po-
ftulabat: *Se quidem metu pejorum conni-
vere, nunquam tamen Legatos deinceps
admiſſurum, niſi injuſtiſſimo hac Immuni-
tatum jure decederent.* Effecitque ut
dixerat, Barbaro Venetâ legatione abe-
undi Zenus fuſceſſerat, & Apparitores
Juſtitiaæ ab ejuſdem Legati familiaribus
malè accepti fuerant, cùm propè S. Mar-
ci palatium obſervati eſſent; continuo
edictum pependit, quo percuſſores mor-
tis

tis damnabantur , & spes omnis Legato adempta visendi Pontificem , sicque Româ abscessit , deletumquè ejus loci Asylum , nec alius à Republica suffectus Legati dignitate.

Anno MDCLXXVII. Edictum Romæ vulgatum , quo ijs vita & bona adempta , quippe læsæ Majestatis reis , qui ad hujusmodi Asyla perfugerent. Id postea edictum *Anno 1680.* repetitum est , sed multò quàm ante severius.

Anno MDCLXXIX. Cum Romæ innotuisset Legatum Parisiis venturum ; per Abbatem Laurum (nam Legatus Varesius jam mortem obierat) Regiis Ministris Pomponæ videlicet Colbertoquè ærarii Præfecto , ac postea ejus fratri Colberto Crosii Secretario Statûs nomine Pontificis insinuatum est , nunquam ab hoc Legatum admissum iri , qui non priùs Asylo ac immunitatibus cederet injustè occupatis ; additæque à Lauro invitæ rationes , sed nihil in aula promotum.

Anno MDCLXXX. Dux Radzivilius , quanquam Polonici Regni præcipuus,

puus , Regiusquè Cognatus ac Legatus
extraordinarius, & eo comitatu inuestus,
quo principem decebat tot partibus in-
signem, non tantùm Asylo cessit, eoquè
nunquam ex Regis sui imperio uti voluit;
verùm etiam res & impedimenta visita-
ri à publicanis permisit, nullo tamen aut
suo aut Regis dedecore; quis enim dede-
cus dicat, aliena non rapere, & sacrilegio
abstinere?

Anno MDCLXXXIII. disceden-
te Carpio (a) Marchione ad ineundam
Neapolitani Regni Præfecturam , mox
vicum plateamq; Hispanicam & Palatij
viciniam satellites percursârunt, nec ces-
satum novo Hispaniæ Legato Marchio-
ne Cocogliudo : nam non priùs hunc
Pontifex pro Legato agnovit, quàm pro-
fessus esset, se ex Regis sui imperio Asylo
cessurum.

Anno MDCLXXXVI. Romam ad-
venit Comes de Castelmaine extraordi-
narius Angliæ Regis Legatus , nec alia
optatior

(a) *Marchese del Carpio.*

optatior Legatio, aut majori gaudio Pontificis animum impletura; nam à centum retrò annis nullus ex Brittannia Legatus, quippe & rebelli, & persecutrice Pontificis. Jam Rex ipse Romanis genibus advolvebatur, quid posset gratius evenire Pontifici? & tamen maluit hoc etiam gaudio fraudari, quàm aliquid committere indignum Pontificis Majestate ac Justitiæ adversum. Indictum ergo Angliæ Legato, nisi Asylo renuntiaret, recipi à Romano Pontifice non posse. Renuntiavit Legatus, ac etiam res suas observari à publicanis permisit, nullo Regis dedecore, quippe spontè & justa cedentis, cùm nihil aliud à pontifice peteretur, quàm ut Regij Legati Romæ eodem jure, quo in aliis principum aulis haberentur. Planè hac in causa non potuit major esse aut Religio Anglici Regis, aut constantia & rectitudo Romani pontificis. Quid enim Anglus petere non poterat in præmium reductæ Religionis jam centum & ultrà annos Angliâ proscriptæ? aut quid majus ve-

reri

rerì Pontifex, quàm eum offendì, è cujus manu , arbitrioq; Religio pendeat? & tamen neque istum tam grandis metus, neque illum tam grande meritum ad dexteram, sinistramvè permovìt. Omnino fateri oportet fuisse hanc actionem magno Rege , Maximoq; Pontifice dignam, & parem heroicis illis, antiquisq; facinoribus , quæ tantoperè in historiis decantantur. Non credidit Innocentius lucrum tam grandis Regni totq; animarum Deo probatum iri, si turpi conniventia, ac modis Pontifice indignis pararentur: quomodo enim turpia & indigna placere possint tam magno , tam generoso & indolis infinitè nobilis, honestæque? num ergo Omnipotentia Deum defecit, ut Regna animasq; lucrari non possit, veramq; Religionem Anglis persuadere , nisi adulatione & artificiis non Deo tantùm, sed quovis honesto senatore indignis? *Agat Pontifex , quæ non decent, ut Deus Angliâ potiatur.* Miserum Deum! si opus habet tam sordidis consiliis, suaq; Majestate indignis! imò pereat

pereat potius Anglia, quàm ut pontifex se ad indecora & inhonesta demittat. Quid faciunt in Cœlis tot Legiones Angelorum, si Religio florere non potest nisi humanis flagitiis? Eadem Jobo, quæ Innocentio mens fuit, quando dicebat: (a) *Nunquid indiget Deus mendacio vestro, ut pro illo loquamini dolos?* Et Apostolo: (b) *Non sunt facienda mala, ut eveniant bona.* Et quid sanctos & Apostolos loquor? Ipsi quoq; Ethnici hanc veritatem professi sunt. Simultas Atheniensibus cum Spartanis erat alioquin foederatis. Athenis in senatu de bello agitatum. Themistocles senatorem petiit, cui modum in abdito patefaceret hostes profligandi: datus Aristides, cui arcanam fraudem exposuit, quâ Spartana classis incendi posset. Rediit Aristides senatu suspenso, ac magnum aliquid præstolante; tunc ille: *Perutile est Republicæ Themistoclis consilium, sed minimè honestum.* Exclamavit senatus: *Quod honestum non est, non potest esse utile.* Ita
Cicero

(a) Job. 13. (b) Ad Rom. 3.

Cicero & Plutarchus narrant. Scio ætatis nostræ politicis hæc. axiomata haud probari, quibus videlicet tota fiducia in blandiendi, fallendiq; artibus, nullâ curâ honesti : at ego non Politicis scribo, sed veritati, & huic tandem omnia cedent.

Anno MDCLXXXVI. Dux Estreus Galliæ Legatus repentinâ ferè morte sublatuſ eſt , voluitquè Pontifex exequiâs paratiſſimè celebrari, eademquè Pompâ, quâ Decanus Cardinalis efferri ſolet; nec ante cadaver conditum permiſſum Juſtitix Miniſtris, ut plateam, viciniamquè Farnesiam obirent. Tantò pluris hæc humanitas Pontificis fuit; quòd cadaver Apoſtolici Nuntii, quamvis Archiepiſcopi, diù Pariſiis inſepultum jacuit, tanquàm Parochialibus juribus ſubderetur. Mortuo ergo elatoquè Eſtreo , juſſum Apparitoribus , ut plateam Farnesiam percurrerent , datæque ad Ranuccium Cardinalem Pontificis Legatum literæ, quibus jubebatur Regi factum, rationesquè Pontificis exponere; fecitquè Renuc-

nucius eâ facundiâ , momentisque argumentorum , quæ æquitas causæ merebatur , sed Rege immoto , & Legato , qui immunitatem tueretur , proficisci jussu. Estreus quoque Cardinalis , qui eandem immunitatem tanquàm Galliæ protector ambiebat , Româ excessit , delegitque villam prope Portam S. Pancratii. Hæc omnia pontificem impulere , ut Bullam tandem vulgaret in ipso pontificatus sui limine destinatam , retentamque , ac ab omnibus Cardinalibus , qui Romæ morabantur , subscriptam , Estreo & Maldachino exceptis , qui causas cur subscribere haud possent , se pontifice coram allaturos sponderè. Missa ad omnes Legatos exemplaria , jussique principibus insinuare. Repetebantur in hoc diplomate superiorum pontificum pœnæ , additâ Excommunicatione majori ipso facto incurrendâ , solique Pontifici reservatâ in eos omnes , qui jure Asyli , aut potiri , aut uti vellent ; cùm enim nemo amplius superesset ex Magnatibus Pontifici subiectis , qui sibi hoc vendicaret , credidit

Pon-

Pontifex, non aliis armis, quàm spiritua-
libus utendum ; quibus nemo Christia-
norum exemptus est.

Rege interea Lucemburgo Parisios re-
verso, non omisit Ranuccius apud Re-
gem, Regiosquè Ministros insistere, ne
Legatum ad Pontificem mitterent, nisi ju-
re Asyli abdicato, alioquin nunquam
Romæ pro Legato habitum iri. Idem
Lavardino sæpius repetitum, ac tum
præcipuè, cùm profecturus Nuntium A-
postolicum inviseret. Quamvis enim hic
millies testaretur, se ad Pontificem gra-
tissima afferre, ac plena reverentiæ, sem-
per tamen responsum est, nihil isthac
profectura, nisi Asylo abisteret.

Sub initium ergo Septembris Lavar-
dinus lentis itineribus Italiam versùs
profectus est terrestri itinere; & mari fa-
milìa, cui ingens Officialium, militum-
què ex Gallica Classe numerus accessit.
Pontifex intellecto Lavardini in Italiam
adventu, denuntiari iterùm jussit Estreo
Cardinali, se nunquam Lavardinum pro
Legato habiturum, si jure Asyli potiri
vellet.

vellet. Sed & omnes Cardinales, prælaticque, quotquot Romæ agebant, jussu Pontificis moniti sunt, recordarentur Pontificij Diplomatis, quod ipsi subscripserat, quoque omni societate cum Lavidino arcebantur: quippe qui contra omnium Principum, Gentiumq; jura toties recusatus, vi tamen, & in contemptum Principis Legatum ageret, seque in censuras & anathemata sponte indueret, simulq; juxta Galliæ Conventiones & Concordata ijsdem Censuris omnes, qui cum eo agebant, involverit.

Sufficeret historica hæc enarratio, suisque annis distincta ad evertendum, quidquid pro hac immunitate tuenda Lavidinus, alijq; scripserunt. Id verò ut palam fiat, juvat aliqua observare.

Et *primò* quidem has Immunitates non posse ex jure Legatorum, aut ex Principum, à quibus mittuntur, reverentia proficisci. Vidimus enim eas non à Legatis tantum, sed ab omnibus ferè Baronibus, Magnatibus, Cardinalibus,
imò,

imò, ut Boccalinus loquitur, à quovis ferè nobili occupatas esse. Qui ergo dici potest Legatis proprium, quod tam multis commune fuit? Nec potiori titulo Legati quàm alij; omnes enim uno eadamquè modo usurpabant: nec Pontifices omisissent juris, aut privilegij reminisci, si aliquod Legati haberent.

Secundò. Quoties Pontifices in has immunitates edictis pugnabant, nullum unquam (excepto Lavardino) legas repugnâsse, aut jus aliquod prætexuisse; quod manifesto argumento est, nunquàm fuisse à Legatis pro legitimis habitas: quis enim credat ex tot Principum Legatis, suorumq; jurium, etiam quæ non habent, tenacissimis, ausum neminem esse, non dicam obniti, sed ne conqueri quidem, si illis fiderent? Tacuerunt, quia nulla suppetebat ratio loquendi.

Tertiò. A Julio III. usque ad viventem Pontificem, quoties scintilla aliqua micabat istarum immunitatum, toties edictis pænisque obstitisse Pontifices; quod solum sufficeret ad rumpendæ Præ-

scriptioni; si enim mille annorum spatio nemo me invito & Judicem appellante domum meam præscribere potest; quî poterit tantam urbis partem tantquam amplam Jurisdictionem?

Quarto. Imò non tantùm edictis Pontifices contra hujusmodi immunitates pugnârunt, quod, ut dixi, sufficeret, ne præscribi possent, verùm etiam reipsâ abolitæ, sublataque; idque *tum* ex silentio Legatorum constat, quo pontificijs edictis acquievêre: *tum* ex publicis documentis & protocollis, in quibus quàm plurimos actus reperire est, administratæ per Apparitores Justitiæ, idque in ijs ipsis locis, quæ modò exempta jactantur, Legatis nihil ausis repugnare: *tum* ex petrarchæ, Boccacini, patris Olivæ Societatis Jesu Generalis: imò ex totius ferè urbis testimonijs, quæ hodiequè recordatur, usque ad Clementis X. Pontificatum liberam fuisse Romam tam turpi, noxiâquè servitute, quamvis Clemens (sive ob fessam annis ætatem, sive ob similtates inter Cardinalem Ne-

potem,

potem, Legatosquè alijs ex causis ortas) edictis, pœnisquè abstinuerit; certum tamen est, gravissimè apud principes conquestum esse, quod solum sufficeret præscriptioni truncandæ. Sed nihil æquè hanc veritatem ostendit, ut Pisana Conventio, in qua, licet Crequius Galliæ Legatus hanc immunitatem enixissimè peteret, eamquè novam, & insolitam esse fateretur; licet Pontifex Alexander temporum acerbitate durissimas condiciones acciperet; nunquàm tamen immunitas impetrari potuit: cessitque Legatus, cùm pontificem obfirmatum videret: nec Romam postea reversus de hac immunitate ac Jure Asyli quidquam cogitavit, liberis Justitiæ Ministris, omnesquè urbis Regionès & plateas oberrantibus; non ergo tunc temporis hoc jure Legati gaudebant.

Quintò. Denique exijs, quæ hætenus narrata sunt, palàm est, Innocentium XI. Pontificem Maximum in abolendis Legatorum Asylis summo quid-

dem jure processisse, sed summâ quoque moderatione, ac planè pacatissimâ, & Patris potiùs, quàm Principis more. Primò nihil cursim & impetu factum, sed omnia diù, lenteq; maturata, ac priùs undecim annorum spatio discussa, quàm Bulla ederetur. Deinde nihil contra Legatos à Pontifice decretum, imò omni honore observati, preces tantùm & querelæ in aulis Principum ac Parisiis porrectæ, idquè toties, tamquè efficaciter, ut faterentur Ministri, justa postulari, & Rex ipse omnia promitteret. Utquè suavis minorique pudore Gallia invitaretur, præmissa aliorum Principum exempla, Poloniæ videlicet, Angliæ, Hispaniæquè, Asylo cedentium: nihil quoq; Romæ immutatum, dum Legati viverent, sed expectatum, dum vitâ aut saltem Legatione abirent; ipsi quoq; Estreo, quamvis defuncto tanta reverentia est habita, ut ante exequias nihil in Palatium, viciniamq; Farnesiam Apparitoribus liceret. Ipse Lavardinus, quamvis novo inusi-

inufitoquè exemplo Romam militariter invecus, ac Pugnatori potiùs, quàm Legato fimilis, ædesq; Farnefias, ac vicinam regionem armatis, excubiis, circitoribus, pulvere plumbo, granatisq; ac omni apparatu militari impleffet, perinde ac fi castrum non Palatium occupâffet, in eaque urbis parte Dominatum ambiret Pontifice exclufo; hæc omnia, quæ non dico nullus Principum, fed nec ullus Civium domi fuæ pateretur, Pontifex tamen placidiffimè tulit, non arma, non Principum vicinorum fœdera, non pœnas oppofuit, innocentiam tantum fuam & iuftitiam nixus. Quæro, an à Pontificis, aliorumquè Principum Legatis Galliæ Rex hæc fieri Parifiis pateretur? paffus eft tamen Innocentius. Quid potuit amplius? Nam Cenfuras quod attinet, non illas Pontifex in Lavardinum vibravit, fed Lavardinus fe ultrò in illas induit. Quæ culpa Venatoris, fi jaculum in feras deftinatum tu spontè incurras? nec enim Innocentio

animus fuit, cùm sub pœna Excommunicationis Asylum prohibuit, ut Lavar-
dinus eam incideret, sed ut vitaret; si
ergò noluit vitare, sed potius incidere,
non Innocentius accusari, sed Lavar-
dinus debet; nam ut benè observavit
Augustin⁹: *Non vult ferire, qui dicit cave.*

Hactenus ordine Historico exposui-
mus originem, progressumquè Asylo-
rum, quæ à Gallico Legato tantâ con-
tentione expetuntur; superest, ut osten-
damus, quas ob causas Innocentius
XI. abolita ea voluerit; multæ enim,
gravissimæquè pontificis animum urge-
bant, ac tantæ rei pares.

III. *Primò* infiniti abusus, qui huic
immunitati miscebantur. Nulla ferè
urbs populo sacro, profanoquè ac præ-
sertim externo frequentior: par popu-
lo delinquendi licentia multitudine ac
exemplis protecta, sed præsertim faci-
litate impunitatis, sparsis totâ urbe
Asylis; nullum enim crimen, cui non
continuò Palatium aliquod, imò vicus
pateret; hîc secura flagitia, imò Prin-
cipi

cipi infultantia ; quanto hoc fidelium
fandalo in ipfo Religionis domicilio,
non impunitam tantum impietatem vi-
dentium, fed etiam florentem, mina-
cemquè ? quanto pontificis dedecore,
qui videre, patiquè cogeretur, quæ nol-
let ? Nec verò corrigi abufus, deleriquè
aliter poterat, quàm fublata causâ, hoc
eft, jure Afyli. Quamvis enim Legati
omnia pollicerentur, nunquam tamen
favor, clientelæ, preces, largitiones,
aliiquè prætextus aberant reos protegen-
di, docuitquè experientia, fifti flagitia
non poffe retentis Afylis, & Legatorum
promiffa femper effectû caruiſſe.

Secundo. Non minima pars urbis fu-
premo Pontificis imperio fubducebatur,
dominio inter tot Legatos, velut inter
tot Principes, diviſo : quanta hæc ſervi-
tus, quantumquè periculum, ne dein-
ceps pejora fequantur ?

Tertiò. Nullibi terrarum hæc licen-
tia permiſſa, cur ergo Pontifex patere-
tur, quod nulli principum ? aut cur
Romæliceret, quod Pariſijs, quod Lon-

dini, quod Viennæ, quod nusquam
licuit?

Quartò. Accedebat spes maxima
rem tanti momenti feliciter explendi,
modò Pontifex vadium experiri aude-
ret, nec primo torrenti cederet. Quip-
pe optima causa & iustissima agebatur,
a omnibus probata. Constabat Pon-
tificem non impetu, non indignatione,
aliisque privatis rationibus ferri, nul-
loquè suo, aut suorum commodo, sed
solâ necessitate urbem purgandi tam in-
dignâ, noxiaquè servitute. Accede-
bat insignis Veneratio, quam Innocen-
tius sibi toto Orbo Christiano parave-
rat: summa morum integritas; animus
omni affectu vacuus; nulla familiæ ex-
tollendæ, aut propinquorum cura,
quos pro externis habere videbatur;
publici tantùm boni immensa sollici-
tudo. Urbs quàm plurimîs, insolitis-
que corruptelis purgata. Religionis,
disciplinæquè Ecclesiasticæ flagrantis-
simus Zelus, nullo privatorum, magna-
tumq;

tumq; delectu, nec tamen immodicus & accusationi obnoxius, aut prudentiæ expers; id enim in hoc Pontifice præcipuum, quòd cùm animi magnitudine & constantiâ nec Bonifæcio VIII. nec Sixto V. cedat, multò tamen illis moderatior, severitate pacatâ, & amoris ac reverentiæ in Principes mixtâ, quos nec provocet, nec tamen formidet. Populus, quantum licuit, oneribus sublevatus. Summa domi frugalitas, sed foris summa quoque & major dictu, credituq; liberalitas, immenso in Turcicum bellum profuso auro; sed præcipua in Deum fiducia, & ideò par fiduciæ felicitas, nec enim alium retrò sæculis Pontificem reperiās in proferenda Religione, magnitudine rerum gestarum parem. Austria Turcicis armis, quæ totam Europam concusserant, liberata. Hungaria, Sclavonia, Croatia, Græcia, Peloponnesus præter Insulas quàm plures Barbaris adempta, & quod mireris, hæc omnia ægro plerumq; Pontifice, nec tamen otioso, sed consiliis, Legatis,

ac præsertim immensis Thesauris omnia promovente. Taceo alia, quæ modestiam Pontificis feriant, si palàm fiant, mequè adulationis notent, quam averfor. Hæc ergo omnia, ut maximam Innocentio venerationem, ita parem fiduciam pepererant, fore, ut quidquid in tam sancta causa, à tam sancto Pontifice ac ipsi quoquè hæreticis laudato fieret, ratum omnes Principes, acceptumque haberent: & habuerunt planè, cesseruntque Asylo.

IV. Cum solo Galliarum Rege pugna superfuit, flagratque in hunc diem semper majori flammâ, sed pontifice æquè immoto, invitoquè; nam præter rationes, quas suprà libavimus, illa quoquè accessit; non posse Gallos audiri, quin Principes omnes, qui Asylo renuntiaverant, offendantur, quippe se sperni crederent repeterentque jam concessa, pejori quàm antèa malo. Denique Innocentius à primo Pontificatûs sui ingressu Christianissimi Regis animum per Varesium, per Laurum, Ranucciumquè
Mini-

Miniftros fuos pertentaverat , oftensâ
efficaciffimis rationibus Afyli abolendi
neceffitate ; & à Rege magnificè respon-
fum : *Se aliorum Printipum exempla ob-*
servaturum , nec ultimum fore , qui tam
juste petitioni deferret. Quid ergo fibi
Pontifex non sponderet à tam propensa ,
testataquè Regis voluntate ? Agebat
tunc temporis Legatum Gallici Regis
Dux Estreus , noluitquè pontifex ejus
palatij prætenfam immunitatem , Afy-
lumquè turbari , dum viveret , ratus
hanc quoque moderationem profutu-
ram placando , lucrandoquè Galliæ Re-
gi , nec multò post Estreus vivis excessit.
Jussi satellites Palatij aream , viciniam-
que obire , hætenùs justitiæ inaccessam ,
non priùs tamen quàm elato funere , ju-
stisquè peractis , ut sic quoque mortui
cineribus veneratio haberetur. Regi-
bus quoque denuntiatum , neminem à
Romano pontifice pro Legato habitum ,
admissumque iri , nisi Afylo renuntia-
ret. Videbatur Hispaniæ Rex oblu-
ctaturus , sed continuò cessit , Pontificis

& justitiæ, quæ sola quærebatur, reverentiâ. Solum ergo cum Gallia bellum fuit. Diu illic dubitatum, quid fieri deberet Lavardino jam proficisci, jam consistere jussu, donec tandem profectio decreta, imperatumquè Legato Asylum tueretur. Mirari subit, quæ tandem causa Regem Christianissimum impulerit, ut tanto ardore hanc causam promoveret. Nihil enim ejus dignitati decedebat, si omnium Principum exemplo, latrociniis, sacrilegiis, adulteriis, raptibus, homicidiis, aliisque urbis sacræ flagitiis hoc præsidium subduceret: nec ideò minor, si non serviret sceleratis. Multis ergo in mentem venit, aliud hoc cum Pontifice bello quàm Asylum quæri: nimirum, ut victorias Cæsaris moraretur Italiâ armis turbata: at ego nihil tale de Christianissimo Rege crediderim; quidquid fuerit, Lavardinus Italiam tenuit, conseditque haud procul Romam; sed jussu Pontificis nunquam in Provinciis Ecclesiasticis apparatu Legati exceptus.

Tan-

Tandem ingredi urbem ftatuit, delegitquè Dominicam diem, decimam sextam Novembris anni octuagesimi feptimi fupra millefimum fexcentefimum. Pompæ hic ordo fuit. Præibat ingens equitum armatorum globus, gladiis fclopiſque brevibus, longis, mediis inſtructus, fequebantur quadraginta currus impedimentis onuſti: poſt hos alia equitum æquè armatorum turma; tum acies nobilium in equis juvenum, alii que magno numero famuli, qui rhedam Legati pedites ambiebant, in ea præcipuo loco Cardinalis Eſtreus, purpurâ amictus; dexteram Legati uxor, lævam filia tenebat, ex adverſo Maidalchini Cardinalis, cui ad ſiniſtram Legatus Gallicus. Jacti quoque in accurrentem populum argentei nummi, quibus ad Gallici Regis nomen celebrandum invitaretur, ſed à paucis acclamatum, iſſque miſerrimis. Subeuntem palatium binæ armatorum alæ, dextera lævaq; ſparſæ in equis excepère, noctu excubiæ palatio adhibitæ, juſſæq; militariter palatium,

viciniamquè obire, ne quis Asylum turbaret: impedimenta quoque armatis vallata, submovendis telonariis: Nocturnum epulum Estreus Cardinalis Legatus exhibuit. Is primò ad Cardinalem Cibum, postea ad Summum Pontificem admitti petiit, sed ab utroq; rejectus est. Romæ interim pergebatur publicis, privatisq; precibus Deum implorari, ac supplicationes obiri, singulis Religiosorum sodalitiis ad templa quotidie procedentibus; crederes publicam calamitatem urbi imminere, eiquè evertendæ Romam certatim laborare. Cùm Pontifici adventus & Pompa Legati nuntiaretur, fertur respondisse: *Hi in curribus, & hi in equis! nos autem in nomine Domini ambulabimus.*

V. Planè novâ specie Roma intremuit, ipsique Galli averfati sunt; Legatum videlicet, pacisq; interpretem militari apparatu terrenti, bellantiquè similem alienam Civitatem invehì, arcemquè Religionis calcatâ Principis

Ma-

Majestate; id à nullo Legatorum factum. Sed nec ulla tanti strepitûs causa; si enim vim metueret, quantulæ hæ copiæ, ut armato Pontifici obisterent, cogerentq; invitum? si nihil metueret, quò tanti apparatus, nisi fortè ut Principi insultaret? dissimulabat interim, ferebatq; Pontifex, contentus Legatum non agnoscere, idque toti aulæ indictum. Instabat dies sanctæ Luciæ sacra, quæ in Lateranensi Ecclesia solemni ritu ac Legato coram peragi solet in memoriam Henrici quarti Galliarum Regis: jusserrat Pontifex, si Lavardinus adveniret (quippe censuris adstrictus) continuò faces extinguere, sacrumq; arumpi, ac cantum cessare. Id ubi Legato innotuit, differri jubet sacram ceremoniam in alium diem: sed Pontifice negante ullam esse differendi causam, cum Canonici ostendissent, inter eam Ecclesiam, Regemq; conventum esse, ut Legati arbitrio staret, quam diem eligeret, continuò acquievit, permisitq; transferri. Memorare id volui, ut moderatio

deratio Pontificis palàm fiat, flagrantis quidem, sed intra rationem, citraquè excessum, quod in Principibus ratum. Plura scribere omitto, quæ nihil refert scire posteritatem; quippe aut minuta, aut offendendis animis apta, quos ego pacari malim, componiquè. Illud tantùm adijciam, quod maximè hanc litem Romanam inter, Galliamquè incendit. Nōte Nativitati Salvatoris sacrâ Lavardinus S. Ludovici Ecclesiam adit, sacroq; epulo accumbit, strato pulvinari, aliisq; Legatorum insignibus usus. Re ad Pontificem delatâ non potuit pænis, justaquè severitate ampliùs temperare, quam hactenus cohibuerat, quamquè Lavardinus videbatur non tantùm provocâsse, sed etiam ab invito extorsisse. Constabat censuris obstrictum esse ob usurpatum Asylum, armisquè retentum; id enim sub excommunicatione latæ sententiæ, ipsoquè facto incurrendæ Pontificium Diploma prohibuerat: ferebat interim Pontifex, dissimulabatquè, & moras induciasquè necebat. At postquam

La-

Lavardinus processit, in ipsaquè Ecclesia, & totâ Româ spectante, ac cùm maximè oportebat Deum, ejusquè Vicarium placare, contemptum professus est, quid potuit aliud Pontifex, quàm ut tandem excitaretur toties excussus? & tamen tunc quoque modestissimè actum, nec supra necessitatem. Jubet ergo per Cardinalem Vicarium interdictum Gallicæ ædi affigere adjectâ causâ: *Quòd Lavardinum notoriè excommunicatum ad sacra admisissent.* Potuit aliquid minus fieri à Pontifice, à toties provocato, offensoquè? Missi etiam à Gallis citatis equis veredarij, qui Regem omnia, quæ contigerant, causasquè edocerent: simulque Apologiam Lavardinus vulgavit, quo factum purgabat, negabatquè se censuras meruisse.

Lubet hîc observare, quantâ in hac causa moderatione Innocentius processerit.

Nam primò noluit Pontifex novum Diploma, quo Asylum persequebatur, vul-

vulgari, vivente adhuc Estreo Duce Gallia Legato. Mortuo Estreo præmissa sunt exempla omnium Regum Principumquæ Asylo cedentium, ut tantò suavius Gallia invitaretur, minori quæ pudore, si ultima cederet. Lavardinum quamvis militari, hostilique paratu ingressum, & armatis obseptum, ac bellum, quàm pacem afferenti similiorem; non tantùm Provinciis ac Urbe non prohibuit, quod facillè poterat, & nemo non Principum faceret; verùm etiam admisit, tulitque fremente populo, & jura ac Principis Majestatem violatam esse conclamante. Quando non dico Rex Gallia, sed alius minorum Principum hâc specie Legatum domi suæ ferret, tantoquæ publicæ quietis damno? superavit ergo Innocentius non solum omnium Principum, verùm etiam privati Civis patientiam. Palàm quoque erat Lavardinum censuris esse implicitum, quippe violati Diplomatis reum: nihil tamen Pontifex movit, sed ignorantia aut conniventi similis rem tempori

com-

commendabat, minimo contentus, hoc est, pro Legato non agnoscere, Deum-
què publicis precibus placare. Nec
unquam Lavardinum, pro excommu-
nicato declarâset, nisi ille palàm &
cum pompa contemptum professus te-
lum ab invito extorsisset. Quòd si ani-
mus erat Pontificem spernere, quæ rogo
necessitas id cum tanto apparatu, fastu-
què ostentare, ipsaq; nocte flagrantis
totâ urbe pietatis? Nec dici potest, non
id Lavardinum prævidisse; nam Ponti-
ficis animum, cùm de festo sanctæ Luciae
ageretur, jam exploraverat. Sed age,
Anonymi Auctoris Libellum quique La-
vardini Advocatum se fecit, jam percur-
ramus.

VI. Primò igitur opponit Anony-
mus: (a) *Nihil unquam injustius majore
injuriam contra Principum Legatos,
quàm quod nuper Romæ contra Lavardi-
num tentatum esse.*

R. Antiquissima est præpotentium
querela, ut sibi injuriam fieri dicant, cum
aliis

aliis faciunt. Quoties ovibus à Lupo objectum est, turbari ab illis fontem, cum tamen infra lupum aquarentur? si injuria est, quidquid Gallo non placet; fateor magnam accepisse Lavardinum: & nego hinc oportere injuriam æstimari. Dicitur ergo injustum, quidquid sit contra jus alterius: prius ergo probari oportuit, jus fuisse Lavardino, invito Principe, ad quem mittebatur, se pro Legato ferendi, implendiq; metu & armis urbem, ut reliqua tamen superius narrata, & quæ non dicam, nullus Principum, sed neq; ullus Paterfamilias domi suæ pateretur. Hæc si jure fecit Lavardinus, accusare Pontificem potest; sed cui mortaliū persuadebit, id jure factum? Comparentur, quæ Pontifex à Lavardino tanto jam tempore passus est Romæ, quæque Lavardinus à Pontifice; & mox constabit uter injuriam acceperit.

VII. Secundò: *Ignarissimos esse jurium* dicit, (a) *quæ Regibus conveniunt,*
qui-

(a) *Fol. 2.*

quicumque negare ausint, non pendere ex Principis arbitrio Legatos constituere; istis verò jure gentium honorem ac venerationem deberi: sic omnium populorum moribus receptum esse, etiam cum bello implicantur. Quæ ergo contra Lavardinum Pontifici Romano suggesta sunt, aliena esse à communi sensu omnium Gentium bene honesteq; institutarum. Posse quidem Regibus supplicari, ut Legatos suos amoveant, quoties publicam pacem turbant, aut aliàs hostilia moliuntur; dum tamen morantur, Legatorum more colendos esse. Ne apud incultissimos quidem Barbarorum auditum, lectumq; esse, ut eo prætexit Legatorum dignitatem violarent, quòd ipsi nollent Principum suorum juribus cedere. Hac verò si locum habeant apud Principes merè seculares, multò magis apud Pontifices Romanos, quorum potestas precaria sit, pendeatq; ex filiali Principum reverentia, præsertim verò Gallie Regum, unde tota in temporalibus Pontificum dignitas. Esse Romanam omnium Gentium communem Patriam, sicque oportere omnium Principum Legatis frequentari.

R. Hac

R. Hæc Auctor longâ Oratione, sed rebus vacuâ. Supponit enim Lavardinum Legatum esse, utq; Legatus sit, ex solius arbitrio Regis, qui misit, pendere. Supponit iterum, si Rex Legatum removere nolit, quamvis ex justissimis causis id pontifex petat, nihilominus etiam ab invito tolerandum, & pro legato habendum esse. Hæc pro tam certis habet, ut ignorantissimos esse dicat, qui negent: & tamen tam falsa sunt, & ab omnium sensu aliena, ut nihil magis; sed oportuit paginam implere, & quod veritati defuit, compensare convitiis honesto calamo indignis. Veritas sic habet: Legatus est Persona publica, quæ à Principe ad Principem mittitur, pacis aut alterius negotij causâ. Legatus igitur non unius tantum Principis mittentis, sed etiam ejus, ad quem mittitur, assensu & voluntate constituitur. Duo, inquit Grotius, (a) requiruntur, ut quis Legatus constitutatur, auctoritas videlicet mittentis, & Prin-

(a) Grotius de J. pacis & belli l. 2.

Principis, ad quem mittitur. Legatorum quippe immunitas & officium ex tacita partium conventionem proficiscitur, ut idem Grotius notat; hæc verò est reciproca, & utriusq; consensum requirit; nec immeritò, cum utriusq; Principis interfit, quis Legatus eat. Idque multò maximè locum habet in ijs Legatis, qui hodiernâ tempestate diù aut etiam perpetuò in aulis morantur; in his enim cessat ratio juris gentium, hoc est, necessitas. Audi eundem Grotium: (a) Optimo, inquit, jure rejici possunt, quæ hodie sunt Legationes assidue, quibus quàm non sit opus, docet mos antiquorum, quibus illæ ignoratæ. Idipsum Wicquefortius (b) testatur: Certum est, inquit, legationes ordinarias nec juris gentium, nec ducentis retrò annis notas fuisse; suntq; quàm plures Nationes, apud quas nullus earum usus, sola Europa eas admittit, siq; aliquis Principum eas respuerit, dici quidem poterit aliquid contra morem fuisse, nihil contra jus Gentium.

Hæc

(a) Grot. cit. (b) Wicquefort en
l'Ambassadeur l. 1. pag. 11.

Hæc ita vera sunt, ut sive antiquam sive recentem historiam evolvas, infinita reperias Legatorum exempla, qui aut non recepti, aut remissi sunt; nec tamen creditum est, jura Gentium violari. Sic Romani Ætolis denuntiârunt: (a) *Ne Legatos mitterent, alioquin pro hostibus fore.* Itemquè Vejentibus: *Ni facesserent urbe, pœnas daturus.* Lacedæmoniorum Legatus à pericle dimissus est: (b) *Quòd ab hoste armato venisset.* Quantò magis dimisisset, si Legatus ipse armatus veniret? sic Senatus Romanus negavit se posse Carthaginensium (c) Legatos admittere, quorum exercitus esset in Italia. Sic Legatis Jugurthæ à Romanis edictum (d) intra decem dies Italiâ excederent, nisi Regem & Regnum deditum venissent. Et quid plura? numquid in sacris litteris habemus Rabfacem Regis Assyrij Legatum jure meritò ab Ezechia Rege receptum non esse,

(a) *Liv. l. 27. l. 10. l. 4.* (b) *Thucid. l. 11.* (c) *Liv. l. 41.* (d) *Salustius in Jugurtha.*

effe, quòd timeretur populum perverſurus? Si recentia percurras, non minus exemplorum eſt, præſertim in Gallia, ubi planè nihil frequentiùs, quàm ut ex cauſis Regi notis, nec aliorum judicio aut examini ſubjectis Legati aut non admittantur, aut exire Galliâ jubeantur: eſtq; recentiſſimum Tigurinae & Bernenſis Rei-publicae Legatorum, qui nec in Regis conſpectum, nec ad tractanda cum Miniſtris Regijs negotia admiſſi ſunt, idque non alia ex cauſa, quàm quòd de ritibus, formaquè illos excipiendi conveniri non potuit. Quantò ergo majori, juſtiori-que ex cauſa Lavardinus excludi potuit, qui contra aliorum Regum exempla Aſylum non tantùm peteret, verùm etiam armis occuparet? Nuper quoq; Moſcoviticis Legatis indiſtum, ut niſi pellium mercatu abſtinerent, Galliâ exirent. Paul⁹ IV. Figueroam Philippi II. Legatum, & Mediolanenſi Præfecturâ deſunctum, cùm ferè Romam intraret, urbe excluſit, (a) negavitquè pro Legato agnitum iri, quòd Pontificis curſorem litteris,

D

quas

quas ferebat, spoliâſſet, incurriſſetquē cenſuras: nec Philippus ſuccenſuit, ſubſtituitq; Vargam Venetiis priuſ Legatum. Sive ergo Legationis naturam, ſive exempla Principum inſpicias, etiam quibus maxima iuris Gentium reverentia (quales Romani) concedi omninò debet, Legatum dici non poſſe, qui à Principe admiſſus non eſt; poſſe verò non admitti ex plurimis cauſis, præſertim ex illa, ſi veniat aliena inuaſurus, ut nuper Lavardinus; tunc enim non Lavardinus; tunc enim non Legati ſed hoſtis vices agit, ceſſatquē finis Legationis. Hæc tam clara ſunt, ut negari à nemine poſſint, nec tamen ſperare nobis victoriam licet, quando à Gallis non ratione, ſed potentiâ certatur. *At, inquit Anonymus, ſupplicari Principi debet, ut Legatum amoveat; colendus verò eſt, quamdiu moratur.* Nimis ignarus eſt rerum, qui hæc dicit: quoties enim per Vareſium, per Laurum, per Ranuccium Cardinalem Pontifex rogavit, urſitque, ne Lavardinus mitteretur? & tamen miſſus eſt; nec miſſus

fus tantum, fed etiam armatis obfeptus, adeò ut dubitari poffet, Gotthus, an Gal-
lus effet, qui fic Romam intravit. Quid
fuperfuit Pontifici? quì modèftiùs tueri
fe poterat, quàm ut urbe quidem admit-
teret, etfi armatum, minacemq; , non ta-
men ut Legatum haberet? nam nec Lega-
tus erat, quippe invito Pontifice. *At nulla
Lavardini culpa, cum non poffet juribus ce-
dere à Rege pratenfis, cur ergo punitus, fi in-
nocens?* Nulla eft pœna, fi alicui non
tribuas, quod non debetur: Lavardinus
ut Legatus à Pontifice habitus non eft,
quia Legatus non fuit; quis pœnam di-
cat, fi pro fenatore aut Epifcopo non ha-
bebatur, qui nec Epifcopus, nec fenator
eft? nam quòd poftèa Cenfuras inciderit,
non hæc culpa Pontificis, fed Lavardini
fuit. Pontifex enim cenfuras univerfim
tulerat in eos, qui Afylum ufurparent,
nullo Hispani, Angli, Germani, Galli,
aliarumq; nationum, discrimine: quòd
ergo Lavardinus fe illis, & folus induerit,
non Pontifici imputare poteft, quippe
nolenti, invitoq; , fed fibi, qui spontè in-

currit: nam si quis gladio se perimat, quem accusabis? fabrum? qui gladios fecit, palamq; exposuit? an eum, qui in ferrum incubuit? Nec interest, Lavardinum ex Regis imperio Asylum occupasse; nam, ut taceam, multa à Lavardino peracta esse præter Regis voluntatem; cui nota non est Apostoli sententia in omni foro humano Divinoq; recepta; videlicet: (a) *Dignos esse morte non solum, qui ea faciunt, sed etiam, qui consentiunt facientibus?* Si ergo eadem culpa est facientis & consentientis, quantò magis imperantis & exequentis? Quinquagenarii, qui ad capiendum Eliam missi sunt, se quoq; Imperio Regis Ochoziæ (cujus Legati erant) tuebantur: (b) *Homo Dei, Rex precepit, ut descendas.* Et tamen igne puniti sunt Deo excusationem respiciente. Heliodor⁹ quoque Antiochi Legat⁹ cum Templum spoliare aggrediretur Summo Pontifice Onia renitente; Principis mandatum prætexebat: (c) *At ille pro his, quæ in mandatis habebat à Rege, dicebat, Regi ea esse deferenda.*

(a) *Ad Rom. 1. v. 32.* (b) *4. Reg. 1.*

(c) *Mach. c. 13.*

da. Num ideò calcibus & flagellis punit⁹ non est, moriturus, nisi Onias servâſſet? Nihil ergo juvat Lavardinum Regis voluntas, quando non imperium Principis, sed caufa innoçentem facit. Quæro ſi Pontificis, aut alteri⁹ Principis Legatus invito Rege, armatusq; Parisios intraret, illicq; ſimile aliquid moliretur ijs, quæ Lavardinus Romæ, quanto eum tempore Rex pateretur, quantumq; deferret Principis ſui imperium alleganti? mirari ergo Lavardinus non debet, ſi exceptio Romæ non valet, quæ Parisiis nunquam valuit, valebitquè. Hæc tam aperta ſunt, ac omnibus nota, ut negari non poſſint; & qui negant, multò pejorem faciant Regis cauſam tam pudendis auxilijs.

Quod verò dicitur: *Pontificis Romani in Chriſtianos poteſtatem precariam eſſe, & ex Principum arbitrio, qui ſe ſpontè ſubmittunt, pendere, tantoquè magis Pontifici cavendum, ne iſtos offendat?* Reſpondeo hoc argumento omnium Principum poteſtatem, non ſolius Pontificis peti, quis enim imperabit,

si nolint subditi obedire? evolvantur omnium Gentium Historiæ, & continuo patebit, multò sæpiùs contra Principes sæculares rebellatum esse, quàm contra Pontifices; imò stetisse Cathedram Petri, quamvis millies concussam tot cadentibus Regnis: ipsa Romana Monarchia tot exercitibus, tot imperijs, tot opibus potens tandem defloruit durante Ecclesiâ; interquè ipsos Romanos Imperatores, quis non ex militum favore, studioquè pependit? Taceo Gallici, aliorumquè Regnorum scenas & vices: frustrà ergo Pontifici obijcitur, quod multò magis omnium regnantium est fatum; illud discrimen est, quòd subditi, ne à sæcularibus Dominis deficiant, temporalium pœnarum metu coërcentur; hic si absit, majorquè sit subditorum, quàm Principis potentia, nihil ampliùs moratur, ut jugum excutiant. Secùs est in imperio Religionis; hîc enim, ut Pontifici Romano subdat, non temporales pœnæ, sed æternæ faciunt, nec istis evadendis ulla
par

par potentia. Unde fit, ut paulò antè dicebam, multò sapiùs à principibus, quàm à Pontifice subditos defecisse, nullum ergo minùs precarium imperium est, quàm Religionis. Quòd si nemo principi persuaserit, ut subditis omnia concedat metu seditionis, quantò minùs pontifici? præsertim quòd Ecclesia sicut non humanis consilijs & prudentiâ crevit, ita nec humanis consilijs regenda est, quoties illa Divinis adversantur; quid verò magis adversatur, quàm ut metu omnia Principibus cedas, nullâ honesti ratione? non placent Deo, & ideò nec succedunt turpia consilia. Est insigne in rem nostram Alexandri III. Responsum, cùm enim metu schismatis, & ferè paribus minis ad indigna urgeretur, quibus nunc Galli, Legatis Friderici Imperatoris ita respondit: (a) *Nos recognoscimus Dominum Imperatorem Advocatum & specialem sacrosanctæ Romanæ Ecclesiæ Defensorem. Unde ipsum (si per eum non steterit) præ cæteris Principibus Orbis intendimus honorare, in*

D 4

qui-

(a) *Radevicus l. 2. c. 54. & 55. An-*

quibus Regis Regum honor nullum capiat detrimentum. Ubi verò quidquam occurrat, quod absq̃ summi Regis offensa effectum habere nequeat; si honorandus terra Imperator videtur, ille potius à nobis timeatur, & illius honor imprimis conservetur, qui est Rex Regum, & Dominus Dominantium, & qui animam & corpus perdere, atque in eternam ignis gehennam mittere potest, ergo cùm pro Ecclesia libertate tuenda Patres nostri proprium sanguinem fuderint, & nos ad eorum exempla, exigente necessitatis articulo, extrema audemus pericula sustinere. Frustrà ergo Galli metum offendendi Regis Innocentio objiciunt; quando in causa DEI nihil æquè metuendum est, quàm metuisse.

VIII. Tertiò causatur Anonymus: (a) Romam esse totius Orbis Christiani Patriam communem; sicq̃ oportere, ut illic omnium Principum Catholicorum Legati conveniant. Equum non esse, ut Legatis Gallici Regis Asylī prerogativam invideant Itali, quando ipsi majorem partem occupent
sacri

*sacri Senatûs; cùm tamen & mos Ecclesiæ
& ratio velit, ut absque Personarum au,
nationum discrimine purpura dignissimis
obveniat, quæ nunc aliis exclusis solos fere
Italos vestiat.*

R. Si Roma omnium nationum com-
munis est Patria, quid queritur Lavardi-
nus, si eodem jure, quo omnium aliarum
nationum Legati, habitus est? nec enim
alii Principum Legati admissi sunt, quàm
qui Asylo cessare: vivat ergo Lavardinus
in communi Patria communi jure; quod
si nolit, non illum Innocentius, sed ipse
se Româ exclusit. Alioquin quid scele-
rum civibus non liceat, si qualescunque
sint, & quacunque ratione vivant, to-
lerari in Patria debeant? & planè cum
nuper Lavardinus Romam ingressus est:
non Civis faciem, sed hostis ostendit,
nec tam Patriam intrasse, quàm in
aciem irrupisse visus est. Quod de
Cardinalibus dicitur, nihil pertinet ad
causam Lavardini. Oportere Cardi-
nales, aliquos deligi ex omni natione,

verum est, idque insigniter in ultima Cardinalium promotione ab Innocentio observatum, in qua non Galliæ, non Hispaniæ, non Germaniæ, non Italiæ purpura defuit: cæterum debere ex quavis natione pares numero esse, tam absurdum est, ut nihil magis; quid enim in eligendo Pontifice magis schisma pareretur, quàm si singulis nationum par numerus votorum esset? singulæ videlicet pontificem ex suis vellent, Galli Gallum, Hispani Hispanum, nullo certandi fine. Idque palàm apparuit in magno schismate Occidentis, cui initium dedit electio Urbani VI. cùm enim Itali Italum vellent, Galli Gallum, & inter Gallos Lemovicenses Lemovicensem; tandem ingens illud schisma conflatum, quo nullum nec longius, nec funestius Ecclesiæ. Idem ergo accideret, si quælibet natio pluribus Purpuratis abundaret, & nulla aliam numero vinceret. Sed cur Italica vincit? inanis quæstio. Idem enim de Gallica, Germanica, Hispanica aliisq; quæri posset, si quæ superaret. Deinde cùm
Chri-

Christus Cathedram in Italia fixerit, credi debet hanc nationem, sive Pontificem spectes, sive Cardinales (ex quibus Pontifex eligitur) prætulisse. Id quoque ostendit usus Ecclesiæ etiam Primitivæ, in qua pleriquè ex Italia Pontifices. Sed ut dixi, hæc extra chorum; nec ego memorâssem, nisi cogerent Galli intempestivâ quæstione.

IX. Quartò opponit: (a) *Merita Gallie Regum in Ecclesiam Romanam; quæ majorem Principatûs sui temporalis partem à Regibus Gallie acceperit: nec securior portus Navicula Petri, quoties tempestate jactaretur, quàm in Gallie sinu: non ergo Lavardinus Regis Legatus tam malè accipi debuit, hoc præsertim tempore, quo Gallia ab Hæresibus purgata, Romana Ecclesia restituta est.*

R. Nulla Gallis frequentior cantilena, quàm ut beneficia sua repetant, mo-
neantq; Pontificem gratitudinis, perinde ac si cum immemore beneficiorum, aut non curante loquerentur. Maxima

D 6

esse,

(a) *Fol. 2.*

esse, quæ Gallia Reges in Pontifices contulerunt, nemo negaverit, nec alius magis agnovit, palamq; professus est, ut ipse Pontifex Romanus. Sed hæc ipsa præteritorum memoria spem omnibus facit, hodiernum Gallia Regem nihil Majoribus suis cessurum, nec illis ut victoriis, ita Religione imparem fore: nec enim ideò illi minores, quia reverentiâ & obsequio in Vicarium Christi certârunt, imò illi magis florûere, quî magis Romam venerati sunt, ut exempla Clodovæi, Pipini, Caroli Magni, ac Ludovicî ostendunt, DEO velut pro Vicario suo debitore, ac ingentibus præmiis, quidquid illi præstaretur, compensante. Ergo, ut dixi, quæ à Gallia Regibus olim in Ecclesiam Romanam collata sunt, exempla esse debent moderno Regi, quæ imitetur, non quæ subvertat: alioquin quàm non indigna tantùm, verùm etiam quàm inepta erit hæc consequentia: *Reges Gallia olim Romam Pontificibus donârunt, ergo hodie eam Pontifici rapere possunt; olim Pontifices protexere, ergo hodie persequi debent.*

Et

Et tamen, quis crederet? sic Galli hodie argumentantur. Cæterùm ipsi quoque Pontifices nec tam ingrati, aut immeriti sunt, quàm Galli supponunt. Patiantur ea tantùm leviter tangi, quæ in Galliam collata sunt, videbuntq; utrinq; beneficiis certatum esse, nec adhuc constare, Roma an Gallia superaverit.

Et primò certum est, veram Catholicamq; Religionem Galliæ illatam esse operâ ac curâ primi post Christum Romani Pontificis, Petri videlicet, ut enim taceam, quæ de sanctis Martiali & Dionysio Areopagita Galli ipsi, qui etiâ maximè Critici, fatentur: Zosim⁹ ad Galliæ Episcopos ita scribit: (a) *Ad urbem Arelatensem primùm ex hac sede Trophimum summus, Antistes, ex cujus fonte tota Galliæ fidei rivulos acceperunt, directus est.* Idem habet Ado (b) Viennensis.

D 7

Ipsi

(a) Zosimus ep. 5. ad Galliæ Episc.

(b) Ado Viennens. in Mart. 4. Cal. Januar. V. Quenellium tom. 2. Opera S. Leon. & P. Alex. natal. ad sæcul. 1. Anno 450.

Ipsi Episcopi Provinciæ Viennensis epistolâ ad Leonem I. *Omnibus Gallicanis Ecclesiis notum est, quòd prima inter Gallias Arelatensis Civitas missum à Beatissimo Petro Apostolo sanctum Trophimum habere meruit Sacerdotem, exinde aliis paulatim Regionibus Galliarum bonum fidei & Religionis infusum.* In Concilio quoq; Parisiensi sub Ludovico Pio Episcopi Galliæ ad Eugenium II. Pont. Max. ita scribunt: (a) *Nec vobis tedium fiat, si se paulò longius sermo protraxerit, dummodo linea veritatis, quæ ab antiquis Patribus nostris usque ad nos inflexibiliter ducta est, B. Dionysio sc. qui à S. Clemente in Gallias cum duodenario nostro primus Predicator directus, &c.* Gallia erga Religionem suam Romæ debet, & quod possit beneficium cum isto comparari? considerent, quantum Gallia fidelis ab infideli distet, nec solùm Religione, sed etiam potentiâ, fælicitate, virtute bellicâ, artibus, scientiisque litterarum præcellat, & fonti benedicant, à quo hæc omnia

omnia fluxêre. *Gregorius II.* Carolo Martello Consulatum Romanum defert, ut habetur in *Historia Gregorij* (a) *Turonensis*. *Stephanus Papa* Pipino Patriatum Romanum, primam videlicet post Imperatoriam dignitatem, & quàm Carolus non priùs deposuit, quàm imperio potiretur, ut etiam *Marca* (b) fateatur.

Zacharias Pontifex eundem Pipinum Regno Francico præponi curat exauctoratâ Merovingica stirpe, quo nullum beneficium Gallia majus accepit; ab hoc enim prima exordia processerunt ingentis illius potentiæ, & alioquin pessumibat civilibus bellis, ignaviaq; Regum consumpta.

Idem *Zacharias* Pipino facultatem tribuit nominandi Episcopos sui Regni, ut scribit *Lupus* (c) *Ferrariensis*.

Leo

(a) *Append. ad Histor. Gregor. Turon. c. 110.*

(b) *Marcal. 1. de concord. c. 12. n. 4.*

(c) *Lupus Ferrar. epist. 71.*

Leo III. Româ in Gallias & in castra proficiscitur, ut Ludovicum, fratresq; in acie congressuros componat.

Idem Gregorius cùm in pleno Gallorum Antistitum Concilio Ludovico imperium ademptum esset, Decretum rescindit, & Ludovico imperium confirmat, teste Paulo Æmilio. *Joannes VIII.*

Ludovicum II. auctoritate suâ contra Al-dagisum tuetur, eumquè à persequendo Imperatore (quem carceri incluserat) absterret, in fugam vertit, ac tandem pacem inter utrumquè conciliat. *Stephanus*

IX. Francorum Proceribus contra Ludovicum Regem defectionem molientibus sub pœna excommunicationis præcipit, ut novis absistant, illiquè continuò pareant, teste Flodoardo. *Urbanus IV.*

Regnum Siciliae, quod ad sacram sedem devolutum fuerat, Carolo Andegavensi fratri S. Ludovici defert, ac Regem Angliæ efficacissimè urget, ut adornatâ classe liberando Galliae Regi à Barbaris capto se accingat. *Clemens IV.* Carolum Andegavensem in possessionem utriusquè

Sici-

Siciliæ (quæ Regnum Neapolitanum complectebatur) inducit , quâ Galli feptendecim circiter annis gavifi funt , nec Siciliæ Infulis excidiffent , nifi Caroli focordiâ.

Gregorius X. Philippo Regi sexennales Cleri Gallicani decimas concedit bello contra Barbaros profequendo.

Martinus IV. Panormitanos obcafos immani conjuratione Gallos anathematè percellit , mittitquè Cardinalem Sabinenfem ad revocandam in Galli obfequium Siciliam. Idem Martinus Principatum Cataloniae , Arragoniae , & Valentiae Regna Petro Arragoniae Regi adempta , in unum è Philippi III. Galliae Regis filijs , Carolum videlicet Valesium transfert , eiquè triennales Cleri decimas concedit , habitoq; celeberrimo omnium Ordinum Conventu parifijs , è Pontificis manu Regna confestim acceptata. *Bonifacius VIII.* Carolum Valesium Philippi Pulchri fratrem Anagninae cum Conjuge magno apparatu excipit , univerfae Ditionis Ecclefiafticae

Præ-

Præfectum, Imperiiquè (quod vacabat) Vicarium constituit, ac utrique Imperio Orientis & Occidentis præficiendum destinat, de quo vide Spondanum *ad annum 1301. n. 2.*

Idem Bonifacius Adolphum Imperatorem Principibus Germaniæ in eum concitatis moratur, ne cum Angliæ Rege Gallorum hoste arma in Belgio conjungat, quod planè Francico imperio fatale futurum erat.

S. Ludovicum Catalogo Divorum adscribit. Scio equidem quæ postea inter Bonifacium & Philippum Regem contingerant, oblivione magis quàm memoriâ digna. Sed nec illud melatet, tres illius filios paulò post immaturo funere sublato: *In pœnam*, (uti scribit (a) S. Antoninus) *injuriæ & sacrilegij, quod eorum Pater in Bonifacium commiserat.*

Benedictus XI. Regnum Galliæ interdicto liberat, Regem Philippum supplicentem absolvit, omnia privilegia confirmat, Academiâs Galliæ juribus suis restituit,

(a) *Antonin. 3. p. tit. 21. c. 3.*

stituit, reservationes vacantium Ecclesiarum revocat, contributiones Decimarum, Bonorum Ecclesiasticorum, ubi Laicorum facultates non sufficiunt, Regi Philippo relinquit, & in ejus gratiam Columnenses veniâ donat, totamquè familiam in integrum restituit, Petro Cardinali excepto, cui Clemens V. purpuram à Bonifacio VIII. ademptam restituit, de quibus vide Spondanum ad annum 1303. n. 20. *Clemens V.* inquit Spondanus, *in gratiam Philippi Regis Pontificiam sedem in Gallias transfert perculso ad facinus Christiano Orbe, mansitq; illic amplius septuaginta annos.* Nolo hîc commemorare septuaginta annorum decursus quibus pontifices in Gallia hæserunt, quæ & quanta in Galliæ Reges contulerint. *Pius VI.* in celebri de præcedentia certamine pro Gallia pronuntiat, nullo metu potentia Hispanicæ (quæ regnante Philippo II. multò Gallicam superabat) nullâque minarum curâ, quas Philippus ingesserat, jussu Oratore suo Româ abscedere. *Pius V.* Carolo IX. Galliæ Regi contra Hugonotos

nottos rebelles quatuor mille & quadringentos pedites, ac equites nongentros throno simul & religioni servandæ in subsidium mittit. *Clemens VIII.* obnitente licet Hispanicâ factione ac infinita opponente (minabantur enim pro uno Galliæ Regno alia multa à Pontifice defectura) Henricum IV. ab Hæresi absolvit; quo factò, causæ omnium Civilium bellorum in Gallia conciderunt, firmatumquè Regnum familiæ Borbonicæ hodie regnanti: dici non potest, quanta morando, terrendoquè Pontifici producta fuerint; sed vicit amor Galliæ felicissimo eventu. Idem Clemens superatis immensis difficultatibus matrimonium Henrici IV. cum Margaretha Vallesæ (quam ante annos septem & viginti ex Pontificia dispensatione duxerat) nullum esse declaravit, permisitquè nuptias cum Maria Medicea, ex qua Ludovicum XIII. & ex hoc Ludovicum XIV. hodie regnantem habemus; alioquin exaruerat familia Regia sterili Margarithæ Coniugio, ac Gallica corona in Condeum Prin-

Principem conciderat adolescentulum, ac in hæreticorum finu educatum, & quem tamen Clemens Religioni Catholice restituit; nam inter conditiones datæ à Clemente absolutionis hæc inter præcipuas fuit, ut videlicet Henricus Condeum Principem Calvinistarum manibus eriperet, eumq; Catholicis doctrinis imbuendum curaret. Clementi ergo Pontifici Gallia & Regnum, & Reges, & Religionem debet. Taceo alia quàm plurima, ac præsertim innumeras Romanorum Pontificum Legationes pro pace Gallico imperio reddenda, præcipuè cum Angli perpetui ac fatales hostes Gallie imminerent. Taceo infinitam privilegiorum molem, quibus nulla æquè natio, ut Gallicana à Summis Pontificibus exornata est. Nam ut observat Mar- ca Archiepiscopus in libello Barcinonæ edito anno 1646. *Quidquid contra canonum decretalium mentem in Gallia circa res Ecclesiasticas agitur, id fit ex privilegijs Apostolicis, non autem mero jure Regio.*

Id

Id solùm obſervo, in Hiſtoria Francica
 ter reperiri, Regnum Galliæ auctoritate,
 ac operâ ſummorum Pontificum ſerva-
 tum eſſe. *Primò* quando ignaviâ Mero-
 vingorum, belliſq; Civilibus ferè dele-
 tum, auctoritate Stephani & Zachariæ
 Pontificum in Carolinam ſtirpem trans-
 latum eſt: *Hildericus Rex*, inquit Egin-
 hardus Carolo M. à ſecretis, *jūſſu Step-
 hani Romani Pontificis depoſitus, ac deſonſus,*
atque in Monasterium truſus eſt: Et infrà:
Pipinus autem per auctoritatem Summī
Pontificis ex Præſectō Palatij Rex conſtitu-
tus. *Secundo*, quando teſte Ludovico
 Pio Caroli M. filio, *Francorum Proceres*
auctoritate B. Petri ſibi à Domino JEſu
Chriſto traditâ obligavit, & obteſtatus eſt,
ut nunquam de altera ſtirpe Regem ſupra
ſe præſumant aliquo modo conſtituere, quos
& Divina Providentia ad Apoſtolicam Se-
dem tuendam eligere dignata eſt. Hæc
 ſunt verba ipſius Ludovici in epiſtola
 ad Hilduinum: quibus adjungit Gagu-
 nus: (a) *Stephanus autem Pipino bene-*
dixit,

(a) *Gaguin. Hiſtor. Franc. l. 3. f. 45.*

dixit, & ejus posteritati, atq; qui temeritate aliquâ adversus Francos bella moverent, Communione Christianâ interdixit. Tertiò, quando Clemens VIII. Galliam bellis Cîvilibus (quæ hæresis & ambitio excitaverant, externis armis Germanorum, Anglorum, Hispanorum, Italorumquè Regno illatis) propè confectam, quæquè triginta & sex annorum decursu, ab obitu videlicet Henrici II. usque ad absolutum Henricum IV. producta, Galliæ extrema minabantur, nec finem spondebant; tandem paci, pristinaq; dignitati restituit, Henrico Censuris absoluto, ac sterili Matrimonio post viginti & septem annos liberato. Cùm ergo Gallia & Religionem, & toties Regnum Vaticano debeat, persuaderi se utique Lavardinus patietur, Beneficia, quæ Romanis Pontificibus ex Gallia provenisse dicit, non fuisse in immeritos collocata, multò minùs in ingratos; neque ego hoc dicerem, nisi necessitas cogeret objectam ingratitude diluendi.

Sed sint beneficia à Gallis accepta adhuc insoluta, sint Pontifices immeriti (quanquam quid Pontifices dico, cum non istis sed Christo sint data, & ab hoc immensis præmijs & victorijs compensata?) num ideo debuit Innocentius concedere, quæ non licuit Ludovico postulare? petitur patrimonium Christi, petitur hæreditas Petri, petitur in urbe sancta ingens sceleribus omnibus spatium, in quo velut in libero, exemptoque imperio & impunita, & secuta sint, imò & florentia, magisq; patrocinio Christianissimi Regis, quàm in ipsis Templis Majestate præsentis Dei defensa, perinde ac si Romæ Ecclesiæ desint recipiendis, & ad poenitentiam revocandis reis. petitur denique, quod omnibus Regibus ac Principibus negatum, non potest jam Galliæ concedi, nisi omnibus illis acerbè offensis, ac dimissa repetituris, infinito Apostolicæ Sedis dedecore, pariq; damno, quippe totâ ferè Româ in Asylum imò in Babylonem conversâ. Infelicem Innocentium, qui aut cum Christo, aut

cum

cum Gallo pacem habere non poteft: nam aut hunc offendit, fi neget; aut illum, fi concedat: nemini plura & majora, quàm ipfi Deo debemus, & tamen is non permittit *feri mala, ut eveniant bona*; quantò ergo minus poteft Innocentius malum facere, ut bona remuneretur à Gallis accepta? quantum verò malum fit grande illud, vastiumq; Afylum, quòd non Regis ipsius còmodo, sed sceleratis, parricidis, Latronibus, & adulteris petitur, non est Regis judicare sed Pontificis; nec enim de Parisiensi, sed de Romana urbe agitur Pontifici subdita. Quòd si nunquam Rex pateretur litem sibi moveri de iis, quæ ipse Parisiis judicat, quæ ratio permittit, ut litem Pontifici moveat de ijs, quæ Romæ disposuit? quamquam ne opus quidem est in hac causa Pontificis judicio aliquid deferre, quando totius Europæ judicium habemus; nam præter Gallorum aliquos metu aut gratiâ aulæ obstrictos nemo mortalium est, qui non credat æquissimam esse Pontificis causam; & ideò Reges ac Principes omnes

E

prom-

promptissimè Asylo cessère ; nec verò cessissent , nisi crederent iusta postulari, & tamen eodem jure, iisdemq; rationibus, quibus Galliæ Rex, retinere illud poterant. Si Innocentius solum Galliæ Legatum Asyli jure privâisset, poterat id injuriæ, odioq; nationis adscribi, ac meritò iram Regiam provocare; nunc verò omnibus Regibus, omnibus Principibus eadem Lex dicta, omnesq; justam censuere : quæ rogo ratio est, ut solis Gallis displiceat, quod omnibus placuit ? & quod aliis omnibus necessitas visa est, illi soli injuriam credant ? ac præsertim à Pontifice tam sancto, tam humanis affectibus vacuo, tam studioso Gallicæ Nationis, & in quo ne Calvinistæ quidem, jurati aliquin Pontifici hostes, aliquid invenere non amore, ac veneratione dignum. Sed hoc est unicū Innocentij delictum, quod omnium Sanctorum Antistitum fuit, non posse videlicet adulari cupiditatibus Regnantium ; & tamen non is Medicus ægrotum diligit, qui plagam celat, aut gossipio involvit, ne appareat ;

sed

sed qui ferro etiam igniq; medetur, curâ
dolorem compensante. Quamquam
nec ferrum Innocentius, nec ignem ad-
movit, sed quidquid reverentiæ & amo-
ris in Principem ac filium licuit; monuit,
rogavit, scripsit, instititque: nunc per
Varesium, nunc per Abbatem Laurum,
nunc per Ranuccium Legatum suum, ac
postea Cardinalem preces porrectæ, utq;
hæ magis proficerent, præmissa omnium
Regum, Principumq; exempla Asylo ce-
dentium; quid potuit plus facere Inno-
centius? ut sileret? ut Galliæ postulata
admitteret? ut tam necessarium sanctum-
que propositum metu desereret? hoc
non potuit. Pavere ac fugere non est
Pastoris, sed Mercenarij, quis ergo ali-
quid audeat pro veritate, si Pontifices ti-
meant? & quid faciunt Romæ tot Mar-
tyrum cadavera, tot trophæa & vestigia
sanguine certantium tincta, si ne qui-
dem liceat summo Sacerdotum liberam
vocem pro justitia proferre? nunquam
metus Martyrem fecit. Et quid tandem
non Principes petant, non Pontifices tri-
buant,

buant, si toties cedant, quoties rogantur? non est hoc esse petram, sed paleam: nequè hoc voluit Christus, cùm jussit Petrum esse fundamentum Ecclesiæ. Si Innocentius Pontifex ea tantùm spectaret, quæ Galliæ Regem circumstant, forisq; exoriant, potentiam videlicet, opes, exercitus, classes, & quidquid deniq; speciem illam Majestatis effingit, quam homines adorant, facile persuaderi debuit, ut & hoc concederet, & quidquid aliàs Regi placeret: quid enim tandem intererat Pontificis jam provectâ ætate, & in occasum pronâ, ut pacem pro bello non mallet? sed æstimanti totam illam magnificentiam, quæ foris splendet, mortalem & caducam esse, nec aliud post brevissimas annorum periodos (quamvis ego longissimas cupiam) de Magno illo Ludovico superfuturum, quàm frigidum cinerem, animamquè immortalem, & hanc non regio apparatu, non exercitibus, sed boni tantùm, malisvè operibus septam, tantoq; periculo viciniorem, quantò gravioribus rationibus obnoxiam: hæc, inquam,

cogitanti Innocentio meritò perfuaderi non potuit, ut ea Regi permetteret, quæ utriusquè conscientiam onerarent; nec utique dolere Regi debuit, fi inter tam multos, qui illius animam in mortis æternæ discrimen adducunt, unus faltem Romæ effet, qui illam totis viribus curaret, retineretquè præcipitio vicinam; enimverò cùm mundanarum rerum ftrepitus ceffaverint, qui modo Regium animum occupant, cumq; in Comitiiis totius generis humani Divino Tribunali affistemus, ceffabuntque dulces illæ, fed fallaces adulantium cantilenæ, tunc, inquam, agnofcet Ludovicus Rex, fideliora fuerint Innocentij confilia, nunc quidem ingrata fuadentis, fed tamen falubria ac neceffaria; an illorum, qui prætextu proferendæ Regiæ auctoritatis fibi gratiam & præmia quærunt, Regi verò ingens animæ periculum, feramq; factorum pœnitentiam.

At non debuit tanti Regis Legatus accessu ad Pontificem prohiberi, quando Rex pro-
E 3 *ferendæ*

*ferendæ Religioni Catholica tanto conatu
successuquè laborat.*

Respondeo, multò minus debuisse Ro-
manum Pontificem, quo tempore tot cu-
ris, tot victoriis, tot Legationibus, tanta-
què auri profusione evertendo Turcico
Imperio, ac Religioni Christianæ per to-
tum Orientem amplificandæ laborat,
domi forisq; à Gallis turbari. Compa-
rentur, quæ Ludovicus contra hæreticos
in Gallia, quæque Innocentius in Austria,
Hungaria, Græcia, & Peloponneso fecit,
quæq; deinceps, nisi Galli prohibeant, in
Europa, Asiaq; factururus est, videbunt ac
fateri cogentur, nihil Innocentium Lu-
dovico cessisse, & quod iste contra Cal-
vinistas edictis, illum consiliis, armis, au-
ro, precibusquè apud Deum contra Tur-
cas præstitisse, hoc solum discrimine,
quòd Ludovicus unam, inermemq; Pro-
vinciam, nec ausam resistere, Innocen-
tius tam multas, armatasquè Religioni
subjecit: non ergo decuit tam glorio-
sum Pontificem, tamq; de re Christiana
præclarè meritū eo ipso tempore à Chri-
stia-

istianissimo Rege, filioq; Ecclesiæ primogenito, quo evertendæ Ottomannicæ impietati tam anxie ac feliciter laborabat, tam acerba & hostilia pati.

At Legatum non admisit.

At Vos coegistis, ne posset admittere. Cur enim Gallicum Legatum aliis conditionibus, quàm aliorum Principum admitteret? nemo istorum aliter acceptus est, quàm ut Aſylo cederet, & tamen nemo istorum de injuria conqueritur, imò nec queri potest, cum non de Regum, sed Latronum beneficio, commodoque agatur. Quia igitur injuria dici potest, quam nullus Regum pro injuria, pro dedecore habuit? Date locum justitiæ, permittite flagitia puniri, subducite sceleribus patrocinium, eo jure Legati vestri potiantur, quo omnium Regum Legati; liceat domi suæ Pontifici, quod omnibus Regibus, omnibus Principibus licet, & quid dico omnibus Principibus? imò quod omni Prætori, quodq; omni Patri-familias, & sic tandem Romam intrate. Quod si ne hoc quidem conceditis; non

deinceps culpam Pontifici adscribite, re-
 jecti Legati, sed vobis tam honesta recu-
 santibus. Quæ à Rege in expellendis
 Hæreticis peracta, magna utique & in-
 gentia sunt, ac spem omnem superantia,
 sed quanto pretio compensata? Revo-
 centur in memoriam infinita mala, quæ
 Calviniana hæresis Galliæ invexit, adeò
 ut propè fuerit Monarchiam in Rem-
 publicam, Reges in Consules mutari; &
 fateri cogentur plus Regni interfuisse,
 quàm Religionis, has faces extinguere, ne
 iterùm Galliam incenderent. Taceo in-
 finitos Thesauros ex proscriptorum bo-
 nis, neque hæc memoro, quasi elevare
 velim, quæ à Rege præclarè sunt gesta,
 sed solùm ut ostendam, præmio non ca-
 ruisse. Deinde si bonum, quod ex pur-
 gata Gallia provenit, cum malis compa-
 retur, quæ ex contemptu Pontificis, ejusq;
 factis, scriptisque laceratâ auctoritate
 proveniunt, hæc multò majora; nam in
 totam Ecclesiam redundant, & commu-
 ni defectioni viam aperiunt, eratque mi-
 nus malum, hæresin in una Gallia tole-
 rari,

rari, quàm tam perniciosis exemplis, doctrinisquè totam Europam inficere, ac periculo exponere amittendæ Religioni; hæc nunquam stetit dejecto Pontifice; atque ut nulla hæresis fuit non Romæ inimica, ita nisi hujus societate nunquam floruit vera & Catholica Religio; quæ igitur gratia, ramos coluisse percussâ radice?

X. Quintò: (a) *Ignoratam fuisse, dicit, Lavardino Pontificis Romani Bullam.*

R. Ego Marchioni Lavardino tanto videlicet viro, tantique Regis Ministro nihil non credam, si ita jusserit, fidemquæ exegerit. Cæterùm negari non potest, difficile id creditu esse, ac persuaderi hominibus vix posse. Quomodo enim latere illum potuit, de quo totus Orbis, ac Gallia imprimis tanto tempore, tantoquæ strepitu loquebatur? De quo cum Ranuccio Cardinali, Legatoquæ Pontificis Lavardinus sermonem habuerat? cui tot Cardinales subscripserunt? Quam Romæ affixâ, & in omnium manibus viderat? De qua

E 5 loquen-

loquentem, scribentemq; Cardinalem
 Estreum audierat, videratque; & deni-
 que cujus effectum jam senserat, quando
 sanctæ Luciae festum differri iussit, ne, si
 templum intraret, continuò sacra cum
 dedecore abrumpi videret. Si hæc tam
 clara, tam nota, & ubique locorum vul-
 gata ignorari poterant, nescio quid non
 possit.

Sed quoniam Marchioni Lavardino
 placuit ignorantiam prætexere, creda-
 mus ignorasse; at non ideò effectum ex-
 communicationis morari potuit. Quis
 enim nescit, non tantùm toto humano
 & Divino jure, sed etiam toto Orbe &
 omnibus Principum Tribunalibus nemi-
 nem excusari *ignorantiâ juris* clari, vul-
 gatique? Si Parisiis duello aliquis con-
 fligat, allegetque ignorantiam edicti Re-
 gij, quo duella prohibentur, num poenam
 effugiet? Cùm ergo Bulla Innocentij
 non in angulis, non in latebris scripta,
 nec domi retenta, sed totâ urbe pepen-
 derit, nec Tabellionis tantùm manu, sed
 ipsius Pontificis, ac triginta & suprâ Car-
 dina-

dinalium calamo subscripta, ac septimo jam mense typis impressa, planè aut non potuit ignorari, aut non debuit, præsertim à Regio Ministro omnium arcanorum conscio, quantò magis omnium vulgatorum? Sed ignoraverit Lavardinus, ac etiam veniam ignorantia demus; quæro an si ergo Bullam compertam haberes, morem illi gereret, aut non gereret? si non gereret, frustrà ignorantia se purgat, quando etiam sciens, volensquè paratus est obsequium negare: si morem gereret, ergo jam saltem obtemperet, quando inficiari non potest, sibi de voluntate edictoquè Pontificis constare; nihil ergo excusando, liberandoquè Lavardino proficere ignorantia potest tot nominibus invalida.

At Bulla Innocentij in Gallis promulgata non est?

R. Nihil dici potest Gallis humanius, veniusquè, etiam cum lædunt, quippe osculum plagæ præmittunt. Romam Legatus ibit Pontifice invito: urbem armatus invehetur, bellanti simili-

lis ac velut cum hoste congressurus: magnam urbis partem armis implebit dominantis more, & publicum Asilum contra Principis edictum flagitiis aperiet, non tantum ut tuta sint, verum etiam, ut insultent prohibenti: Palatium, totamque viciniam excubiis, vigiliis, circitoribus occupabit, perinde ut fieri solet in arce armis expugnata, terraque hostili; & hæc omnia Principe coram, nec aliis armis quam precibus pugnante: Ecclesias quoque perrumpet, sacrisque cum fastu, contemptuque assistet nullâ Vicarii Christi, nullâ Censurarum reverentiâ. Hæc omnia faciet, & cum causam rogatus fuerit tanti contemptus tantæque injuriæ, respondebit: *Bullas Innocentij in Gallis non esse promulgatas.* Quid si ergo essent promulgatæ, num ideò Lavardin⁹ his omnib⁹ abstineret? Cur ergo promulgatio prætextitur, cum nihil eam Galli morentur? finge nullas omninò Bullas esse, num ideò Lavardino licebit jus Gentium violare, alienum solum hostiliter ingredi, armisque occupare? & denique omnibus
parri-

parricidis, adulteris, perduellibus, ſce-
ratisq; non libertatem tantum, verum
etiam ſtimulos delinquendi addere im-
punitate propoſita? planè nullis Bullis
opus eſt, nullaquè promulgatione, ut iſta
non liceant. Sufficiant edicta naturæ, Le-
gesq; Evangelij, ut Lavardinus intelligat:
*Quod ſibi quis non vult fieri, alteri ne fa-
ciat. Qui Pastorem Eccleſiæ audit, Deum
audire, qui illum ſpernit, Deum ſpernere;
& quæcunque Vicarius Chriſti ligat ſuper
terram, eſſe etiam ligata in Cælis.*

Hæc tam clara ſunt, ut neminem late-
ant, poſſintq; à nullo negari; niſi fortè
quis dicat legem Evangelij, legemq; na-
turæ Pariſiis promulgata non eſſe. De-
inde quale illud eſt, ut oporteat Bullas,
quæ Romæ fieri aliquid prohibent, eti-
am Pariſiis promulgari? Quoties Legatī
Pontificij, aliorumquè Principum juſſi
ſunt regno excedere, aut armatis cu-
ſtodiri, aut aurum Galliæ non efferre,
aut peregrinas merces damno Regionum
Vectigaliū non vānum proponere; num
propterea aut Romæ, aut in Hiſpania
E 7 diplo-

diploma, quo ista vertabantur, propositum est? & cum nuper Legati Moscovitici, qui magnam vim pelliū Galliaē intulerant, jussi sint, aut Mercatu aut Regno abstinere, num inquam, prius hoc edictum Moscoviaē pependit? Cur ergo à Romano Pontifice petitur, quod à nullo Principum? nisi fortè, quia Christi Vicarius est, peiori illum conditione damnamus. Cum ergo Lavardinus Romæ esset, cum Romæ deliquisset, debuit quoque suffecitque Romæ puniri, & illic pœnas dare, ubi pacem publicam, ubi jus Gentium, ubi Ecclesiam, Principemque offenderat. *Nec obstat, Legibus loci Legatum non teneri: Quia, ut Politici scribunt, Principalem representat nemini subditum*; id enim verum sit de legibus pœnisque temporalibus, non verò de pœnis spiritualibus, in quibus ratio cessat, cum nemo in rebus conscientiam spectantibus negare possit, se Pontifici subiectum esse. Nec poterat character, dignitasque Legati Lavardinum tueri, quem pontifex nunquam pro Legato habuit, recepitvè: cum enim Legatus sit à Principe ad Principem,

contra Apologiftam Lavardini. III
cipem, & mutuo pacto mittentis ac recipientis conftituatur, non potuit, nifi utriusquè principis confenfu Legatus dici, funtque infinita cum noftri, tum antiqui temporis exempla. Scio equidem multa effe, quæ Galli Bullis pontificiis eludendis obijciant, fed nec illud me latet, à Gallia Regibus regnantis Monarchæ Antecessoribus, & à Gallia prælatis fumma hæcenus veneratione exceptas effe,

Carolus Magnus, quo nemo potentia, victoriis, fortunâ major in fuis Capitularibus: (a) *In memoriam B. Petri Apostoli honoremus factam Romanam & Apostolicam Sedem, ut, qua nobis Sacerdotalis est Mater dignitatis, effe debeat Magistra Ecclesiasticæ rationis. Quare servanda est cum mansuetudine humilitas, & licet vix ferendum ab illa sancta sede imponatur jugum, feramus, & piâ devotione toleremus. Si verò quilibet aliquam perturbationem machinando & nostro ministerio insidiando redarguatur falsam ab Apostolica Sede detulisse epistolam, salvâ fide & integrâ humilitate*

(a) Ivo Carnot. in Decr. p. 5. c. 50. & habetur in Concilio Tribur. c. 30.

litate penes Episcopum sit potestas, utrum
eum in carcerem detrudat, usq; quò per epi-
stolam aut per idoneos Legatos Apostolicam
interpellet sanctitatem, ut potissimum suâ
sanctâ Legatione dignetur decernere, &c.

Ludovicus Caroli Magni filius jam mo-
riturus ita filios Reges alloquitur: (a) Ju-
beamus atque precipimus super omnia, ut de-
finitionem Ecclesie S. Petri simul suscipiant,
sicut quondam à proavo nostro Carolo & avo
nostro Pipino, & beata memorie Genitore
nostro Carolo Imperatore, & à nobis postea
suscepta est, ut etiam cum DEI adjutorio ab
hostibus defendere nitantur & justitiam
suam, quantum ad eos pertinet, ac ratio po-
stulaverit, habere faciant, &c. Quæ autem
major, magisq; necessaria Justitia, quàm
ut Pontifici de rebus sacris imperanti,
suamq; Jurisdictionem vi occupatam tu-
enti fideles obtemperent?

Sanctus quoque Ludovicus inter alia
monita, quæ Philippo filio moriturus re-
liquit:

(a) *Apud Pithaum & Spondan.*
ad ann. 838.

liquit: *Sis devotus & obediens Matri nostra Romana Ecclesia, & Summo Pontifici tamquam Patri spirituali.*

Ipsi Galliæ Episcopi, quando consecrantur, hoc se juramento obstringunt: *Decreta, Ordinationes, sententias & mandata Apostolica totis viribus observabo, & faciam ab aliis humiliter observari..... mandata Apostolica humiliter recipiam, & quàm diligentissimè obsequar.*

S. Bernardus præclarissimum Ecclesiæ Gallicanæ lumen aliquorum objectionem præveniens: (a) *Sed dicit aliquis debitam Pontifici reverentiam exhibeto & nihil amplius; esto, fac quod dicis? quòd si exhibeas debitam & plenā, plenitudo siquidem potestatis super universas Orbis Ecclesias singulari prerogativa Apostolica Sedi donata est, qui igitur huic potestati resistit, Dei ordinationi resistit.* Hæc quondam Regum Prælatorumq; Galliæ sententia fuit, possetq; infinitis exemplis confirmari, si vellem toties jam dicta & libris vulgata repetere. A quib⁹ quantum distet

Lavar-

(a) *S. Bernardus Ep. 131.*

Lavardini exceptio promulgationem causantis, nemo non videt. Prohibent Romana Diplomata Galliæ inferri, prohibent recipi; & postea causantur, non esse recepta, non esse vulgata, non esse nota, hoc nimirum Carolus Magnus voluit, hoc Ludovici, hoc Bernardus, hoc ipsi Episcopi jurârunt, cùm Sacramento polliciti sunt: *Totis viribus Apostolica mandata recipere, & quàm diligentissimè exequi.* Quamquam frustrâ consumor rebus probandis tam clavis, tamq; indubitatis, quæq; jam dudum ipsi Lavardino perspecta sunt viro tantâ rerum experientiâ claro: sed maluit aliquid dicere, quodcunque illud esset, quàm seipsum silentio damnare more Athletarum etiam in casu luctantium; idque præclarè quidem, si lusus, non res seria ageretur; aut lucta cum alio adversario, quàm cum veritate & justitia esset.

XI. *Sextò*, addit Anonymus: (a) *Lavardinum sine forma, sine causa, sine ratione, non auditum, non defensum, Roma, pro Excommunicato declaratum esse.*

(a) *Fol. 3.*

R. Gal-

R. Gallis nihil videtur, quidquid Lavardinus Romæ deliquit; at aliud non tantum Pontificis Romani, sed etiam totius Europæ judicium est. Si ergo causa quæritur, ob quam excommunicari meruit, dico non unam, sed plures, imò gravissimas fuisse; videlicet, quòd contra Pontificis Bullam sub pœna excommunicationis latæ sententiæ, ipsoq; facto incurrendæ, jus Asyli, & Quarteriorum, ut vocant, usurpaverit; quòd non minimam urbis Romanæ partem armis occupaverit, armisq; retinuerit: quòd contra omne jus Gentium non Legati, sed hostis & bellatoris more urbem inVectus sit, Principe coràm, ac magno publicæ quietis periculo: quòd Palatio & vicinæ regioni excubias, circitores, armatosque cum tessera militari circumfuderit, id quod nullibi terrarum, & à nullo Legatorum hætenùs factum, solique Principi licet: quòd Julii III. Pii IV. Gregorii XIII. aliorumque pontificum Bullis crimine læsæ Majestatis se obstrinxerit: quòd publicanos & principis vectigalia non

Principis Vestigalia non paucis millibus fraudaverit, solvique prohibuerit. Præsertim verò quòd ingenti urbis offensione ac Religionis contemptu sacra profanaverit, idquè tanto fastu tantaq; ostentatione ac derisu supremæ in rebus Ecclesiasticis Pontificum auctoritatis, ut post Attilæ & Alarici ætatem, aut saltem post irruptionem Borbonij nihil simile Roma conspexerit, fueritq; periculum tam perverso exemplo totam urbem, Italianamquè corrumpi. Hoc nulla ætas Lavardino ignoscet; quidquid enim litis cum Pontifice fuerit, non ideò Religio in discrimen vocari, ludibrioq; infidelium exponi debuit. Hæc ergo tam multa & magna, cùm Lavardinus deliquerit, innocenti tamen, & admiranti similis quærit: *Quam ob causam Pontificis indignationem meruerit?* Planè si non dico omnia, sed vel minimum eorum, quæ Romæ peracta sunt, Parisiis ab aliquo Legatorum contigissent, num illum vel momento Rex ferret? Enim verò nunquam Lavardinus præpotentium reorum more

more causam & delictum fatebitur; sed hoc nihil morari Pontificem debuit: iusta enim, an iniusta sit causa, ob quam anathemate punitus est, non Lavardini, sed Orbis terrarum, aliorumq; Regnantium exemplo (qui Asylo cessere) ac præsertim Pontificis iudicio decidendum fuit, qui more aliorum Principum, rerum, urbiumq; suarum solus Iudex & moderator est; tam enim Pontifex Dominus Romæ est, quàm Rex Parisiis. Si ergo nullius Principis Legatum eâ ratione Parisiis Rex pateretur, quâ Lavardinus uti voluit Romæ, nec suarum Legum causas ab aliis, quàm à se uno examinari ferret, quid tandem deliquit Innocentius, quidvè commisit iniusti, si id Romæ fecit, quod Rex Parisiis fecisset?

At excommunicare non debuit?

At mutò minus debuit Lavardinus excommunicationem provocare, imò extorquere. Repetantur enim memoriâ, quæ Romæ peracta sunt, & nemo inficias iverit, ex industria & velut studiosè

studiosè à Gallis curatum esse, ut invito ac tergiversante Pontifice censuras exprimerent. Quæ enim necessitas fuerat, cum constaret de Pontificis voluntate, aliorumquè Regum exemplo Asylo abstinentium, Legatum mittendi (nam Gallicis negotiis Estreus Cardinalis sufficere poterat, imò abundare) urbemquæ armis non militariter tantum, sed hostiliter etiam implendi? nam quòd nec pugnæ, nec cædes contigerint, non humanitas invadentium, sed modestia Pontificis fuit arma prohibentis.

Rursus quid oportebat Lavardinum nocte Nativitati Salvatoris sacrâ tantâ cum pompa, cultuquæ ac apparatu insultantis in Ecclesia comparere, sacrisquæ palam defungi, quæ non ignorabat sibi à Pontifice interdicta? Si tanta, ut inquit, pacis cupido, cur non expectatum? cur Legatio non aliquamdiu dilata, dum mitescerent animi, dumquæ tempus remedia suggereret, aut saltem dum finis Turcico bello imponeretur; quod planè Galli prævidebant ingenti cum damno Religio-

gionis Christianæ abruptum iri, si pergerent, pontificem, Italiamq; turbare. Unde multorum sententia fuit, studiosè à Gallis hanc occasionem captatam esse, ut bello Italiæ illato, aut saltem belli periculo, Italiæ Germaniæq; principes, ac ipsum Imperatorem à Turcis averterent, cogerentq; finem victoriis ponere, ac Imperio Ottomannico jam cadenti requiem, pacemq; concederent, idquè non tam Barbari amore (quod nefas de Christianissimo Rege cogitare) quàm metu Austriacæ potentiæ tot victoriis, tot provinciis auctæ. Sed absit à me credi tam aliena à pietate & magnitudine Ludovici Regis, cui nulla major cura, quàm Religionis, quique alienis damnis non eget, ut crescat, viribus ac potentiâ sua tutus. Illud verum est, & negari non potest, multò gloriosius, utiliùsq; Regiam indignationem in Barbaros Turcasquè, quàm in pontificem conversum iri, cum causæ & injuriæ non desint longè atrociores. Nota sunt, quæ Gallico Oratori Constantinopoli evenère, quando tam indignè

indigné à Turcici Imperii Ministris habitus est, ejectusquè aulâ, mancipii more, & tamen quàm clementer à Gallis dissimulatum? Idem ergo sperari pro Pontifice poterat, præsertim cùm nihil tale Lavardino contigerit, & saltem Innocentii ætas, merita, sanctitas, curæquè delendis Ottomannis tam feliciter impensæ veniam, aut saltem moras aliquas mererentur. Petimus pro Innocentio, quod Turcis spontè concessum.

Quod verò dicitur: *Pro re merè temporali, qualis est immunitas à Gallis præten-
sa, non debuisse Lavardinum excommuni-
cari.* Facile ignosci potest Advocato Lavardini, quippe sacrorum Canonum, Ecclesiasticæ disciplinæ, & idiomatis, quo sancti Patres ab initio florentis Ecclesiæ semper usi sunt, ignaro; isti enim semel Ecclesiæ, Deoque donata non pro rebus merè temporalibus, sed pro rebus sacris, ac Christi patrimonio habuerê, & ideò istorum usurpatio etiam in ipsa Gallicana Ecclesia pro sacrilegio semper habita est, abstineoque exemplis, utpotè
in

in re clara, ac in omnibus sæculis nota. Planè hanc Theologiam ignorârunt antiquæ Ecclesiæ Patres, quando in caufis etiam temporalibus non Reges tantùm, fed Orbis totius Imperatores anathemate perstrinxerunt. Sic Ambrosius Theodofium ob cladem Theffalonicenfem. Sic Stephanus VI. Carolum Magnum, fi nuptias cum Longobarda junxiffet Defiderij filia. Sic Bafileenfe, & Conftantiense Concilia toties à Gallis laudata, & Gallicis Præfulibus plena in caufis merè temporalib⁹ Principes excommunicant, ut videre eft feffionibus 20. 31. 37. & ultimâ. Atque ne Galliis, & argumento, de quo agitur, exeam⁹, placeat ea tantùm audire, quæ Parifienfis & Turonensis Conciliorum Patres in hac caufa decreverunt.

(a) *Placet, inquiunt Parifienfes, ac omnibus convenit, ut quicunq³ res Ecclesiæ injuftè poffidens præfumpferit retinere, ab omnibus Ecclesiis segregatus, à sancta Cõmunionẽ*

F habea-

(a) *Concil. Parif. I. cap. 1. & c. 2.*

Anno 570.

habeatur extraneus, neq³ aliud mereatur remedium, nisi culpam propriam rerum emendatione purgaverit. Indignè enim ad altare Domini properare permittitur, qui res Ecclesiasticas audet rapere, & injustè possidere. Et infrà: Perpetuo anathemate feriatur, qui res Ecclesiæ confiscare, aut conterere, aut pervadere præsumpserit. Nota sanctissimos, præcipuâque doctrinâ huic Concilio interfuisse, quorum princeps S. Germanus Episcopus Parisiensis. Patres Concilij Turonensis II. (a) Inviolabiliter servandum censemus, ut quicumque tam Ecclesiæ, quàm Episcopi res proprias pervadere, competere, vel confiscare præsumpserit, & pertinaciter in pervasione perstiterit, ut verè sit super eum maledictio, quæ super Judam venerit, ut non solum excommunicatus, sed etiam anathema moriatur, & cœlesti gladio fodiatur. En sententiam Gallicanæ Ecclesiæ, tunc videlicet temporis, cùm doctrinâ & sanctitate florebat, ac cùm omni adulatione ac ambitu procul, veritatî, non gratiæ scribebat.

Scio

(a) Concil. Turon. c. 24. Anno 570.

Scio omiffis infinitis aliis hæc duo testimonia fufficere, fi tam facilè Gallia perfuaderi poffet, quàm facilè convinci; fed illud moleftum eft, quòd ratione fuperati ad potentiam, viresquè appellant: nec iftis opponi aliud poteft, quàm Divina protectio, omni tandem humanâ fuperior; hîc Innocentius acquiefcit, paratus experiri, quidquid aut Gallo, aut Deo placuerit; nec enim Innocentij caufa, fed Dei agitur; vincet aut cadet, ut-
cunque Cœlo videbitur.

At citari, moneri, audiriq; prius debuit.

Non ignorat Roma, quid in hujusmodi caufis fieri, omittivè oporteat; planè infelix fit & rudis, fi Ecclefiafticos ritus, formasquè Cenfurarum difcere à Regibus, militibus & Advocatis debeat. Neminem prius fidelium communione arcendum effe, quàm monitus, auditusq; fit, res eft certa, ac millies in facris Canonibus repetita, ac præfertim in Parifienfi ac Turonenfi fynodis, quas paulò antè citavimus. Sed æquè certum eft, quoties Cenfuræ non ab homine, fed à jure & Le-

ge feruntur, nullâ aliâ monitione opus esse, cùm satis ac semper ipsa lex moneat; in notoriis quoquè, & quæ nullâ tergiversatione celari, negativè possint, non oportet, ut monitio aut citatio declarationem præcedat. Præsertim, cùm Excommunicatio non est comminatoria, sed lata sententiæ; & non in genere tantum, sed in particulari casu, & contra particularem personam inflicta. Consilium quoquè Lateranense, & ipsa Conventio, seu Concordatum, inter Pontificem Leonem X. Regemq; Galliæ Franciscum I. clarè disponunt, cùm de Excommunicatione ita constat, ut ea nullâ tergiversatione celari possit, sine alia denuntiatione pro Excommunicato habendum, vitandumquè esse. Hoc cùm Collegium Ecclesiæ S. Ludovici non observaverit, meritò interdicto supponi debuit, & simul Lavardinus pro Excommunicato declarari. Hæc sunt comperta, & millies nota, nec à Lavardini Theologis ignorari poterant, sed oportuit aliquid dici, quodcunquè illud esset,

ne

ne viderentur culpam silentio fateri. Notum erat Lavardinum Romam intrâsse, notum quoquè armatis, excubiisque Palatium ejusquè regionem obsedisse, ne Justitiæ Ministris pateret, notum quoquè natalitiâ Christi nocte sacris Mysteriis procuratum esse; quid ergo in re tam clara, tamque indubitata, totâq; Româ inspectante facta, citari illum, interrogariquè oportuit?

XII. *Septimò, (a) pergit Anonymus dicere: Honores, quibus in Ecclesia S. Ludovici Lavardinus affectus est, dignitati Gallici Oratoris annexos esse, quippe Gallici Regis Majestatem representantis; non ergo aut à Pontifice, aut ab Ecclesia pendere, neque hanc ob causam potuisse à Romano Pontifice Lavardinum excommunicari, aut Ecclesia S. Ludovici interdicto supponi.*

R. Utinam Lavardini Satellites & Advocati de armis potiùs & castris, quàm de excommunicatione & Interdictis loquerentur, quæ non intelligunt. Nec enim Ecclesia S. Ludovici interdicto subjecta est, quòd ejus Ecclesiæ

Sacerdotes Lavardino honores detulerint Legato debitos (quamvis & hîc peccatum, cùm revera Legatus non fuerit) sed ut loquitur Edictum: *Quòd ausi fuerint ad Divina officiâ & participationem Sacramentorum admittere, cùm constaret, notoriè excommunicatum esse.* Si ergo non patitur Lavardinus Pontificem decernere de honoribus Legato debitis; æquè Pontifex non patitur Lavardinum de Ecclesiis & Censuris judicium ferre, quæ à solis Sacerdotibus cognosci debent, Romæ præsertim, ac in Regia Pontificis. Similis ferè est Lavardini querela, cùm in Apologia dixit: *Regis Christianissimi Ministros, utpotè qui personam ac Majestatem ipsius Regis referant, nullis Censuris subjacere.* Quæro enim à quanto tempore potiri Reges hoc privilegio cæperint? mihi enim historiam Ecclesiasticam percurrenti infinita Exempla occurrunt Regum, quos non tantùm Pontifices, sed etiam Galliæ Antistites excommunicatione perculerunt. Pauca ex multis libabo. S. Chrysostomus de Regibus univer-

universim ita loquitur: (a) *Et ad vos* (Sacerdotes alloquitur) *sermonem convertere necessarium est, ut cum multo studio hac dona* (sacram videlicet Eucharistiam) *distribuat, non parva vobis imminet ultio, si quemquam ullius culpa consci-um, hujus mensa participem esse concedatis. sanguis ejus de manibus vestris exquiretur, sive quis Dux militie sit, sive Praefectus, sive Princeps diademate coronatus; indignè, autem accedat, prohibe: majorem illo potestatem habes, hoc vestra dignitas est, hoc securitas, hoc corona.* Ex prima Clodovæi Merovingica stirpe, S. Germanus Episcopus Parisiensis *Charibertum* Regem, & Manovefam, quam incestis nuptiis duxerat, anathemate ferit: (b) *Cumquè* (verba sunt Gregorii) (c) Turonensis eam Rex relinquere nollet, percussa judicio Dei obiit. In secunda Carolina stirpe Stephanus IV. Romanus Pontifex Ca-

F 4

rolo

(a) *S. Chrysost. hom. 60. ad Popul. Antioch.*

(b) *Anno 570.*

(c) *Greg. Tur. histor. Fran. l. 4.*

rolo *Magno* recentibus adhuc in Apostolicam Sedem meritis excommunicationem (a) intentat, nisi continuò nuptias cum Desiderij filia abrumpat, tantumq; abfuit indignari Carolum, aut id Majestate Francicâ indignum ducere, ut potiùs quàm primùm paruerit, Longobardâ ejectâ. In eadem secunda stirpe Carolum simplicem fœdus cum Northmannis infidelibus parantem S. Fulco Rhemensis Archiepiscopus suo & omnium Galliæ Antistitum nomine his verbis absterruit: (b) *Cum omnibus Episcopis meis ego vos & omnes vestros excommunicans, eterno anathemate condemnabo. Vides, quæ tunc temporis non unius Fulconis, sed totius Gallicanæ Ecclesiæ mens & sententia fuerit. In tertia Galliæ Regum Dynastia Robertus Hugonis Capeti filius, quòd incestas nuptias junxisset, à Galliæ Episcopis sacris exclusus, adeò*
omni-

(a) *Habetur Epistola Stephani tom. 3. Concil. V. Emil. & Spondan. ad Annum 770.*

(b) *Flodoard. l. 4. c. 5. Anno 898.*

omnibus horrore fuit, ut vix tres famuli obsequio superfuerint, anathematis reverentiâ, profecitquè severitas, pellice paulò post palatio pulsâ. Rem Damianus (a) & Pithæus narrant. Ex eadem Dynastia ob similem causam *Philippus* Roberti Nepos primùm in Concilio Lugdunensi, deinde ab Urbano II. absolutus, teste Ivone (b) Carnotensi. *Philippo II.* æquè Francorum Regi, quòd legitimam uxorem dimisisset, anathema intentatum, ac Galliæ Regnum interdicto subiectum est, idquè Galliæ Episcopi adeò non improbârunt, ut quamplurimi eorum exilio purgati sint, (c) quod Pontifici paruisset. Tandem resipuit, petitâ ab Innocentio veniâ, receptaquè in thalamum Reginâ. Ex stirpe & Dynastia Valesia

F 5 Hen-

(a) *Petrus Damian. l. 2. Ep. 15.*)

Pith. in chron.

(b) *Ivo Carnot. Ep. 166. & 169.*)

(c) *V. Spondan. ad ann. 1198. Raynald. ann. 1200. n. 9.*)

Henricus III. à Sixto V. monetur, ut Borbonium Cardinalem & Archiepiscopum Lugdunensem carceribus liberet, ni faciat, pro excommunicato declaratum iri, fuitq; monitorium in Galliis, Carnuti, Metisq; promulgatum, & quia eodem anno mors Henricum prævenit, ejus cadaver publico funere, solitisq; suffragiis supra duodecim annos caruit (quòd crederetur excommunicatus decessisse) donec sub Henrico IV. agente Ossato (a) Cardinali & absolutionem Henrici IV. nomine, ac Elisabethæ Regiæ viduæ infinitis argumentis urgenti, tandem à Clemente VIII. impetrata est. Agnovit ergo Gallia posse Reges excommunicatione puniri. Idem Henricus Rex per Cenomanensem Episcopum, Cardinalem Jojofam, ac Pisani Marchionem Legatos, ac in genua provolutos absolvi à Censuris rogavit, quas ob cædem Guisij Cardinalis incurrerat; (b) nec tamen
obtinere

(a) *V. Spondan. ad annum 1589.*

n. 16. & Ossat. Ep. 215.

(b) *Sondan. cit.*

obtinere potuit, quippe Borbonio Cardinali & Lugdunenfi Archiepifcopo necdum carcere eductis. Ex ftirpe Borbonica Henricus Navarræ Rex ob hærefin, quam femel abjuraverat, iterumquæ profeffus fuerat, à Sixto V. diris percuffus eft, idquæ ritè à Pontifice factum Clerus Gallicanus agnovit, habuitq; Regem pro excommunicato; & quamvis Henricus vehementer excommunicationi adverfatus fit, nunquam tamen privilegium obtendit, quòd Reges excommunicari non poffint: fed folùm quòd hæreticus non effet, qualis à Sixto arguebatur. Ipfa Sorbona inter alias propofitiones (quas Henrico addicti vulgaverant) hanc quoquæ in publico Senatu decimâ Februarij damnavit. *Pontificibus Romanis jus non eft Reges excommunicandi.*

Ita fcribit Spondanus, (a) quî ad annum 1585. refert ejusdem Henrici inftitutionem Offato & Peronio Legatis fuis datam, in qua petebat Rex à Cenfuris & excommunicatione abfolvi, quas incurrerat.

F 6

(a) *Spondan. ann. 1590.*

currerat. In ipsa quoque absolutione à Clemente VIII. publicè Legatis concessa, Rex à Censuris, quibus tenebatur, (a) liberatus est.

Et si hæc omnia deessent, sufficeret clarissima Christi sententia Petrum alloquentis: *Quaecunque, inquit, ligaveris super terram, erunt ligata & in Cælis.* Si *quæcunque*, ergo & Galliæ Reges, nisi dicant, ad istos Evangelium non pertinere, aut Christi præceptis exemptos esse.

Ex his omnibus aliisque quàm plurimis, quæ silentio prætermittimus, palàm est, potestatem excommunicandi Reges semper in Galliis agnitam, exercitamque, imò & saluberrimam fuisse, quoties sanandis hoc remedio agris Principibus suam Episcopi operam Pontifici sociârunt. Nunquàm Henricus IV. & fortè nulli amplius Galliæ Reges Catholicam Religionem amplexi essent, nisi illum Pontifices vibratis Censuris compulissent. His ergo Gallia debet conservatam Religionem, & tot alia bona, quæ ex Religio-

(a) Spondan. ann. 1590.

ligione consequuntur; nec verò aut Carolo Magno aut Henrico Magno quidquam Majestatis decessit, quòd se punienti Pontifici submiserint, imò venerationem illis amoremquè auxit subjectio, non vi, nec metu, sed Religione expressa. Et Magno Theodosio quid nocuit ad pedes accidisse Mediolanensis Antistitis? num ideò minus potentiâ, victoriis, reverentiâ subditorum floruit? imò tantò major, quantò modestior, subjectiorquè Sacerdoti: & cui istorum ad Concilium, aut ab abusu appellandi cogitatio incidit?

Non hæc dico, quasi ignorem, quam parcè sacris fulminibus uti Pontifices oporteat, in Reges præsertim, quorum arbitrio sedet, aut obsequi, aut obniti ac plerumquè pudet moneri, multoquè magis puniri: nec facilè culpam agnoscunt libertate peccandi, ac famulantium adulatione: nec etiam me latet, quantum mali proveniat ex facilitate Censurascumulandi. Cæterum nihil est tam sanctum, quo abuti

non possis, nec nos abusum, sed usum commendamus, eumquè præparcum & necessarium. Quot mala ex potestate regnandi, bellumquè indicendi? quot ex matrimonijs, negotiationibus, judicijs proveniunt? num propterea hæc omnia damnanda abusum obtentu? Idem de excommunicatione & Censuris dicas, quas cùm necessitas Innocentio extorserit, nemo Judicem accuset, qui pœnam dictavit: sed reum, qui meruit, imò qui extorsit.

Auctor quidem seu potiùs Compiler libertatum Gallicarum multa congerit, ut ostendat, non posse Reges excommunicari; sed ea planè nihil probant, cùm tantùm aut facta aliqua Principum narrent, ex quibus nullum jus colligi potest (quid enim non licebit, si exempla sequamur?) aut aliqua Parliamentorum Senatûs Consulta, quibus nulla potestas est de auctoritate Ecclesiastica, ejusquè finibus judicandi; aut denique abusus tantùm Censurarum damnantur. Taceo hunc Librum anno 1639. ab ipso Galliarum Clero

Clero Parisijs damnatum, prohibitum-
què esse: *Quòd* (verba sunt Spondani)
multa contineret, quæ magis ad Ecclesiæ
servitutem tendere, & schismatis occasio-
nem præbere viderentur, & idè primò à sa-
cro Consistorio Regio prohibita sunt distrahi
& vendi: deinde Eminentissimorum Car-
dinalium, caterorumq; Illustrissimorum
Antistitum, qui tunc Lutetia reperti sunt
undeviginti: nescit enim Ecclesiæ Gallicana
libertates, quæ malum operantur: nescit ju-
ra, quæ illam à Romana Matris firmissima
connexione & filiali obedientia divellant.
Hactenùs (a) nobilissimus scriptor.

XIII. Octavò. (b) Sed, inquit Ano-
nymus, si jus Asyli, & immunitatum abu-
sus est tam horridus, tantaq; abominatione
dignus, ut Pontifex Religioni & Conscientiæ
sibi duxerit illum ampliùs ferre; cur ergo
tanto jam tempore illum tulit? cur post tot
annos Conscientia Pontificem monuit? Id
planè indicio est, quàm Conscientiam
quæri.

R2.

(a) Spondan. ad ann. 1639. (b)
Fol. 4.

Ry. Nihil festivius est, quàm audire Lavardinum, ejusq; Advocatos de Conscientia & Religione loquentes; suâ enim Conscientiâ Pontificis metiuntur; & cùm illis postrema sit hæc cura, sedemquè ultimam obtineat, ludere putant, quotquot conscientiam appellant. Tulit ergo Pontifex primis annis hunc Asylorum abusum eo ferè pacto, quo Agricola lolium & Zizania florente in agro: non quòd amet, sed quòd frumento sit mixta, quæratquè occasionem evellendi. Eademquè ratione quæri posset, cur Gallia Rex, si conscientia sibi duxit Calvinistarum hæresin in Gallia ferre, non statim ejecerit? Planè Innocentius in ipso statim limine initi Pontificatûs professus est, se Asyla nunquam laturum, ut tamen Regum Majestati honor haberetur, lentè processum; moniti, rogati, convictiquè rationibus sunt: expectatum quoquè, dum Principum Legati, qui tum vivebant, decederent. Tandem ubi omnia parata, ubi veneratio Pontificis tot rebus secundis aucta, ac ipse
Rex

Rex Gallia pollicitus, se aliorum Principum exemplis imitandis non ultimum fore, ubi denique alij Reges Aſylo ceſſere; meritò viſum eſt Pontifici, non ampliùs ceſſandum. Expectavit ergo æſtatem, ut meteret. Quid potuit à Pontifice aut prudentiùs, aut humaniùs fieri?

XIV. *Nonò.* (a) *Verbis*, inquit Anonymus, *generalibus non comprehenduntur perſona notâ ſpeciali digna, quales ſunt Principum Legati: non potuit ergo Lavardinus ex verbis Bullæ pro excommunicato haberi. Imò nec dici quidem poteſt, Lavardinum caſum Bullæ incurriſſe, quippe vim nullam adhibuit, nec curſum Juſtitia impedivit.*

R. Oportet ab hoc Lavardini Advocato Bullam Innocentij, ne quidem leſtam fuiſſe, alioquin nunquam hæc ſcriberet tam adverſa veritati. Renovat Innocentius Julij III. Pij IV. Gregorij XIII. Diplomata, & illa verbatim recitat; at in illis expreſſa ſit Legatorum mentio; qui ergo dici poteſt Bullam Innocentij nihil de Legatis loqui? Deinde in Bulla

Innocentij hæc clausula adjungitur, videlicet: *Omnes quâcunq; dignitate & auctoritate tam Ecclesiasticâ, quàm seculari præfulgentes, etiamsi de illis specialis, specifica, expressa & individua mentio facienda esset.* Quæ verba ex omnium Juris-Consultorum sententia æquivalent expressioni individua: tantumq; operantur, quantum si Lavardini nomen in Bulla recitatum esset; demonstrant enim enixam Pontificis voluntatem. Et quamvis hæc omnia non essent, quis nescit sacro Cardinalium Collegio, omnibusque Romæ Prælati ex parte Pontificis denuntiatus esse; caverent, ne Lavardino sociarentur, quippe sacris interdicto; imò ipse Lavardinus à Renuccio Cardinali de voluntate Summi Pontificis monitus est: actum maximè, cum Clericis Lateranensis Ecclesiæ indictum, ut si Lavardinus Divinis officiis assisteret, quæ in honorem sanctæ Lucie peraguntur, continuo sacra cantumq; abrumperent, ut fieri solet, cum adstant palàm excommunicati; quid ergo amplius fieri potuit, ut

ut constaret Pontificio Diplomate Lavardinum comprehendi? sed piget tam claris immorari, & misereor Lavardini tam infelici Advocato nixi, & tam absurda narrante. Paria sunt, quæ dicit, *denon impedito Justitiæ cursu nullaq; vi adhibita.* Nam quàm verum id sit, satis intelligas ex ijs, quæ de ingressu Lavardini jam suprâ recensui, & quæ quotidie geruntur, Româ fremente, ac Pontificis moderationem contra tot insultus demirante.

XV. *Decimo.* (a) *At Sixtus V. quamvis Jure Asyli Legatos prohibuerit, non tamen adjunxit pœnam excommunicationis, imò sustulit à suis Antecessoribus jam latam.*

Rx. Non sequitur, ut quod unus Pontifex omisit, alius quoq; omittere debeat. Quàm multa à Ludovico Rege (qui modò Galliarum potitur) confecta sunt, ejus majoribus planè intentata? ergo omnibus rebus sua ætas & maturitas est: alioquin quantum Principibus otium & steri-

R. Supponit Lavardinus, Bullam Innocentij, quâ Legatorum Afyla prohibentur, solo Pontificis, ejusquè domesticorum nutu excidiffe, non rogatis, non auditis Cardinalium votis. At verò id tam falſum eſt, ut pudeat refellere. Legant Pontificis Bullam, videbuntquè Purpuratorum nomina magno numero ſubſcripta; num verò ſubſcriberent aut non lecta, aut non probata? major eſt Romæ, quàm Pariſijs dicendi libertas: licet Cardinalibus & ſentire & loqui, nec ullus exilio punitus, quia verum dixit; ut nuper in Regaliæ cauſa Pariſijs factum. Illa quoquè verba Bullæ inserta videlicet: *De fratrum noſtrorum S. R. E. Cardinalium conſilio, & aſſenſu, ac prematurâ conſideratione præhabita*, Gallum falſi convineunt. Multò minùs dici poteſt *Cardinalem Eſtreum in hac cauſa auditum non eſſe*. Quis enim Eſtreum prohibuit, ne loqueretur? aut quando ei occaſio loquendi defuit? aut quando accèſſu Pontificis prohibitus eſt? Planè excuſari non poſſet

Car-

Cardinalis focordia, si obmutuisset, cum tam multis ex causis ad dicendum urgeretur: imò non tantum dixit, sed etiam scripsit: at veritas & iustitia causæ, vocem & calamum vicit.

XVII. *Duodecimò*: (a) *Nam, inquit, Pontificem decuit, sustinenda cause merè temporali ac politica (qualis est, quæ Asyla Legatorum spectat) sacram dignitatem, pacemq; statûs Ecclesiastici, imò totius forsan Europæ periculo exponere.*

Rx. Credo equidem, quando Innocentius de abrogandis Asylis cogitavit, id primum & ante omnia expendisse, plus boni an mali hæc mutatio pareret: nec improvisa illi pericula, quæ modò narrantur; sed tanti non erant, ut tam sanctum & necessarium opus morari deberent, idque iustissimis ex causis, ut jam commemorabo, juvatq; longiùs immorari rationibus exponendis, quæ Pontificem obfirmârunt; video enim id potissimum Innocentio objectum, ac præsertim ab Estreo Cardinali, cum votum suum

fuum calamo exponeret; videlicet imperitos Medicos Pontificem imitatum esse, quando morbum mederi aggressus est peiori remedio. Sed nego, mecumquè negabunt, quotquot pacatis, placidisque animis rem totam considerant, debuisse videlicet tam gravem, plenumquè flagitijs abusum ferri metu malorum, quæ jam tum præviderat, & nunc tanto strepitu à Gallis præcinuntur.

Nam *Primò* supponunt Galli, Jus & immunitates Asylorum rem esse merè politicam & temporalem; at maxime falluntur: cum enim infinita sint flagitia, quæ illorum causâ, & spe impunitatis patrabantur; idquè omnium Nationum, quæ Romam concurrunt, pessimo exemplo; oportuit Asyla considerari non solum ut loca, in quibus Principis potestas & Jurisdictio violatur; sed etiam in quibus suprema Dei Majestas gravissimis injurijs afficitur; at verò quid magis ad Christi Vicarium pertinet, quàm quovis humano respectu seposito cavere, ne Christus tam indignè offenda-

tur,

rint, alioquin bellum illaturi, qui totam Europam incendant, num ideò Pontifices cedent, bellumq; & minas rediment Christi patrimonio? Si semel Pontifices minis se frangi, vinciquè patiantur, idq; Principes observent, nullum facient finem petendi, minandiquè. Æquum ergo non fuit, ut Pontifex à proposito delendi Afyla moveri se pateretur solo metu & terrore futurorum. Fecit Pontifex, quod muneris fui, quod necessitas, quod publica & privatorum salus, imò quod DEI causa (toties in Afylis offensi) exigebant; idquè nullus Principum, si Gallos excipias, non maximè approbavit, ratumq; habuit; si ergo bellum & turbæ à Gallis sequantur, cujus amabò culpâ id fiet? sua retinentis, an rapientis aliena? & quando magis, quàm in justa causa cœlesti patrocínio fidere, nitiquè Pontifices debent? si omnia aut fato, aut casu evenirent, nullâ in rebus humanis DEI providentiâ ego quoquè honestis consiliis utilia præferrem, sed quandoquidem constat

G

omnia,

omnia, ac præsertim Ecclesiam, Dei nutu gubernari, nunquàm persuaderi me patiar, ut credam Deo placere sordida consilia, aut secunda fore. Hæc non mea, sed Apostoli sententia est: (a) *Perdam sapientiam sapientium, & prudentiam prudentium reprobabo: nonne stultam fecit Deus sapientiam hujus sæculi?* Verbo, si bellandum est, malim Pontifices cum Gallis, quàm cum DEO & conscientia bellum suscipere.

Quartò. Cùm dicitur, minus esse malum Regi Galliæ Asylum spontè cedere, quàm vim & bellum experiri; oportet non Asylum tantùm expendere, ejusquæ cessionem, sed omnia, quæ hâc cessione proventura sunt; nam & arborem non solam, sed cum fructibus æstimamus. Si Pontifex Gallo cedat, eadem ratione & Hispano, & Anglo, & omnibus Principibus cedendum erit Asyla postulanti-
bus: at quanta hinc confusio flagitiis impunè florentibus, & totâ ferè Româ in speluncam Latronum conversâ? Imo multò quàm ante gravius malum, expers-

(a) *1. Corinth. 1.*

quæ

què remedij: crefcet enim Legatorum
licentia, quando fe victores, victum Pon-
tificem cernent. Revocentur in memo-
riam & mala, & pericula, quæ paucis
menfibus contigere, Lavardino non Le-
gatum Romæ, fed Regnatorem agente,
quamvis invito & obnitente Pontifice?
quid rogo fiet, fi & perpetua & pacifica
fit hæc Afylorum dominatio; & omni-
um Principum Legatis permiffa? imò
non Legatis tantum, fed omnibus idem
jus affectantibus? Oportebit fanè aut
Pontificem Româ excedere, aut preca-
riò & ex magnatum arbitrio vivere, hoc
eft, servi non Principis more, & exem-
plo nullibi terrarum vifo. Quod poffit
malum comparari tam indignæ servi-
tuti? nequè hîc finis, ubi enim femel
Prîncipes vicerint, & prætextu Afyli, ut
nuper Lavardinus, urbem armis, Clie-
telis, factionibus impleverint, iidem,
quibus nunc & paribus minis alia Ponti-
ficum jura, quoties libuerit, involabunt:
imò nec tuta Pontificum & libera ele-
ctio; redibitque Ecclefia in priftinam

servitutem, quando videlicet sub Dominatione Tusciæ Marchionum Pontificis electio non liberis suffragiis, sed pretio, armisque agebatur, imò ex voto meretricum, quæ in aula magis placuissent. Merito igitur Innocentius etiam principia, omnemque speciem externi Dominatus, deleta voluit, ne frustra essent remedia morbo jam valido; nec ullum malum credidit huic posse comparari.

Quintò. Sed & Patrum exempla Pontificem nostrum docuere, ne in tam justa & necessaria causa minis, vanisque terroribus cederet. Nulla planè virtus Magnum Pontificem ut magnanimitas & constantia decet, nec alia magis in Patribus floruit primitivæ Ecclesiæ, quando perpetuæ cum Principibus lites crucem averfantibus. Infinitus sim, si omnia recenseam; memoriâ repetatur, quantis minis egerit Justina contra Ambrosium, Eudoxia contra Chrysostomum, Valens Imperator contra Athanasium; qui tamen nullo unquam terrore moveri poterant, ut à sententia decederent: & tamen
illi,

illi, qui minabantur, non Galliæ aut Hispaniæ Reges erant, fed totius Orbis, Europæ videlicet, Affricæ, Afiaquè Imperatores. Quibus verò minabantur, Episcopitantum: quantum ergo pudoris, si Pontifices paveant, Episcopis intrepidis, metuquè liberis? & denique quidquid Galli irascantur, nunquam Orbis terrarum credet, Ludovicum Regem illi Ecclesiæ bellum illaturum, à qua ejus stirps coronam accepit. Nam quæ gloria tanto Regi arma in Sacerdotes vertisse; & Patrem ac Pontificem suum ideò bello pulsasse, quia non voluit, quod non licuit? Ergo cum Romam Gallus expugnaverit, Portis Vaticani hæc inscriptio grandibus litteris incidetur: *Templum Religionis, quod Christus fundavit, Petrus erexit, Pipinus dotavit, Ludovicus destruxit?* Non potest id fieri, quidquid Galli minentur.

XVIII. *Decimotertiò, (a) Conqueritur Lavardini Defensor: Omnia Pontifices in pejus interpretari. Vocari exercitus*

G 3

paucos

(a) *Fol. 5.*

paucos illos Clientum & famulorum, qui Lavardinum comitabantur ex decoro tanta Dignitatis, quippe Gallia Legatum. Palatium, quo receptus est, arcem appellari. Tintinnabulum, quo hora, prandia, funera, hospitumque adventus indicatur, pro signo erumpendi. Disciplinam, Ordinemque Domesticum, pro stationibus & excubiis militaribus. Denique si Lavardinus Angelus Dei sit, statutum esse eum deformare, ut saltem à pueris fatuisque, quorum semper maximus numerus est, suffragium ferant.

R. Credo equidem hunc Oratorem cæcis & surdis scribere voluisse, qui nec audierunt, nec viderunt Lavardini ingressum; alioquin, quæ rogo fiducia tam nota, tam comperta negandi? Legantur, quæ supra de Lavardini in urbem adventu dicta sunt, evolvantur annales, an ullus unquam Legatorum ita ad Pontificem, aliumvè Principem ingressus sit: Roma interrogetur, & tota Lavardinum accusabit, nec ego immorari volo jam supra narratis, & quorum Roma tot testes, quot oculos habet.

XIX. Decimoquartò : *Consultiùs fa-
cturum Pontificem dicit, si Ecclesiis Afyla,
non Palatiis adimeret ; Ecclesias enim pre-
cibus porrigendis institutas esse, non prote-
gendis flagitiis.*

R. Modesta enimverò petitio, & di-
gna Advocato. Tollantur Ecclesiis Afy-
la, & dentur Palatiis ; & plus valeat in-
tuentis reis Lavardini reverentia, quam
Majestas Dei. Nec interest Templo-
rum Afyla à Deo in veteri testamento, &
ab Ecclesia in novo tot sacris Canonibus,
tot sæculorum decursu sancita esse ; hæc
omnia cessent, & in Lavardini cultum
vertantur. Qui ita discurrent, planè
ostendunt nihil sibi Religionis super-
esse ; alioquin ex Afylis Templorum in-
ferre potiùs contrarium deberent, ex-
tinguenda videlicet esse Afyla Legato-
rum. Cùm enim tot sint Romæ Afyla,
quot templa, quid opus est illa multipli-
cari tanto innocentia pacisque publicæ
periculo ? & quæ ratio, ut cùm non
omnia flagitia sint secuta in templis,
sint in Lavardini palatio ? nec opus est

præsentem Pontificem à Gallis moneri, ne permittat, ut criminosi Templis abutantur; qui enim non patitur illos Legatorum ædibus, multò minùs patietur abuti ædibus Dei.

XX. *Decimoquintò: Non possunt enarrari scandala, quæ ex hac Pontificis duritie in hereticis nascuntur; eosquè impediunt, ne vera Religioni accedant.*

R. Idem quoquè Christo objectum fuit: *Scis, inquiebant Apostoli, quia Pharisei scandalizati sunt in sermone hoc. Non ideò tamen cessavit Christus causam agere veritatis; imò monentibus respondit: Sinite illos, ceci sunt, & duces cecorum.* In quem locum optimè Divus Gregorius: (a) *Inter verba vituperantium semper ad mentem recurrendum est, & si in ea non reperitur malum, quod de nobis narratur, in magnam debemus latitiam protilire. Quæ enim debet esse tristitia, si omnes accusent, & sola conscientia nos liberos esse demonstrat? habemus Paulum dicen-*

(a) S. Gregor. l. 8. c. 45. ad Pallad. Presbyt.

*dicentem: Gloria nostra hac est, testimonium
Conscientia nostra. Job quoque dicit: Ec-
ce in Cælo testis meus? si ergo est nobis testis
in Cælo, testes in corde, dimittamus stultos
foris loqui, quod volunt. Quamquam ne
hâc quidem excusatione opus est; con-
stat enim neminem offensum, aut scan-
dalo affectum esse, quòd Pontifex Asyla
fustulerit, quodque à tam sancto propo-
sito nullo metu averti potuerit; imò
Calvinistæ etiam ac Lutherani id maxi-
mis laudibus prosecuti sunt. At verò
quòd Lavardinus Asyla invaserit, quod-
que Rex Galliæ Pontifici, quem pro
Christi Vicario agnoscit, tam sancta im-
peranti non acquieverit, & propter um-
bram inanissimi privilegii, solisque La-
tronibus utilem, Ecclesiam, totamque
Europam turbaverit; id enim verò est,
quòd hæreticos Orbemque Christianum
vehementer scandalo affecit, quodque
tot præclara Gallorum facinora turpi
maculâ fœdavit; Regis ergo Ministros
& Confessarios scandali moneri oport-
uit, non Pontificem Innocentium.*

XXI. *Decimosextò : (a) Opponit quoquè, exempla Ludovici sancti, Philippi Pulchri, & Ludovici XII. Regum Gallia, qui excommunicationes à Gregorio IX. Bonifacio VIII. & Julio II. fulminatas nihili duxère. Quis ergo prohibeat istos imitari?*

R. Fallitur Lavardinus, si credit omnia se Regum & Sanctorum exempla imitari posse; alioquin & homicidia, & adulteria poterit, quia à Davide commissa & sanctò, & Rege; non ergo videndum est, quid Reges fecerint, sed quid lex fieri, omittivè jusserit; lex enim erroris est expers, non Principum facta. Et David non ideò sanctus, quia adulterium commisit; sic Ludovicus IX. non ideò inter sanctos relatus, quia excommunicationem contempsit. Quamquàm multò aliter res se habet, quàm hic scriptor recenset. Dicit Ludovicum IX. Gallia Regem contemptui habuisse excommunicationem, quâ Gregorius IX. in Fridericum II. Imperatorem animadverterat; citatq; ad marginem Matthæum Parisium. Sci-

(a) *Fol. 5.* endum

endum verò est, historiam Parisiensis etiam Gallorum iudicio falsi suspectissimam esse, in ijs præsertim, quæ Pontifices spectant; nam editio Matthæi Parisij primò ex Bibliothecis Anglicanis prodiit sub Regno Elisabethæ anno 1561. Postea Tiguri iterum typis impressa anno 1589. Utrumq; ex Præfatione ad Lectorem habetur præfixâ Codici Salisburgensi. Jam Lectori iudicandum relinquo, quæ fides haberi debeat libro, quem ex manibus Calvinistarum habemus, juratis Pontifici hostibus: possis limpidam sperare ex tam turbido fonte? (a) Ipse Maimburgus (cui in defloranda Pontificum auctoritate tanta voluptas) fatetur, Parisiensem mendacia, fabulasq; palpabiles & crassissimas nugas Lectoribus proposuisse. Sed

G 6

multò

(a) Maimburg de la Decadence
lib. 2. pag. 112. Ubi. *Il debite de fables, & des faussetez toutes visibles.... ridicule digression... benene grossiere, &c.*

multò gravior Maimburgo Spondanus
 (a) Apamiarum Episcopus, & inter
 præcipua lumina recensendus Gallicanæ
 Ecclesiæ, ubi recitasset, quæ de Ludo-
 vico sancto Parisiensis narrat, hæc ad-
 jungit: *Hæc diffusè blaterat Parisius, quæ
 meras nugas esse hominis cerebro laboran-
 tis tam nullus dubito, quàm omninò mihi
 persuadeo, nullum fore sane mentis, qui
 putidam ejus narrationem & futilem Dia-
 logismum inspexerit, qui non idem mecum
 sentiat, cùm etiam tantæ rei ne per somnium
 quidem ullus prorsus alius Auctor memine-
 rit.* En tibi, quàm nullius fidei sint,
 quæ de Summis Pontificibus Parisius scri-
 bit, etiam ex sententia Gallorum Au-
 ctorum! & tamen in causa tanti mo-
 menti Lavardini Causidicus tam levi-
 bus testimoniis utitur; sed quid face-
 ret, cùm meliora defuerint? fateor
 sanctum Ludovicum leges aliquas tulisse
 immunitati Ecclesiasticæ; ac censuris
 ab Episcopo latis oppidò graves; sed
 id fecit Aulicorum consiliis deceptus;
 at

(a) Spondan. ad ann. 1223, n. 12.

at ubi errorem à Gregorio IX. edoctus est, continuò correxit, resciditquè legem reverentiâ Pontificis. Vide insignem Gregorij Epistolam, (a) in qua propositis Theodosij, Valentiniani, Caroli Magni Imperatorum exemplis, qui immunitatem Ecclesiasticam acerrimè protexerunt nullo Majestatis dedecore, exemplar adjungit Diplomatis, quo Honorius III. Pontifex anathemate percussit, quotquot hujusmodi leges ferrent, quales Ludovicus. Agnovit continuò Rex sanctus, correxitquè errorem non tam spontè, quàm aliorum instinctu commissum. Illud quoque memoratu dignum, cùm ejus Romam Legatus ab Alexandro IV. diploma retulisset, quo potestas fiebat nominandi Pastores ad vacantia Sacerdotia, Rex sanctus recusato privilegio, & Diplomate in flammis projecto ad Legatum conversus:

G 7

Quod.

(a) *V. Epistol. 390. lib. 9. & Raynald. ad ann. 1396. n. 31.*

(a) *Quod mea negotia Roma strenuè obieris, laudo: quòd mihi à Pontifice munus hoc retuleris, non probo; intelligo enim, quanto cum periculo anima mea & Regni hoc susceperem.* Hæc sunt Ludovici sancti exempla, quæ oporteret suggeri Christianissimo Regi: non illa, quæ ab ejus majorum gloriosis vestigiis tanto operè abluunt, ejusq; gloriam & conscientiam pari damno afficiunt. Quæ de Philippo Pulchro, & Ludovico XII. narrantur, silentio potius digna sunt, quàm memoriâ, mirorq; Lavardini Causidico nullum pudorem esse ea recensendi; nam Philippum quod attinet, constat eum in flore ætatis raptum, & si credimus Divo Antonino, (b) aliisque, dum aprum insequitur, equo excussum. Reliquit tres filios, qui omnes uxorum adulteriis fædati, fatoquè immaturo, & sine maribus defuncti, Valesiis coronam reliquere. En tibi

(a) *Spondan. ad ann. 1254. n. 14.*

(b) *Antoninus 3. p. tit. 21. Spondan. ad ann. 1314.*

tibi quorum Regum & quàm infelicium exempla Ludovico nostro inculcantur? Ludovici XII. in Julium Pontificem conatus, *pestimum consilium, & Christianissimi Regis nomine prorsus indignum* Spondanus (a) vocat: nec aliud Cœli judicium; Ludovicus enim quinquennio post infelici morbo abreptus est. Absit à me, ut regnanti Ludovico pares exitus velim. Comparentur Principes, qui Pontificem venerati sunt, quique persecuti; Constantinus videlicet, Theodosius, Pipinus, Carolus Magnus, Philippus II. cum Justiniano, Henricis, Fredericis, Philippo Pulchro, aliisque, & continuò, patebit, quorum virtutes, & fortunam precari oporteat Christianissimo Regi.

XXII. *Decimoseptimò: (b) Opponit Pontificum curas: Qui prætextu, inquit, Religionis rebellium factiones contra legitimum Regem Henricum IV. adjuverunt, id verò nemo unquam probavit.*

Ry. Ve-

(a) *Spondan. ad ann. 1510.*

(b) *Fol. 8.*

R. Verum est, nullum unquam Calvinistarum probasse, quæ pro Religione in causa Henrici IV. Pontifices egerunt; nec miror ea quoquæ non probari Lavardini Advocato, qui singulis ferè paginis Calvinum redolet. Si rebelles vocandi sunt, qui non prius Henrico IV. subdi voluere, quàm hæresin exueret, veramquæ Religionem profiteretur, hæc planè culpa aut potius calumnia non tam Romanum Pontificem, quàm præcipuas Gallici Regni familias, ac maximè Clericum Gallicanum involvit, qui nunquam adduci potuit, ut Principi Calvinistæ subderetur. Ipsa Gallia Pontifices imploravit, & præsertim Sorbona, ne pateretur Calvinistam regnare. Audi epistolam Perandæ ad Patriarcham & Legatum Cajetanum anno 1592. die 16. Aprilis. Sorbona hujus sententiæ est, urgetque Pontificem; ut ipse Regem Galliæ pronuntiet, declaretquæ; alioquin Gallia conclamata est, expersq; remedium. Et hanc potestatem Pontifici Regem declarandi rationibus planè evidentibus,

mul-

multisq; exemplis ostendunt, imò adjungunt: ubi Pontifex Regem pronuntiaverit, isq; in Gallia denuntiatus fuerit, continuò & à Clero, & ab omnibus Catholicis receptum iri. Vides quæ sententia tunc fuerit Cleri Gallicani, omniumq; in Gallia Catholicorum; Galli ergo Pontifices, non isti Gallos impulere.

Cæterùm cum in negotio fœderis Gallici multa contigerint, quæ nunquam Pontifices probârunt; breviter rem totam evolvam, ut tantò clarius verum à falso distinguas.

Sciendum igitur est, cum edicto *Anni 1576.* Henricus III. Gallix Rex Calvinistis libertatem & exercitium Religionis totâ Galliâ, aditum ad omnes dignitates & honores, paritatem Judicum in omnibus Parliamentis, octo urbium possessionem securitatis causâ, aliasquè conditiones Catholicæ Religionis planè funestas permisisset; Catholici tam iniquis pactis offensi novum fœdus jurârunt fidei tuendæ. Fœderis caput Henricus III. Gallix Rex.

Leges

Leges quas fœdus complectebatur, Gregorio XIII. oblatae, rejectaequè sunt; quamvis enim hæresin deletam vellet, non tamen factiones Regno fatales probabat. Audi Spondanum: (a) Gregorium huic fœderi suffragatum esset nequè scripto proditum fuit; neque ullo alio argumento probari potest: quin imò ne tum quidem, cum Guisus apertè se detexit, ne dum hoc tempore, Pontificem fœderi favisse, sed semper Patrem se amantissimum & fidum Henrici Regis amicum se exhibuisse, vel ipso teste Serrano, aut ejus Continuatore utroquè hæretico, ac proinde Pontificum hoste apertè intelligitur, cum ad finem anni 1584. scribit, oblatum tunc fuisse fœdus Gregorio, ut illud approbaret tanquam pro Ornamento & propugnatione Ecclesie Romanae conditum; verum Gregorium annuisse quidem, ut contra Hæredicos ageretur, at nequanquam motus illos populares approbare voluisse, sicquè nuntios inanes dimisisse.

Certum

(a) Spondan. ad ann. 1576. n. 7.

Certum igitur eft, etiam testimonio Hæreticorum, initia fœderis Gallici à Pontifice improbata effe ; eodemquè Spondano teste, Principes Catholici fœderis nunquàm à Gregorio XIII. impetrare potuerunt, quamvis ardentiffimè precarentur, ut Regem Navarra, Condeumquè Principem Duces Calviniftarum anathemate feriret, (a) Sixtus, qui Gregorio fuccellit, Henricum quidem Navarreum Communione fidelium interdixit, Regnoquè inhabilem pronuntiavit, nunquàm tamen permoveri potuit (quamvis Hispaniæ Rex Philippus ardentiffimè, & cum minis urgeret) ut fœdus cum Hispano adversùs Henricum jungeret, idque Spondanus (b) testatur. Cùm tandem Henricus nollet hærefin ejurare, & maxima Galliæ pars, præfertim Clerus Gallicanus Catholicum Principem vellet ; ne leges Regni fundamentales alium, quàm Catholicum paterentur ; Pontifices egregiè partes suas egiffe

(a) *Spondan. ad ann. 1585.*

(b) *Spondan. 1590. n. 5.*

egisse, ut Henricum metu saltem compellerent ad hæresin deferendam; responditq; effectus: quippe Henricus coronæ anxius maluit hæresin, quàm Regnum amittere, seq; Catholicum professus est. Continuò sublata discordiæ, placati Pontifices, & Gallia Henrico subiecta. Si ergo cessassent Pontifices, neq; oportunè tantis malis remedia applicassent, & Henricus, & uterq; Ludovicus, Filius videlicet Neposque; & tota denique Gallia, Regum exemplo hæresi perijsset: si ergo fateri volumus, Galliam Catholicam Pontifici debemus, solisq; hæreticis dolere hoc potest.

XXIII. *Decimo octavò: (a) Inauditum esse, conqueritur, ut Legati Principum non auditi, non excepti fuerint, nisi prius omnia Pontifici cederent; non vi, non imperio cum Principibus agendum, sed amicis conventionibus: quoties & Hispania & Italia Principes immunitatem Ecclesiasticam violaverint, non ideò tamen eorum Legatos, aut non agnitos, aut non admissos esse.*

R. Alia

(a) *Fol. 8.*

R. Alia facies est aliorum negotiorum, alia præsentis, & de quo agitur. Si enim Pontifex Lavardinum pro Legato habeat, permittatq; Asylo uti, jam Gallis novus actus, & nova possessio accedit, sicq; nova cavillandi materia: & quando semel admissos iterum possessione dejicias? & quid reliquis Principum Legatis fiet, qui jam Asylo cessare? Non potuit ergo Pontifex Lavardinum pro Legato admittere, ut non simul Asyla admitteret, jam Decretis, exemplisq; Legatorum damnata; & si semel Asyla admitteret in Gallorum gratiam, nulla spes amplius illa extinguendi infinito boni publici damno, scandaloq; fidelium. Cum ergo Lavardinus & Legatum se ferret, & nollet Asylo cedere, idem erat pro Legato agnoscere, quod causâ cadere; non ita in aliis negotiis: cum enim, exempli causâ, Legati ab Hispanis, Italivè Principibus mittuntur, violatæ immunitatis Ecclesiasticæ reis; non ideò mittuntur, ut pergant sub oculis ipsius Pontificis, apertoquè

con-

contemptu idem crimen repetere; sed ut excusent, aut deprecentur, aut aliorum negotiorum causâ. Non ita Lavardinus, cujus ingressus, & mora non potuit cum majori contemptu, injuriaq; conjungi præsentis Pontificis; suprà quoque ostendi, apud omnes Nationes receptum esse, ex similibus, aut etiam levioribus causis Legatos non admitti.

Jactat quidem Lavardinus: *Secretas instructiones Pontifici gratissimas se afferre.* At veniâ ipsius dixerim, quis credat meliora esse, quæ latent, quàm quæ monstrantur? cùm ex adverso soleant Galli piscantium more escam foris ostendere, hamum intus celare. Sed quidquid sit, non debuit Pontifex spe cujuscunque præmij tot abusus permittere, quot ex Asyulis nascuntur, nec mercatui exponere impunitatem peccandi.

Decimononò: (a) Miratur Lavardinus Advocatus, Pontifices Romanos tam severè in Gallos agere, tam indulgenter in Hispanos, cùm ab istis injuriis, & ab illis tot beneficiis affecti sint.

(a) Fol. 9.

ix. Nom

Rx. Non est mearum partium, Hispanorum, Gallorumq; in Romanam Sedem beneficia conferre: nemo negat multa Pontifices Gallis debere, sed & Gallos quoque multa Pontificibus. Exempla etiam Sixti V. eorumq; præcipuè Pontificum, qui in Gallias sedem transtulère, satis ostendunt, non esse in Hispanos tantam indulgentiam, quantam Galli declamant. Sed quidquid de aliis sit, ego solius Innocentij causam ago, nec ulla mihi de aliis cura. Innocentium verò eodem jure cum Hispaniæ Legato egisse, quo cum Galliæ, imò omnibus egit, notissimum est; nullum enim istorum aliâ conditione Romam admisit, quàm ut Asylis cederet. Intempestiva ergo, imò injusta querela est partialitatis Innocentium in ea causâ postulantis, in qua constat pari, eodemq; jure in omnes expertum esse.

XXIV. *Vigesimò, (a) Adjungit: Mirum non esse, si Lavardinus eas censuras moratus non sit, quas inutiles, imò perniciosas experientia, & Sixti V. Bulla, satis ostendunt.*

(a) Fdl. 9.

Rx. Sic

Et sic omninò Lutherani & Calvinistæ philosophantur. Si velithic Gallus censuras universim curandas non esse, hæresis est, nec calamo punienda. Si velit tunc excommunicationem metuentam non esse, cùm injusta est, aut ab eo lata, cui nulla auctoritas ferendi; verum dicit, sed nihil ad rem nostram. Si verò contendat, justa an injusta sit excommunicatio, non ex conscientia Judicis pendere, qui sententiam dixit sed ex arbitrio rei, qui punitus est, adeò ut spernere excommunicationem possit, seq; illi non subdere, quoties injustam censuerit; nihil dici potuit aut imprudentius, aut injustius: quando enim fereus puniri patietur, si ejus arbitrio, & non Judicis sedeat, de justitia aut injustitia poenæ judicare? nec poenâ teneatur, quoties injustam censuerit, aut saltem, quoties injustam dixerit? aut quis reus non dicet se injustè damnatum, si hoc sufficiat poenæ evadendæ? & quis credat tam malè institutam à Christo Ecclesiam, ut voluerit valorem poenæ ex arbitrio, judicioquè rei

rei pendere, id quod in nulla Republica, quamvis Barbara, valuit, valebitquè? Verum igitur est, neminem ligari posse injustis censuris; sed æquè verum, justæ illæ, an injustæ sint, ad judicem, ut cognoscat, non ad reum pertinere: nihil ergo Lavardinum, ejusquè adulatores juvat, quidquid opponunt de injustitia censurarum.

Sed quid si Pontifex injustè excommunicatione aliquem plectat? numquid illà tenebitur?

Eadem quæstio de quolibet Principum excitari potest: quid si enim Rex Galliæ injustè aliquem ad carceres damnet, numquid tenebitur carceres subire? Si dicas non teneri, modò constet omnium judicio de sententiæ iniquitate; non verò si solus reus, ejusvè amici iniquam esse querantur. Idem ego de Pontifice & Lavardino, isto reo, illo Judice dicam. Sicut enim sententiæ Christianissimi Regis nullius judicio subduntur, mutariquè non possunt, quia Galliæ Monarcha est; ita nequè Pon-

tificis, quia Monarcha Ecclesiæ. Sed audi Pontificis Gregorij Magni elegantem doctrinam: (a) *Sub magno moderamine Pastores Ecclesiæ solvere vel ligare debent; sed utrùm justè an injustè obliget Pastor, Pastoris tamen sententia gregi timenda est, ne is, qui subest, & cùm injustè fortè ligatur, ipsam obligationis sententiam ex alia culpa mereatur. Pastor ergo vel absolvere temerè vel ligare vereatur. Is autem, qui sub manu Pastoris est, ligari timeat vel injustè, nec Pastoris sui judicium temerè reprehendat, ne, etsi injustè ligatus est, ex ipsa tumida reprehensionis superbia culpa, quæ non erat, fiat.*

Quod verò adjungitur: *Constare experientiâ, excommunicationes noxias esse, malig. eventûs.*

Respondeo, hanc esse omnium rerum mortalium conditionem, ut profint, noceantquè, utcunq; utenti libuerit: nec est aliquid tam sacrum, quod abusus non lædat. Idem de excommunicationibus dicas, quæ multis profuere, ut Theodosio

(a) *S. Gregor. Magnus hom. 20. in Evang.*

fiō Magno , Carolo Magno , Henrico Magno ; nec ullus istorum ideò magnus non fuit , quia Sacerdotibus paruit ; nec minus Principum animæ quàm corpora remediis subduntur , quoties ægrotant nullo damno Majestatis. Quòd ergo aliquando excommunicatio nocuerit , non remedij , non medentis hæc culpa , sed ægrotantis fuit.

Quanta series malorum ex bellis nascitur ? num ideo tamen Ludovicus Galliæ Rex bello abstinuit , quo Belgium , Austrasiam , Alsatiā vastavit tanto impendio sanguinis Christiani ? quòd si dicant , multa esse mala , quæ ex bellis , armisq; proveniunt , sed multò plura fore , si bellare non liceat. Idem ego de Censuris , armisque Ecclesiasticis dicam , quibus , si metu mali uti non possis , multò pejora evenient ; quippe omnia Principibus licebunt , estquè amplissimum in Galliis exemplum , ubi Religio perierat , nisi vibratis Censuris , metuquè Regnī amittendi Henricus Magnus hæresin exuisset.

Sed nimius sum, cum rebus tam claris probandis, & totâ Ecclesiâ, semperquè receptis consumor. Fecit Innocentius, cum Lavardinum excommunicavit, quod Symmachus, quod Innocentius, quod Hadrianus, quod Ambrosius, quod alij Pontifices, Patresquè fecerunt. Faciat Lavardinus, quod Arcadius, quod Carolus Magnus, quod Theodosius aliiq; Imperatores, hoc est, pœniteat, sequè Pontifici subdat, nec erubescat post tot Imperatores culpam fateri. *Stravit*, inquit de Theodosio Ambrosius (a) *omne quo utebatur, Regium insigne: deflevit in Ecclesia publicè peccatum suum, quod ei aliorum fraude obrepserat; gemitu & lacrimis oravit veniam; quod privati erubescunt, non erubuit Imperator publicè agere pœnitentiam: nec ullus postea dies fuit, quo non illum doleret errorem. Utinam Lavardinus imitetur.*

XXV. *Vigesimo primò: (b) Laudat Advocatus Lavardini, Pontificis Innocentij*

(a) *S. Ambros. Orat. funeb. in Theodos.*

(b) *Fol. 10.*

centij ad Deum, preces: fed negat iftas in rebus agendis fufficere: *Audienda* effe Sapientum Confilia, interrogandos Canones, & ex horum præfcripto, non ex privatis inspirationibus fæpe fallacibus Bullas texendas effe. Si hæc Innocentius præftitif-
fet, nuperum contra Legatorum immuni-
tates Diploma vulgatum non fore. *Suf-*
fragia Cardinalium Bullæ adfcripta sub-
reptitia & extorta effe, nunquam enim Bul-
lam fuiſſe Cardinalibus exhibitam. Clau-
ſulam & formulam illam Bullæ inſertam,
videlicet, de confilio & confenſu fratrum
noſtrorum S. R. E. Cardinalium illuſoriam
effe, nec ex vero appoſitam, ſed ſtilo Can-
cellaria.

R. Fateor, cùm hunc hominem de O-
rationibus, de Inspirationibus, deq; fa-
cris Canonibus diſputantem audio, non
magis riſu abſtinere poſſe, quàm olim
Apelles, cùm ſutorem de Helena diſſe-
rentem. Quid enim in domo Lavardini
minùs curatur, quàm ſacri Canones, Ora-
tiones, ſanctæq; Inspirationes? & cujus
rei major, quàm iſtius ignorantia? Con-
ſultius ergo tacere, quàm ignota narrare.

Cæterum quid dici possit inverecundius, quàm non auditos esse, non consensisse Cardinales, nec Bullam eis communicatam; cùm tot Cardinalium nomina & suffragia sint Bullæ adscripta? num ergo velatis oculis subscripsere? Nihil planè de tam sacro Collegio, totquè egregiis Senatoribus dici potest indignius, quàm aut non vidisse, aut non perpendisse rem tanti momenti, & cui subscribebant; nam quod dicitur: *Extorta fuisse suffragia*; nimis nota calumnia est: quì enim Innocentius extorsit? vi, metu, an dolo? at hæc omnia nimis aliena à moderni Pontificis moribus, nec ullus Cardinalium de vi aut fraude conquestus, cùm tamen omnes subscripserint, Estreo & Maidalchino exceptis.

Nec dici potest, nimis festinatum esse; cùm constet jam primis annis Bullam fuisse conceptam, & undecim annorum spatio maturatam, idque toties Regi Christianissimo insinuatam, & ab isto, ejusquè Ministris Pontifici promissum est, in Galliis quoque receptum iri aliorum

rum Principum exemplo. Quot annis ergo opus est, ut maturum consilium dici possit, si undecim non sufficiunt? Quamquàm & injustitia Asylorum tam clara & omnibus nota, ut nec Theologis, nec consiliis, nec annis opus fuerit ad eam ostendendam.

Paucas infra lineas redit Auctor ad ipsam querelam videlicet: *Sapientissimos quosquè S. Collegij non admitti ad Pontificis consilia, quibus nunc Europa turbatur.*

Ænigma videri possit, quos Gallus intelligat iis verbis: *Sapientissimos quosquè.* Constat enim Bullæ contra Asyla Cardinales Cibum, Ottobonum, Cassanatam, Columnam, Azolinum, Pium, Chisium, Medici, Norfolcium, aliosquè subscripsisse, Estreo tantùm & Maidalchino exceptis; oportet ergo Estreum & Maidalchinum solos inter *sapientissimos* reponi; at ego hætenus credebam solos non esse.

XXVI. *Vigesimo secundò:* (a) Conqueritur, *Pontificem Innocentium ex con-*

H 4

siliis

(a) *Fol. 10.*

siliis pendere Religiosorum ignorantium, rerumq³ mundi expertium; nec non Prælatorum minoris sortis, quibus unica cura genio Pontificis adulari, à quo extolli momento possint.

Rx. Quæ de Religiosis ignorantibus, minutisq³ Prælatis notâ Advocatis modestiâ declamantur, longâ refutatione non egent. In causa Asylorum consilia cum Religiosis collata non credo, saltem me latet; nec opus erat, re toties, & à tam multis Pontificibus jam olim decisâ. In causa verò Regaliæ, & quatuor Propositionum Conventûs Parisiensis, scripsere quidem Religiosi solito more, quippe jam à primis Ecclesiæ annis ea pars Religiosis servata, ut veritati succurrerent, quoties impugnabatur. Fecerunt ergo Religiosi, quod semper factum, & quod debebant. Ceterum an ignorantes illi sint, ex libris, quos scripserunt, agnoscas; illi testimonium dicent, quinam postulari ignorantia debeant, qui Regi, an qui Pontifici serviunt. Planè nemo totâ Galliâ reperi-
tus est, qui hisce ignorantibus respondere
sit

sit ausus, aut qui potuerit; adeò veritas prævaluit, & æquitas causæ. Quòd si velint, ideò Religiosos, qui pro veritate scripserunt, ignorantes esse, quia scientiam Principib⁹ adulandi non callent, & quam Gregorius Magnus egregiè depinxit; verum dicunt, fateorq; ignorantissimos esse, nulloq; modo cum aulicis Lavardini, aut cum Regis Confessario posse comparari. Sic verò illam Gregorius descripsit: (a) *Deridetur justì simplicitas. Hujus mundi sapientia est, cor machinationibus tegere, sensum verbis velare; quæ falsa sunt, vera ostendere, quæ vera sunt, falsa demonstrare: hoc qui sciunt, ceteros despiciendo superbiunt. At contra sapientia justorum est, nihil per ostensionem fingere, sensum verbis aperire, falsa devitare, pro veritate contumeliam lucrum reputare. Sed hæc justorum simplicitas deridetur, quia ab hujus mundi sapientibus puritatis virtus fatuitas creditur. Omne enim quod innocenter agitur, ab eis procul dubio fatuum reputatur.*

H 5

Quæ

(a) S. Gregor. lib. 10. moral. c. 16.)

Quæ de *Minutis Prælatiis* dicuntur, eos videlicet spe præmiorum Pontificis genio adulari, nescio quem feriant; credo enimverò nullum in palatio Pontificis morari tam minutum Prælatorum, qui non pluribus æquivaleat Lavardini spathariis, & quot fasces Advocatorum, quotquæ Talonii sufficient, ut unum ex minutis hisce Prælatiis componant? Multò minùs constat mihi, quâ illi spe ducantur; illud certum est, nemini hætenùs, qui in Regaliæ & quatuor propositi-
onum conflictu causam veritatis egerunt, meliorem fortunam provenisse, aut à Pontifice auctum esse, si Cardinalem Aguirre excipias, cui excellens doctrina exemplo Baronij, Bellarmini, Cajetani, aliorumquæ purpuram meruit: ego, si pro lucro, non veritate certandum sit, malim Parisiis operam locare, quàm Romæ, spem enim provocarent Maimburgi exempla, ac præsertim Regii Confessarii, cujus familia ex tenui & arida, (a) adeò opibus aucta est, ut pretio ducenties millium

(a) *Capitanno della Porta del Louvre.*

millium Francorum excubias Regii Palatii coëmerit , præter alia nec pauca emolumenta. Tanti videlicet pretii est Theologia aulicis grata : nihil simile Romæ.

Paria ferè sunt , quæ in sua Apologia Ministris Pontificiis Lavardinus objecit, videlicet : *Omnium contentionum, quæ Pontificem inter, Regemquè agitantur, causam temeritati ac insolentia Ministrorum adscribendam esse, qui ob Pontificis defessam annis, morbisquè atatem, negotiis admoti illius gratiâ abutantur, Galliæq; turbandæ omnem lapidem moveant.*

Ita placuit Lavardino loqui, qui specie humanitatis tunc maximè Pontificem arguit, cùm maximè excusat. Quid enim pejus de Principe dicas, quàm quòd Ministris utatur temerariis, insolentibus, ac hostibus publicæ pacis, & istis non mole tantùm Principatûs, sed etiam animum ac gratiam suam committat ? Planè ingentia cogitanti ; quæ in componenda disciplina Ecclesiastica, in abusibus corrigendis, in profligandis hære-

H 6 sibus

sibus, ac præsertim in Turcico imperio
 propè ad internecionem usquè delendo,
 à moderno Pontifice felicissimè peracta
 sunt, adeò ut hac in re non omnium tan-
 tùm retrò Pontificum memoriam, sed
 etiam omnium mortalium spes & vota
 superârit; oportet, inquam, ingenuè fa-
 teri, Ministros Innocentii non temera-
 rios, non insolentes esse, sed tales, quo-
 rum merita Galli imitentur, sequè feli-
 ces ducant, si aliquam tantùm partem
 eorum gloriæ ac virtutis consequi pos-
 sint; nam quòd iis odium Gallicæ Nati-
 onis Lavardinus objicit, compertum est,
 non posse odij accusari in ea causa, quæ
 non solos Gallia, sed omnium Regno-
 rum, Principumquè Legatos tangit, &
 quorum nemo hætenùs conquestus est,
 sibi injuriam fieri. Nulla ergo iu causa
 tam justa, tamquè omnibus probata Mi-
 nistrorum Pontificis culpa, sed eorum
 tantùm, qui contra omnium Principum
 exempla retinere potentiâ volunt, quod
 jure non possunt, aliosquè injuriæ ac odij
 postu-

postulant, qui sua, imò qui Christi patrimonium usurpari non sinunt.

Quamquàm quid frustrà ego excusandis Ministris laboro, quando nemini compertum non est, hodiernum Pontificem nunquàm ex Ministrorum consiliis pependisse, sed conscium potestatis, ac muneris sui, ac præsertim cælestis patrocinij, rebus lentè discussis omnia arbitrio suo ac prudentiâ metiri, nec aliis imperandi, sed obsequendi munus relinquere, adeò, ut si quæ culpa est, soli Pontifici adscribi debeat, rerum omnium, quæ fiunt, & conscio, & arbitro; quamquàm nec culpa, nec imprudentia dici potest, quod tanto tempore, tamq; maturis consiliis, assensuquè totius ferè sacri Collegij, imò totius Orbis terrarum, si paucos Gallorum excipias, probatum, decisumquè est. Cæterum ex hoc quoquè Lavardino ignosci potest; quando Romam, nuper ingressus nec Pontificis mores, nec integritatem Ministrorum satis comperitam habuit, & ideò utrosquè ex aulæ genio æstimavit.

XXVII. *Vigesimotertiò* : Ingenti & magnificâ digressionem à Legatorum Aſſyſis ad Conventûs Pariſienſis propoſitiones converſus : *Ignorantiſſimos eſſe, dicit, qui declarationem Pariſienſem novitatis accuſet, cùm conſtet, antiquiſſimam eſſe Gallicanæ Eccleſiæ ſententiam.* Quòd ſi privati aliqui Doctores, aut etiam ipſa Synodi Gallicanæ, ut illæ anni 1614. & 1615. contrarium docuerint, reliquias fuiſſe infortunati illius fœderis, quod *Ligam* vocant; tunc enim Pontificis emiſſarios alienis doctrinis Galliam imbuiffe; ac præſertim Cardinales Joſoſam, Peronium, Surdium: Ducesq; ac Mareſcallum Guiſium Majeſtatem, Eſpernonium, & Ancreum conatos eſſe Parliamentum, ac facultatem Theologicam pervertere, ſed nunquàm potuiſſe. Antiftites, qui Pariſienſi ſynodo interfuere. & merito eminentis doctrinæ, & Zelo Religionis, & converſione tot hæreticorum (quos invictis rationibus domuerunt) tantum ſibi famæ comparâſſe, ut ſufficiat illorum auctoritas ſuſtinenda nupera Declarationi, ac hominibus perſuadendis nullo privato affectu

fectu præventis. Ex adverfo nuper ad purpuram promotos multò inferiori merito effe, nullaq; re aliâ commendabiles, quàm odio Gallorum, vastisq; voluminibus, quæ fabulis, vanisq; ac millies refutatis rationibus infarferint.

R. Sic folent victi: mordent & lacerant, cùm arma perdidere. Ignorantiffimos dicit, qui nuperam Declarationem Conventûs Parisienfis novitatis accusant. At lubeat Lavardino, ejusq; Ministris ea perlegere, quæ à Cardinali Aquirre, & Auctore Gallia Vindicatæ scripto vulgata sunt, videbitq; Parisiensem Declarationem tam alienam effe à Patrum, ac præsertim Ecclesiæ Gallicanæ doctrina, ut nihil magis; nec mihi, quæ illic dicta sunt, & quibus Galli respondere nihil possunt, repetere animus est, quippe in alio argumento versamur. Perronij & Richelij Cardinalium doctrina, & in Galliam merita mundo notiora sunt, quàm calumniis obscurari possint; & quis in nupero Parisiensi Conventu sedit, qui cum Perronio & Richelio possit comparari?

Et

Et illud quoq; risu dignum: *Perronij, & Galliae Synodorum doctrinam reliquias fuisse foederis Galliis infausti.*

Nimirum Constantinopolitanum, Ephesinum, Chalcedonense, Lateranense, Lugdunense, Ferrariense Concilia: sancti quoque Cirillus, Athanasius, Cyprianus, Damasus, Bernard⁹, Antoninus, Bonaventura, Thomas, aliique Patres, qui Parisiensi declarationi adversantur; reliquiae dici possunt foederis sacri. Illud verius dixissent, Religionem Catholicam reliquias esse foederis sacri, nisi enim hoc esset, nunquam Henrici filij, Neposque, sicque nunquam Gallia haeresin exuisset.

Quod additur de doctrina Galliae Episcoporum, parum interest meae, docti an indocti fuerint, qui Parisiis sederunt; nam & Nestorius & Arius, & Calvinus docti fuere. Plures in Gallia fuisse, qui purpuram ambierint, credo: plures meruisse, quam qui nuper promoti, ignoro; Pontificis judicium fuit, qui tamen nec Galliam omisit, quamquam non illos elegerit.

elegerit, quibus major cura tantam dignitatem optandi, quàm merendi. Nec ob libros eruditissimè scriptos alium quàm Cardinalem Aguirre evectum scio. Nullum huic in Gallos odium, sed unus amor veritatis, & hæc tam invictè probata, ut nihil Gallis occurrerit, quod responderent; tam etiam modestè proposita, ut habeant adversarij, quod imitentur: sed cùm nec imitari modestiam velint, nec respondere rationibus possint, ad convitia & injurias appellant, & molem libri accusant, cùm opprimuntur mole veritatis.

Auctoritatem quod attinet Conventûs Parisiensis, nullius planè momenti est.

Nam *primò* constat, Patres, qui huic Conventui assederunt, alios odio & vindicandi cupidine; alios metu corruptos fuisse. Repetantur memoriâ, quæ Pontifex contra Regaliam, proq; libertate Gallicanæ Ecclesiæ fecit, & ex adverso quàm iniquis animis à Galliæ Episcopis (quorum tamen causa agebatur) ac præsertim

Tho-

Tholosano & Parisiensi Archiepiscopis accepta fuerint, & quàm sœva ab illis persecutio secuta. Relegantur etiam, quæ ipsi Galliæ Antistites litteris (a) ad Pontificem datis de suo metu professi sunt, quæq; illis Pontifex respondit; & continuo patebit, verum esse, quod dixi, in Conventu Parisiensi omnia odio, metuq; agitata esse. Et quid boni speres, ubi odium præsedet, metusq; subscripsit? & quoties experimur, etiam sapientissimos hominum, quoties his affectibus rapiuntur, multa facere & dicere, quorum ipsos poeniteat, aut saltem pudeat? Nota sunt Tertulliani, Origenis, Luciferi, Photij aliorumq; exempla.

Secundò. Nulla Conventui Parisiensi facultas contra omnium Patrum, Conciliorum, ac præsertim Gallicanæ Ecclesiæ sententiam aliquid statuendi. Qui enim Conventus Parisiensis, ut cum tota retrò Gallicana Ecclesia comparari debeat? quantoquè minus tot Conciliis & Patribus præferri? aut si auctoritas & doctrina te movet, cur non magis movet,

(a) *Anno 1682.*

tot

tot Patrum, tot Conciliorum, imò Eccle-
fiæ totius, quàm paucorum, quos odium,
metus, vindicta, adulatio perverterant?

Tertiò. Et quid miraris Parifiensem
Conventum errâffe, quando conftat ob
fimiles ferè caufas Antiochense, Arimi-
nenfe, Ephesinum fecundum, & alia
Concilia errâffe, in quibus longè major
& numerus, & doctrina, quàm in nupero
Parifiensi: & quis nescit etiam hæreticis
suos Conventus & fynodos effe, in qui-
bus fortè non minor doctrina quàm Pa-
rifiis, fi hæc fufficeret: non ergo ab istis
veritas quærenda, fed ab illo, cui Chriftus
dixit: *Ego pro te rogavi, ut non deficiat
fides tua, & tu aliquando conversus con-
firma fratres tuos.*

Quartò. Adde & Regaliæ, & quatuor
Propositionum caufas ad majores, imò
maximas pertinere, quæ etiam Gallorum
testimonio foli Pontifici refervantur;
hic ergo folus & unicus Judex; at plus
valet, magisque obligat unius Judicis
fententia, quàm mille aliorum judicia,
quibus nulla auctoritas decidendi. De-
nique

nique certum est, & alibi, invictequè probatum, Concilia à Pontifice improbata nullius esse auctoritatis; quantò ergo minoris auctoritatis Conventus Parisiensis decreta? Poterit ergo Episcopis Parisiensibus ab Innocentio repeti, quod olim Ariminensibus à Damaso dictum est: (a) *Numerus Episcoporum, quierant Arimini (Parisiis) congregati, præjudicii vim habere non debent, præsertim cum formula illa concepta sit, nequè Episcopo Romano (cujus ante omnia sententia expectanda erat) neque aliis ei consentientibus.*

Vigesimo quartò: Multa subdit de libertatibus Ecclesiæ Gallicanæ, quas negat pontificum privilegiis deberi. Sed cum hoc nihil pertineat ad præsens argumentum, sitquè integris libris confutatum, alto Gallorum silentio, nihil habeo quod addam, præter illud Apoli: (b) *In libertatem vocati estis fratres; tantum ne libertatem in occasionem detis carnis.*

XXVIII. Vi.

(a) *Theodor. l. 2. c. 22.*

(b) *Ad Galat. 5.*

XXVIII. *Vigefimo quintò*: Nègat Leges, Bullasq; à Pontifice latas ad Principum Oratores, eorumquè domus, & viciniam, feu quarertium extendi poffe.

(a) *Legatum enim personam Principis, ejusquè supremam, & independentem auctoritatem repræfentare; ædes Legati, effe ædes Principis, nec proinde Pontificis legibus comprehendi. Hæc Lavardino comperta, & ideò nihil Innocentij Bullæ deferre potuiſſe.*

R. Si hæc ita habent; ergo non ſolum Romæ Regiis Legatis jus Aſyli & Quarterii, ſed omnibus Principum Legatis, & in omnibus aulis competet, ac præſertim Pariſiis. Legato pontificis. Hic enim eâdem ratione, quâ Lavardinus cauſari poterit: ſe pontificis ſupremam & independentem auctoritatem referre: ædes ſuas, ædes effe pontificis, nullisque Regiis Legibus ſubjacere, nec à Regiis ſatellitibus viciniam ſuam percurri poſſe. Quæ omnia ſi nec Pariſiis, alibi locum habent, cur habeant Romæ?

(a) *Folio. 13.*

an verò soli Galliæ Legati Principem suum repræsentant? Et si esse Galliæ Legatum est legitimus titulus Asyla & Quarterium obtinendi, cur hoc tantùm Romæ, & non alibi gentium? Certum igitur est omnium Principum Gentiumquè exemplo, Jus Asyli & Quarterii saltem extra proprias ædes, multoque magis in tota vicinia Legatis Principum nec deberi, nec dari; malè igitur à Lavardino petitur titulo Legationis.

Taceo Lavardinum Legatum non esse, cùm, ut sæpè repetitum, non solius mittentis consensus Legatos faciat, sed etiam Principis, ad quem mittitur.

Taceo in nupera Innocentii Bulla non contineri Legem verè humanam, sed divinam & naturalem (cui omnes non tantùm Legati, sed etiam Principes subduntur) videlicet: *Non invadendi, nec retinendi aliena domino invito.*

Taceo denique Legatos etiam agnitos, receptosquè multis ex causis remitti posse, præsertim cùm hostilia moliuntur, alienam Jurisdictionem invadunt, aut
invasâ

invasâ abstinere nolunt, cumq; Principi, ejusq; Ministris Justitiæ insultant, ut nuper Lavardinus.

XXIX. *Vigesimo sexto*: (a) Objicit possessionem immemoriam.

R. Hoc unicum est argumentum, quo decipi solent simplices, rerumq; ignari; & tamen instar aliorum planè vanissimum: imò tantum abest, præscriptionem obtendi posse, ut potius hoc ipsum jus immunitatis & Asyli pro exemplo serviat rerum impræscriptibilium; adeò ut si in scholis Juris-Consultorum quæ- ratur: *Quodnam sit paradigma rerum, quæ nunquam præscriptæ sunt, & nunquam præscribi possint?* Respondere debeat: *Jus Asyli à Lavardino Romæ petitum*; in hoc enim uno omnes defectus præscriptionis conveniunt.

Piget me ad ista devolvi, sed postquam Gallus hoc argumento uti voluit, in eoq; summam rei collocare, non possum silere. Nego ergo hoc jus Asyli à Gallis præscriptum esse, aut aliquando potuisse præscribi.

(a) *Fol. 14.*

Nam

Nam *primo* Præscriptio non est Divini aut naturalis, sed humani juris, ac civili lege inducta. Unde si supremus Princeps, qui Civili Lege non tenetur, declararet se nolle, ut res aliqua intra suum Principatum præscribatur, certum est præscribi non posse. At Pontifices Romani à Julio III. usque ad Modernum Pontificem semper & factis, & severissimis Legibus professi sunt, nolle se, ut hujusmodi immunitas tanquam publicæ quieti, Gentium juri, humanisque commerciis adversa præscriberetur; non ergo præscribi potuit.

Secundò. Tota & unica ratio, ob quam Præscriptio admissa est, illa fuit; ne jura & Dominia rerum incerta essent, si multis annis, quieteq; ab aliquo possessa restitui deberent. At hæc ratio in nostro casu locum non habet: nec enim incertum esse potest, ad quos pertineat jus capiendi, puniendiq; reos in tota Romana urbe, & locis à Lavardino prætensis; cum certissimum sit ad Romanos Pontifices pertinere, ab iisque semper exercitum, ut

ex Archivis, Protocollis, cōmuni totius urbis testimonio, ac confessione etiam Gallorum constat, quod suprà ostendimus, cū de Pisana conventionē ageretur.

Tertiò. Ad præscriptionem requiritur bona fides in legitimo aliquo titulo sive vero, sive præsumpto, fundata, adeò ut sublatâ bonâ fide, ne mille quidem annorum possessio præscriptionem pariat; idq; ut Præscriptio à furto & rapina distinguatur: at in nostro casu, quæ bona fides, quisvè legitimus titulus aut esse, aut præsumi potest, quando Summi Pontifices legitimi istarum rerum & unici Iudices toties & tam enixè publicisq; edictis hæc Asyla prohibuere, imò abusum appellârunt *abominabilem, detestandum, publicæ pacis perturbativum, fomitem rebellionis, pessimi, valdequè perniciosi exempli, rem enormem, nimiam corruptelam, ausum temerarium, abominabile & detestandum nomen*, fierinè, inquam, potest, ut bona fides ac legitimus Titulus esse vel præsumi possit, in rebus, quas ex Prin-

I cipis

cipis edicto constat, abominabiles, enormes, detestandas esse, &c. Quod si nec bona fides, nec titulus legitimus, ergo nec præscriptio.

Quartò. Certum quoquè est, sine continuata & nunquam interrupta possessione nec esse, nec concipi posse ullam Præscriptionem; imò hæc nihil aliud est, quàm continuatio possessionis. At in argumento, de quo agimus, quæ fieri potest continuatam fuisse possessionem, quando ab omnibus Pontificibus tot edictis, tot actibus, exemplisq; in contrarium editis abrupta & truncata est, quoties micare & prodire ausa? Quis vocet adultam, quæ toties in cunis oppressa, quoties nata?

At Legati sæpè conati sunt hanc immunitatem sibi vendicare, imò aliquamdiù eam usi sunt.

R. Aliud est conatus & factum; aliud præscriptio; si conatus & facta ad præscriptionem sufficiant, jam dudum patrocínio præscriptionis homicidia, adulteria, perjuria, & omnia flagitia liceant, quæ

quæ multò pluribus conatibus, exemplisque, quàm immunitates Lavardini nituntur.

Quòd fi dicas: *Hæc juri Divino & naturali adversari, & ideò præscribi non posse.*

Respondebo non minùs esse juris naturalis, Diviniq; hæc præcepta, quæ probasi totius Juris-prudentiæ Justinianus posuit, videlicet: *Neminem ledere, jus suum unicuique tribuere;* quæ palàm est violari usurpato à Legatis jure Asylo-
rum, quæ enim major læsio & fraudatio juris alieni esse potest, quàm supremum Principem & Pontificem magnâ parte Jurisdictionis in Urbem Romanam privare, & flagitiis, ne deleri possint, patrocini-um præstare paratâ impunitate?

Quintò: Æquè certum est, quæ jurī publico, & communi quieti repugnant, nullo tempore præscribi; at verò quid magis repugnat, quàm hoc Asylo-
rum jus, quo datâ flagitiis securitate & licentiâ, necesse est publicam quietem pro-
scribi. Ipsi Galli, quando contra Jus Re-
galia longissimam possessionem, ac supra

omnem memoriam pro Ecclesiis allegari audierunt, quid aliud & sapius respondere, quàm juribus ad Coronam & Principatum pertinentibus præscribi non posse? At verò jus crimina puniendi multò magis Coronæ, supremæq; auctoritati annexum est, quàm jus Regaliæ: nam sine hoc possunt Regna & Principatus consistere, imò si Galliam excipias, nullum Regnum hoc jure potitur; non verò conservari Regna possunt sine auctoritate necessaria puniendi sceleratos; id enim ad publicam quietem & pacem pertinet, cui promovendæ Principatus instituti sunt.

Sextò. Denique Præscriptioni complendæ tempus necessarium est; nec enim quovis die aut anno aliena jura præscribi possunt: sed contra privatarum Ecclesiarum jura quadraginta annorum tempus necessarium est; contra verò jura Romano Ecclesiæ centum annorum. At Legati, quamvis cum aliis urbis Magnatibus usurpare hoc jus jam Julij III. ætate conati sint, eo tamen semper expulsi, co-

ctique

etique cedere, liberâ iustitiâ & omnibus locis exercitâ usq; ad annum 1670. quando sub Clemente X. ob causas nuper libatas, non edictis quidem, aut pœnis, nec etiam satellitum excursu Asyla Legatorum turbata sunt; sed tantum precibus, querelisq; apud Principes actum, ut hunc usum extingui permitterent. Idq; multò efficacius à moderno Pontifice, quod solum sufficeret impediendæ præscriptioni. Demus ergo (quamvis ob causam modò allegatam ne hoc quidem concedi possit) duodeviginti annos elapsos esse; quantum id temporis est, ut non dico contra Pontificem, sed ne quidem contra privatum Civem præscribi possit? nihil ergo Lavardinum juvat ostentata Præscriptio.

X X X. *Vigesimo septimò*: Conqueritur, violari Pisanam Conventionem.

R. Pisanâ Conventione nihil aliud contineri, quàm ut Legatis Galliæ honor exhibeatur tanto characteri debitus, non verò, ut jure Asyli gaudeant, præsertim, quando alij Principes ei renuntiârunt.

Imò Alexander VII. constantissimè negavit auctoritatem suam Asylo præstare, illudquè ratum habere, ut ex publicis documentis constat. Aliud est ergo honor Legatis debitus, aliud Asylum, neque hoc ad jura Legatorum pertinere, omnium, qui de hac re scripserunt, testimoniis constat, patetquè aliorum Principum exemplo. Deinde Pisana Conventio de Legatis loquitur, qualis Lavardinus non est, quando, ut suprà jam monui, non solius mittentis imperium Legatum faciat, sed etiam consensus Principis, ad quem mittitur.

XXXI. *Vigesimo octavo*: Multis locis conqueritur Lavardini Orator: *Moder-num Pontificem Innocentium malè in Gallos animatum esse; idque toto sui Pontificatus tempore multis, magnisque exemplis ostendisse.*

R. Posset Innocentius respondere, quod olim Elias similis culpæ à Rege postulatus: cum enim illum istis verbis Achab alloqueretur: *Tu ne es ille, qui conturbas Israël?* Respondit: *Non ego turba-*

vi Israël, fed tu: qui dereliquifti mandatum Domini. Si Galli jufte peterent, & quæ concedi poffent, meritò & ante alios audirentur, Cum verò illa petant, quæ confcientia non admittit, quis amabo caufa repulfæ? qui petit, an qui negat indigna? permittant Galli aliquem locum Confscientiæ, nec injuriam aut odium putent Regem foli Deo poftponi.

Recenfebo, de quibus Galli caufantur, fe à Pontifice exauditos non effe, fitque Lectori judicium, odium an neceffitas dici poffit, quidquid Pontifex Gallis negavit?

Primò enim Rex Chriftianiffimus Jus Regaliæ propriâ auctoritate ad Ecclefias duplo plures extendit, quàm quæ antea huic fervituti fubjectæ erant, imò etiam ad Ecclefiam regularem, qualis fuit Apamiensis idque contra Lugdunenfis Concilij Decreta, contra præfcriptionem immemoriam, contra Leges omnium retrò Galliæ Regum, & denique contra jus & immunitatem tot Ecclefiarum.

Secundo. Vicarij Generales ab Abamiensi Capitulo Canonicè electi, Regiâ auctoritate operaquè Archiepiscopi Tholosani expulsi sunt, aliiquè intrusi, Canonicis omnibus Regularibus Apamiensis Ecclesiæ direptionibus, carceribus, exilio pulsus, totoquè Capitulo illius Ecclesiæ dissipato; unde funestum schisma secutum, duratquè in hunc diem.

Tertiò. Nominatio in aliquibus Monasteriis Urbanissarum Sanctimonialium Regi vindicata, suppressis liberis Electionibus, intrusisquè Titularibus Abbatissis, unde summa ac plena scandali inter sacras Virgines exorta confusio.

Quartò. Oppressio Cluniacensis Abbatix, in qua, licèt vi Concordatorum jus eligendi sit penes Religiosos, & ij quendam Patrem Beuveron canonicè eligissent, hoc tamen renuntiare coacto, puni- toquè longo exilio substitutus est Bullo- nius Cardinalis, quem nunquam Ponti- fex adduci potuit, ut confirmaret, quip- pe contra Canones intrusum, cumquè in- signi injuria, damnoquè canonicè electi.

Quintò

Quintò. Extincta quoq; sunt Regiâ auctoritate quàm plurima Leproforia, & loca pia (quorum plurima ad Ordinem S. Lazari spectabant) & Regis juffu invalidorum Xenodochio unita, quod noluit Pontifex ratum habere.

Sextò. Ufurpata quoq; nominatio Abbatum in quàm plurimis Galliæ Monasteriis, aliisq; Provinciis bello quæfitis, cum certa clade Inftituti & Disciplinæ Regularis, quod nunquàm Pontifex probavit.

Septimò. Nominati quoq; sunt ad vacantes Ecclefias duo ex illis Prælatiſ, qui anno 1682. Conventui Pariſienſi aſſedere, novamq; & omnibus Eccleſiæ, Galliæq; Patribus adverſam doctrinam inducere moliti; ac etiam pro Regalia deciderunt, excluſo Pontifice, cujus tamen judicio cauſas majores reſervari certiffima Patrum Regula eſt, etiam à Maimburgo, aliisq; Gallis admiſſa. Hos verò à Rege nominatos Epifcopos tanquàm ſuſpectâ, ſacrisq; Canonib⁹ adverſâ doctrinâ infectos Pontifex reſpuit; unde Gallianiſimum obfirmârunt, ut ne quidê alios Epifcopos

ferè triginta proponerent, ingenti vacantium Ecclesiarum damno.

Octavò. Taceo novam, & Gallicâ pietate indignam persecutionem, quâ contra Ecclesiæ immunitatem tot insignes, præclarique Sacerdotes, & Ecclesiasticis dignitatibus aucti, carceribus, proscriptionibus, exiliisque puniti sunt. Hæc nunquam Innocentius probare potuit, & qui posset à sacris Canonibus, ab Ecclesiæ Gallicanæ institutis, & Legibus Divinis, humanisque adeò aliena? Hinc Gallorum querelæ, qui & Pontificem, & Pontificis Ministros odij aculant, quòd non velint, quæ non licent, quodque non possint Regionum Ministrorum cupiditatibus adulari; & Deum, Conscientiam, Regemque prodere tam turpi ac indignâ conniventia.

XXXII. *Ultimò.* denique sparsim hic Auctor minatur: (quod etiam Lavardinus in fine Apologiæ suæ fecerat) *Si quis reverentiæ honori defuerit Legato tanti Monarchæ debito, reum illum fore omnium malorum, quæ ex irata, offensaque Regis Majestate provenire possint.* R. Jam

R. Jam observatum est, Asylum non pertinere ad honores ac jura Legatorum, nec Lavardinum posse Legatum dici, sicquè nullam justam causam prætexi Regiæ indignationis. Quòd si tamen, ut Lavardinus minatur, Christianissimo Regi placuerit armis hanc causam finire, & quod jure nō potuit, vi ac potentiâ exprimere, nihil aliud Innocentio supererit, quàm ut patientiâ Pontifice dignâ, quidquid Regi visum fuerit, intrepidè patiat, sequè non Achillis, aut Hectoris, sed Piscatoris successorem meminerit, cui, ut gladio abstineret, à Christo imperatum est. Non ergo Christianissimo Regi, Ecclesiæq; Primogenito, aut arma, aut acies opponet, sed reverentiam Pontifici debitam. Dicetquè Innocentius, quod olim & in simili causa Ambrosius: (a) *Meministis, quod lectum est, Nabuthem sanctum verum possessorem vineæ suæ interpellatum petitione Regiâ, ut vineam suam daret, respondisse: absit ut ego tradam Patrum meorum hereditatem, si ille vineam suam non tradidit,*

nos trademus Ecclesiam Christi? Quid igitur responsum est à me contumaciter? Dixi enim conventus absit, ut tradā Christi hereditatem. Respondi ego, quod Sacerdotis est, quòd Imperatoris est, faciat Imperator, prius est ut animam mihi, quàm fidem aufferat. Si à me peteret, quod meum esset, id est fundum meum, argentum meum jus huiusmodi meum, non refragarer; Verum ea, quæ Divina, non esse Imperatoria potestatis: si Patrimonium meum petitis, invadite: si corpus, occurrā, vultis in vincula rapere, vultis in mortem? voluptati est mihi, non ego me vallabo circumfusione populorum, nec altaria tenebo vitam obsecrans, sed pro altaribus gratiùs immolabor.

Hæc olim Ambrosius Valentiniano

Imperatori. Hæc iterum Inno-

centius Ludovico

Regi.

F I N I S.

* *

RE-



REFUTATIO TALONII

REGII ADVOCATI

Ex Gallico in Latinum Ser-
monem translata in gratiam
Veritatis.



*Qui maledixerit Patri
suo, &c. Exod. 21. 17.
Principi populi tui non
maledices. Exod. 22.
28. Verè frustra im-*

*pugnatur, qui apud impios & infidos
impietatis arcessitur, cum fidei sit
magister. Ambros. in Psal. 118.*



Comparuit nuper audax
quædam declamatio à
Talonio typis vulgata,
sententiæquè præfixa, quam Pari-
sienſe Parlamentum contra Bul-
lam Innocentij XI. dixit; hoc eſt,
contra illud Diploma, quo Pon-
tifex Romanus illos omnes ana-
themate percellit, qui Aſyli aut
immunitatum (quas Franchitias
vocant) prætextu ſcleratis latro-
nibus, proſcriptisquè patroci-
nium & ſecuritatem præſtant, &
illos juſtitia, meritisq; pœnis ſub-
ducunt.

Planè niſi hoc Talonij folium
palàm, totaquè Lutetiâ viſum
eſſet, ac inſuper nomen Parla-
menti oſtentâſſet; quis unquam
credidiſſet tam infame ſcriptum,
totquè

totquē in Romanum Pontificem,
sedemquē Apostolicam injuriis
sparsum sub Rege sapientiā &
Religione præcipuē aut tolera-
tum, aut Advocati Generalis ca-
lamo emissum iri, jam annis,
studiisque forensibus cani? Con-
stat equidem flagrante juventute
multa ab hoc Togato contra
Romanam Ecclesiam ex Lanoij
scriptis profusa esse, illius, in-
quam, Lanoij, cui non alius scri-
bendi scopus, quàm ut detrahe-
ret Pontificum auctoritati. Cæ-
terum sperari poterat ætate an-
nis & experientiā rerum auctābi-
lem tandem minutum iri, ardo-
remquē juventutis, quo tam mul-
ta contra Sedem Apostolicam
inconsultè latraverat; Sed & re-
verentia non Ecclesiæ tantum
Gal-

Gallicanæ debita, sed toti Catholico Orbi (cujus caput visibile, Christiꝑ; Vicarium tam indignè invaserat) & metus quoꝑ; omnium animos in se provocandi prohibere eum debuit tam pudendo facinore. Nam cùm viginti abhinc annis orationem vulgâſſet erroribus, injuriisꝑ; plenam; continuò Clerus Gallicanus contra illam querelis supplicique ad Regem libello pugnavit, & schismatis, hæresisque convicit; quis non crederet cautiùs progressurum jam semel & tam graviter ictum? & tamen nunquam insolentius in Pontificem, sedemꝑ; Apostolicam, quàm in nupero libello debacchatus est, nescias sponte suâ, nativaꝑ; intemperie id fecerit, an ut aulæ blandiretur,

Sanè

Sanè in tanti momenti negotio , quodquè Europam totam concusserat , nemo non expectabat , ex historiis , legibus , ipsisquè visceribus causæ magnum aliquid à Talonio productum iri , & par tam injustæ , vanæq; moli sustinendæ . Nam quantis & quàm validis rationibus opus , ut hominibus persuadeas , licere Gallis in alieno Principatu , inquè ipsa Metropoli supremâ uti potestate Principe invito ? Et tandem jus illud immunitatum & Franchitiarum tantâ contentione à Talonio defensum , quid aliud est , quàm potestas Principem in suis provinciis auctoritate privandi ; alienam jurisdictionem invadendi ; impunitatem omnibus flagitiis parandi ; in-

com-

communi totius Orbis Patria (sic enim Romam Talonius appellat) & in qua summa necessitas disciplinæ , leges omnes perversendi ; & denique tot hominum millia , quæ ex toto Orbe Romam conveniunt , sceleratorum arbitrio & licentiæ exponendi , nullo justitiæ præsidio ? En tibi egregiam Franchitiarum ideam ! & tamen hæc ipsa est , cui tanto studio Lavardinus laborat. Si damna & pernicipem reputes , quæ ex hoc jure Asyli proveniunt , omninò concludas , etiamsi aliquâ ratione niteretur , à Rege Christianissimo abdicandum esse , idque ad ejus pietatem & justitiam pertinere ; ne videlicet tot flagitiorum se reum constituat , quibus usurpatum hoc privilegium,

gium aut causam præbet, aut occasionem.

At Talonius in vulgata nuper invectiva non argumentis, non probationibus causam Asylorum propugnat, nec saltem pompâ illâ mendicatæ eruditionis, quam alibi ostentat: nihil de usu, nihil de possessione Regum Galliæ post fundatam Monarchiam, nihil, inquam, istorum; sed aut Rethoricis figuris contentus, aut fumo Gallicanæ libertatis, aut declamationibus in aulam Romanam, aut aliis cantilenis toties auditis, totiesque refutatis; illud unum inculcat repetitquè: *Jus Asyli ad Regem pertinere, nec unquam abdicatum iri.* Quòd si tanti privilegij causas & rationes quæras; non alias affert, quàm si-
dem

dem & auctoritatem suam : *Talonius dixit.*

Contendit : *Nec Reges, nec Regum Legatos posse excommunicatione puniri: Ecclesiam S. Ludovici injustè Interdicto suppositam.* Sed nullam rationem adjungit tantæ criminationis; facilius quippe, breviusquè Talonio visum, si causam non examinaret, non discuteret; sed more sibillarum oracula proferret nullâ curâ probandi : *Roma potestate suâ abutitur, Roma Gallia libertates deflorat:* Hæc summa negotij. Quem ergo effectum pariet hæc Talonij Oratio à Gallis tam decantata? non alium, credo, quàm ut tripudiant hæretici: eruditi contemnant: Catholici, addictiquè Romanæ Ecclesiæ indignentur: omnes verò boni

boni infortunium Galliæ deplorent, quæ hominem ferat summo Sacerdoti tam audacter insultantem, tantaquæ fiducia schismati præcinentem, idquæ sub illo Rege, cui tanta sapientiæ & æquitatis cura.

Augetq; dolorem, quòd illi ipsi, quos rebus Ecclesiasticis Rex Galliæ præfecit, & quorum operâ, consiliisque utitur Romæ, non tantum non offendantur hujus Advocati petulantia, verum etiam applaudant, exultentque; imò tam indignæ in Romanam Ecclesiam rebellionis ipsi sint auctores, fabriquæ calumniarum, quibus tanti Pontificis nomen audent defædare.

Cæterum injuriæ toto hoc Talonij libello sparſæ, adeò turbatim,

tim nulloquè ordine incedunt, ut
ijs componendis nulla mea cura
suffecerit; fateor enim conatum
me esse, ut illas disponerem, quo
videlicet clariùs apparere, con-
vinciquè possint: sed, ut dixi,
prævaluit Auctoris confusio, ut
proinde oppugnari à me debeant
vago certamine, & prout singulæ
occurrerint. Nisi fortè omnia ad
hæc capita reducas, videlicet
Primò, ad injurias & convitia,
quæ impudenter in Pontificem
vomit. *Secundò*, in querelas, quas
de Pontifice malè in Gallias ani-
mato sparsim accumulât. *Tertiò*,
in sententias erroneas circa au-
toritatem Ecclesiæ Romanæ
Matris & Magistræ omnium Ec-
clesiarum. Et *deniq;* in vanissimas
ratiocinationes, ac pueri, quàm
Advo-

Advocato magis dignas, quibus Imaginarium jus Asyli, & Divino, humanoq; juri contrarium Regi Christianissimo vindicare contendit. Hæc merces Talonij; & quamvis nemo unquam Assentatorum huc usquè processerit, placuit Talonio illos omnes superare adulandi peritiâ.

Primò igitur Pontifici objectat: Jam à pluribus annis statuisse hostem se Gallorum profiteri, amicum verò omnium, quibus Gallia potentia aut odiosa, aut suspecta.

Vides exordium tam grandis calumniæ: quid porrò à Talonio expectas? ut probet? ut fœdera narret cum Galliæ hostibus ab Innocentio percussa? ut bella, aut saltem machinationes producat

ducat in Galliæ perniciem ? nihil istorum ; constat enim id maxime ab Innocentio hætenus curatum , *ut* animos Christianorum Principum componeret extinctis discordiis , *utquè* palàm testaretur paternum amorem , & parem amori æstimationem , quam Christianissimo Regi profitetur , nec aliud ab eo fœdus conjunctum , quàm innocens illud , Deoque tam charum , quo delendæ Turcarum potentiæ Christianorum vires sociavit. En odia & insidias Innocentij. Illud verum est (si hoc culpæ dari debet) doluisse Pontifici , cum Regem videret perniciosus Ministrorum consiliis nimium tribuere , Principem alioquin pium , justumquè , quoties suis , non aliorum arbitriis

triiis ageretur. Et verò, quàm
benignè, humaneq; Regem admo-
nuit, ne permetteret Regaliam qua-
tuor Provinciarum Ecclesiis im-
poni, quæ semper imunes fuerant
hujus servitutis, & quâ tamen ejus
Ministri Ecclesias opprimebant,
Regio nomine abusi, calcataq; Ju-
stitiâ?

Quis autem satis dolorem ex-
plicet, quo Sanctissimus Ponti-
fex angebatur, cùm videret tot
Episcopos, totq; alios Sacerdo-
tes pietate, Zeloq; insignes, to-
to Regno proscribi, & pœnas
gravissimas dare, nec aliam ob
causam, quàm quòd Romæ obe-
dirent, causamq; libertatis Ec-
clesiasticæ sustinerent; idquè
exemplo ipsorum Galliæ Antisti-
tum, qui octuaginta ab hinc an-

nīs eam constantissimè defende-
rant ; imò quam ipse Petrus de
Marca , quamvis alioquin Regi
addictissimus , egregiis scriptis
agnoverat , oppressus , ut credo ,
mole veritatis.

Cùm videret Regiâ auctoritate
institutum Religiosarum Infantia
Christi ab Episcopis , à Pontifici-
bus , ab ipsoq; Rege approbatum ,
momento aboleri , nullâ justitiæ ,
legumq; reverentiâ ?

Cùm videret hinc everti Cha-
ronense Monasterium , inde in
ædibus Urbanissarum perpetuas
Antistitas intrudi , idquē contra
omnes Leges , canonumquē De-
creta ?

Cùm videret arbitrio Judicum
sæcularium & libertatē , & ju-
risdictionem Ecclesiarum , turpif-
simâ

simâ servitute damnari; jugumq;
Ecclesiæ Gallicanæ ab ijs imponi,
quorum vita nimis quàm nota, &
silentio digna: Ecclesiæ inquam
Gallicanæ, quæ cùm singulis ferè
momentis libertates suas jactet,
re ipsâ sæculari Magistratui ad
pedes jacet, servitquè miserrimo
ac pudendo ancillatu, Parlamento
videlicet rebus sacris & Ecclesiis
imperante, idquè majori fastu ac
dominatu, quàm ipsa Oecume-
nica Concilia, Romaniquè Ponti-
fices.

Cùm videret præcípvas Regnī
ac devictarum Provinciarum Ab-
batias in Commendas dari: Epi-
scopos ad alienas Ecclesias trans-
ferri, suis, quas primò suscepe-
rant, relictis, commissisque al-
teri & subornato Episcopo, qui

prioris Episcopi Vicarium agat; cogi Capitula vacante Ecclesia, Vicarios eligere, non quos volunt, & quos Conscientia eligendos dicat, sed quos Rex imperat, præscribitquè: Canonicos exilio pelli, quotquot Gubernatoribus Provinciarum licet modestè obnituntur, recusantq; Mercenarios Pastores accipere ex aulæ præscripto.

Cùm videret Galliæ Episcopos olim Apostolicæ Sedis majori, quàm dici possit, demissionis & reverentiæ sensu addictos, non omninò dissimiles sibi in Conventibus annis 1680. & 1682. celebratis classicum aperto bello in Ecclesiam Romanam cecinisse; ac Decreta vulgasse Apostolicæ Dignitati planè adversa, & ab ijs Decretis

cretis aliena, quæ Ecclesia Gallicana in Comitibus anni 1616. per Cardinalem Perronium, & anno 1625. in articulis pro reparanda Ecclesiastica Disciplina condiderat. Sed, ut credo, alia tunc erat ratio Galliæ Episcoporum; olim enim Conscientiæ stimulis, spiritusq; Religionis agebantur: nunc metu & factionibus, aulæq; instinctu; quid ergo mirum aliis ex causis alios effectus prodiisse? Ut proinde nonnemo ex Episcopis, qui Parisiensi Conventui affedit, amico suo familiariter, vereq; dixerit: *Gallia Episcopos libertatem, honorem, & Conscientiam in Conventu Parisiensi perdidisse, & nihil præterea.*

Cum videret Clerum Gallicanum olim pietate, scientiâ &

constantiâ Sacerdotali ante alios
florentem: nunc adeò marcuisse,
ut malit jura & privilegia Eccle-
siarum suarum penitus deleri,
quàm vel vocem, vel querelam
emittere memorem pristinæ liber-
tatis. Qui minùs facerent, si man-
cipia essent?

Cùm denique videret tot Sa-
cerdotes, virosque doctrinâ in-
signes, exiliis, carceribus, falsis
criminationibus, alijsque modis
puniri, ac privari suis beneficiis;
idque nullâ judicij formâ ser-
vatâ, ac sæpè suis etiam Episco-
pis Diocesanis omnium igna-
ris, inconsultisq; : & si causam
quærerent tam sævæ persecu-
tionis; hæc una reddebatur :
Quòd Jansenismum redolerent. Hoc
nimirum crimen est, quo omnes
In-

Innocentes laborant; quotquot videlicet Regiis Ministris adulari non possunt. Nec refert, si palàm protestentur: *Se Jansenij quinque propositiones ex animo avversari.* Nihilominus rei sunt, & velint, nolint, oportet, ut inviti sint Jansenistæ, novâ videlicet delicti specie, quando cogunt hæreticos esse, etiam qui nolunt. Sed neque hoc satis, alia subjungunt Jansenismo supplendo; videlicet esse seditiosos: esse novæ Ethices (Principibus tam charæ) juratos hostes: esse mille titulis suspectos: esse denique, quidquid non sunt: nisi fortè hoc unum excipias, quòd illis, qui in aula sunt, & quorum arbitrio Ecclesiæ permittuntur, blandiri non possint; hoc unum verumq; deli-

Etum est, quod, ne nomine careat,
Jansenismum appellant.

Accusat Talonius *severitatem*
Romane Inquisitionis. Sed si ex
una parte progressus attenderet
hujus Tribunalis, quo videlicet
selectu accusationes audiantur:
quo studio reorum responsa:
quàm lentè & per moras sententiæ
maturentur: ex altera verò parte,
si modum animo reputaret, quo
Personæ Ecclesiasticæ in Galliis
judicentur, non auditis videlicet
reorum responsis, non communi-
catis depositionibus; non collatis
testibus, nec coram constitutis;
non Episcopis consultis, quorum
subsunt jurisdictioni & potestati;
nullo ordine, nullâ formâ judicij;
ejecti, proscripti, spoliati, & squal-
lidi-

lidissimis custodiis afflicti ; nullo
commeatu, nullo solatio, nullâ ve-
niæ spe, ac sæpè unius tantum Je-
suitæ delatione oppressi : si hæc
inquam omnia cum Romanis
Tribunalibus conferret Talonius ;
fateretur utique (si modò tanta-
ori, quanta cordi libertas) plu-
meum Romæ, ferreum in Galliis
jugum portari , & eorum inqui-
sitionem , quibus res Ecclesiasti-
cæ à Rege committuntur , adeò
inclementem , adeò crudelem
esse, ut delitiæ sint, quidquid de
Italia & Hispanica severitate
narratur. Recordetur ergo Ta-
lonius , quàm indignis sævisquè
modis in Galliis habeantur, quot-
quot aulæ non placent, & fatebi-
tur , nullam de Romana inqui-
sitione querelam superesse.

Enimverò mala & abusus, quæ
modò libavimus, & quæ longo
ordine narranda superessent,
Pontificem Innocentium non la-
tent; nec omisit jam fufis ad
Deum lacrymis, jam litteris ad
Regem datis, humanitate, pater-
noque affectu plenis, jam preci-
bus per Nuntios porrectis, reme-
dium aliquod quærere tam per-
tinacibus morbis. Hoc totum
est odium. Hæc persecutio, quæ
Pontifici imputatur: quòd ge-
muerit, quòd rogaverit, quòd
monuerit, quòd medelam apta-
verit, quòd Immunitati Ecclesia-
sticæ jam in faciem cadenti bra-
chium porrexerit, quòd Clerum
reformari, injustequè oppressis
quietem optaverit. Hoc, in-
quàm, si delictum, & odium vo-
cari

cari debuit, nemo nocentior Pontifice, nemo Galliæ infensior: at pari ratione & Medicus, cùm infirmo medetur, & Pater cùm filium objurgat emendaturus, inter hostes & persecutores censendi erunt.

Opponit secundo ordine Talonius (si modò Talonij sunt, quæ nullam connexionem habent cum ijs, quæ sequuntur, præceduntq;) *Charissimos esse Pontifici, quos constat Jansenij discipulos fuisse, hos laudibus, hos mille favoribus cumulari.*

Non explicat Talonius, qui sint isti Jansenio addicti, & Pontifici Innocentio prædilecti, & consultò tacet, quos non potest indicare, quippe innocentes; & poenas quoque Calumniatorum veritus,

cùm eum non lateat, enixis verbis, regioquè Diplomate prohiberi, ne Jansenistæ appellentur, quotquot aut Pontificijs contra Jansenium Decretis se submiserunt, aut à nullo Episcoporum hujus criminis damnati sunt.

Quod verò adjungit Talonius: *Ipsam Pontificem Innocentium Jansenistarum partes fovere*; tam petulanter, falsoquè dicitur, ut ne quidem responsum mereatur; illud potius demiror, & Galliam, & Parlamentum ferre tam indignas, enormesquè calumnias non solum toto Regno jactari, verum etiam ipsius Parlamenti Arresto præfigi. Hæc nimirum est reverentia Romano Pontifici debita? hæc justitia Parlamenti tam atrocia simulantis? & quid mirum

mirum est, tot Innocentius Episcopos subornatis accusationibus damnari, quando vel in ipsum Pontificem tanta, & tam impunita licentia?

Sed neque satis Pontificem Janfenismi postulâsse, addit Talonius: *Tam segnem esse, inertemquè, in Quietistarum erroribus profligandis, ut non somno tantum, sed lethargo, correptus videatur.*

Hæc Talonius notâ Advocatis modestiâ; & tamen palàm est, non potuisse Innocentium majori Zelo & curâ persequi Quietistas, postquam observati sunt, eorumquè hæresin extinguere. Notum est, quàm severè cum Michaële Molinos hujus hæresis infami Auctore ejusq; Affeclis à Pontifice actum. Illud verum

est, voluisse Innocentium omnium retrò Pontificum, Patrumq; exemplo, ac etiam ex Canonum præscripto discrimen fieri inter hæresis Auctorem, quique huic spontè, obstinateq; adhæserunt; & inter illos, qui licet Religione, ac doctrinâ eximij, primasquè Ecclesiæ dignitates meriti; specie tamen pietatis decepti (quam viginti omninò annos egregiè Molinos finxerat) in errorem prolapsi sunt; parati tamen ex Ecclesiæ sententia illos deponere. Noluit, inquam, Innocentius hos cum obstinatis hæreticis eodem fasce involvi; nam etiam in causa Religionis nihil fieri inconsultò debet, cæcòq; impetu & citrà rationem, & tamen hæc omnia à Patribus exercita, à Canonibus

nonibus præscripta, somnus Talonio, & lethargus videntur.

Cùm aliquot abhinc annos Innocentius errores Casuistarum, qui moralem Theologiam corruperant, solemni diplomate damnâisset; vetuit Parlamentum vulgari, quòd in illo mentio fieret Inquisitionis. Nunc verò cum Pontifex causam Molinos ejusq; Afsecularum maturè, citraq; passionem expendi vult, nec patitur præcipui meriti Prælatos adversariorum invidiæ exponi; indignatur Talonius, urgetq; Pontificem, & Inquisitionem inclamat, Tribunal alioquin tam illi exosum, & tunc præcipuè, cùm non patitur corruptelas opinionum Christianæ Theologiæ adeò funestas.

De-

Denique offendunt Advocatum nostrum, quæ de Pontificis Innocentij sanctitate passim & ab omnibus celebrantur : *Nec alios tam præclarè de hoc Pontifice sentire dicit, quàm Jansenij discipulos.*

Quid posset vel ipsa invidia, si calamum Talonio duceret, ineptius fingere ? Oportet enim, verò totam Europam ex Jansenistis constare ; tota enim est, quæ modernum Pontificem summis laudibus extollit, quæ illum ut Pastorem agnoscit ex speciali Dei providentia Ecclesiæ datum : & quæ fatetur, necessarium fuisse corruptissimis hisce temporibus, ne videretur abbreviata manus Domini, & suorum oblita. Interroget Talonius Romam, imò

imò totum Orbem Christianum
& veritati testimonium feret.
Cùm Sedes Romana vacaret,
jam tunc omnium votis dignissi-
mus Pontificatu censebatur, nec
spes fefellit, ceciditquè major
omni exspectatione eventus. Ani-
mus ab omni fastu & cupiditate
alienus. Familia, & consanguini
nei non opibus, non honoribus,
aucti. Ingens domi frugalitas, &
par cura sublevandæ Apostolicæ
Cameræ ære alieno oppressæ.
Pax inter Principes Christianos
immensis laboribus parta, pro-
fusquè Thesauri evertendo Tur-
carum imperio. Taceo felicissi-
mum belli eventum, infidelibus,
non tantum armis, verum etiam
terrore nominis Christiani &
civili bello oppressis. Taceo
Catho-

Catholicam Religionem Angliæ illatam; Germaniam Turcis purgatam, certæq; ruinæ ereptam; Nepotismum Româ proscriptum; morum integritatem semper sibi similem, neq;, ut fieri solet, Principatu & fastigio corruptam. Constantiam Principe dignam, omniq; metu majorem, & denique infinita alia, quæ de hoc Pontifice narrari possent.

Hæc omnia tam vera & magna sunt, & Innocentij virtutes tot vocibus & testimoniis probant, ut nullis Talonij calumniis nullaquæ invidentium arte obscurari possint.

Pergit deinde Talonius ad alia querelarum capita Romano Pontifici objecta, & cui maximè insistit,

insistit, urgetquè, illa est; quod recuset Innocentius vacantes Episcopatus illis conferre; quos Rex nominavit: *Tertiam fere partem Ecclesiarum Pastoribus vacare: si nolit Pontifex concordatis stare, ne Regem quidem illis obstringi; ut ergo primis Ecclesiæ temporibus Episcopos populus eligebat, ita nunc vice populi posse à Rege constitui, cum præcipua populi auctoritas sit in Reges translata.*

Sic Talonius philosophatur. Atque utinam quàm Romæ, tam in Galliis concordata religiosè observarentur, cessarent utiquè tot illi abusus, injustæq; usurpationes, quæ Galliam occupârunt, quæq; bonis omnibus tot lacrymas expresserunt; quamvis eò tandem processêre, ut facilius de-

deseri , quàm emendari possint.

Sed ut objectis respondeam, nego Pontificem eos respuisse , qui à Rege fuerant optati , modò tamen ijs conditionibus potirentur, quas Concordata , sacrique Canones requirunt. Nec ad alios virtute Concordatorum id examinare, quàm ad Summum Pontificem pertinet. Quòd si absint necessariæ conditiones, tenetur Rex spatio trimestri alios nominare desideratis qualitatibus instructos. Nec obligari Pontifex potest proferre causas repulsæ , cùm nullius iudicio subjaceat. Quamvis enim, nisi ob justissimas causas, repellere non possit à Rege nominatos ; id tamen Conscientiæ illius relinquitur, nec ab ullo Principum ad
ratio-

rationem repulsæ reddendam, multoq; minùs ad indignos admittendos, & pacta violanda constringi potest. Legantur tantùm concordata, & quæ post illam contigère, ad memoriam revocentur, patebitq; jure, an injuriâ, Pontifex accusari possit. Quantis laboribus & à Cardinalibus, & à Legatis Gallix certatum est, ut Renatus Henrici IV. Confessarius Trecensis Episcopatu donaretur, quem illi Rex destinaverat; nec tamen impetrari Bullæ potuerunt, ut videre est in Epistolis Ossati Cardinalis. Nota quoque omnibus est celebris illius Abbatis repulsa, quem, cùm Ludovicus XIII. Regnantis Pater infinitis elogiis Pontifici ad Episcopatum obtulisset, nunquam tamen obtineri potuit

potuit, ob quasdam Abbatīs actiones Episcopo indignas, & clàm Pontifici notas.

At, inquires, triginta interim Ecclesiæ ab Innocentio Episcòpis privantur.

Fallitur Talonius, Pontifex enim duos tantùm admittere recusavit, qui videlicet Anno 1582. Conventui Parisiensi interfuerant, subscripserantq; omnibus in eo Conventu decretis. At Regij Romæ Ministri sive imperio Regis, sive proprio instinctu negârunt, se alios proponere posse, duobus illis à Pontifice non admissis. Sicq; Gallorum est culpa, tot hætenùs Ecclesias vacare. Nolo hîc ad examen revocare illorum imprudentiam, qui Regiam Majestatem nullâ necessitate
hujus-

hujusmodi tricis implicârunt. Alij
fanè Ministri conati essent, aut
Episcoporum, quos Rex nomina-
verat, innocentiam ostendere, aut
culpam elevare, aut aliâ quâvis
ratione placare Pontificis ani-
mum, ne mutua utriusq; amicitia
concideret, & optati à Rege ad-
mitterentur. Sed nihil istorum
Regiis Ministris placuit, quippe
placida & honesta respuentibus, &
illa potius amplecti paratis, quæ
omnia turbare, quàm componere
possint.

Sed quidquid de hoc sit, illud
saltem negari non potest, virtute
Concordatorum jus plenarium
Episcopos constituendi ad Sedem
Apostolicam devolvî, quoties
intra semestre à tempore Vaca-
tionis nemo Pontifici præsentatur;
tantum

tantum ergo abest, damna vacantium Ecclesiarum Pontifici adscribi posse; ut potiùs summa illius moderatio magis magisq; appareat, viribus & auctoritati suæ pacem anteferentis.

Quòd ergo tot Ecclesiæ Pastoribus careant, Regionum Ministrorum culpa est, non Pontificis Romani; nec iste, ut aulici assentatores criminantur, aut odio, aut vindictâ, aut genio Gallis adverso impellitur, sed ex Conscientiæ & iustitiæ præscripto. Offerant Galli dignos Episcopali dignitate, & apertis brachiis eos Roma excipiet. Quòd si indignos proponunt, frustra sperant Pontificem minis & clamoribus permotum iri, multoque minùs sordidis

fordidis illis, rusticisq; convitiis, quæ non puduit Talonium in tantum Pontificem expuere; & quibus nihil aliud effecit, quàm ut indignum se Togâ ostenderet, officioq; quo fungitur.

Nec dicat Talonius : *Ideò nominatos à Rege Episcopos Romæ admissos non esse, quòd non credant Pontificem infallibilem esse, & Conciliis superiorem, nec enim hæc repulsæ unica causa: sed illa poti⁹, quòd in eo Conventu, quem collectum esse jactabant Regi cum Pontifice componendo, ausi fuerint causam Regaliæ definire, hoc est illam causam, quam cùm constet ex majoribus, imò maximis esse, sicq; Pontifici reservatam; ac insuper per legitimam appella-*

L**tionem**

tionem ad Apostolicam Sedem devolutam; ignorare non poterant, non ad paucos Galliaë Episcopos, non Conventum Parisiensem, sed ad solum Pontificem pertinere. Et cum oporteret in ea causa, in qua de libertate agebatur Ecclesiæ Gallicanæ, vires cum Pontifice, Christiquè Vicario conjungere; ipsi potiùs exemplo planè indigno, contra suum Protectorem arma sumere, causas expostulandi congerere, Pontificiam potestatem in arctum cingere, idquè nullâ necessitate nullaq; auctoritate conati sunt; hæc inquam causæ fuerunt, ob quas credidit Pontifex vacantes Ecclesias tam timidis, infidisq; Pastoribus committi non posse.

Et verò cui unquam in mentem
venisset, adeò Episcopis Parisien-
sis Conventûs nullam decori, ho-
nestiq; curam fore, ut eo ipso tem-
pore contra tam sanctum Ponti-
ficem talia molirentur; quo ipse
nullo sui privato commodo, in-
commodoquè, sed unicè ob liber-
tatem Episcoporum, quatuorq;
Provinciarum à Regalia exem-
ptionem cum Rege conflictaba-
tur? Egregiam enimverò occasio-
nem, candidoq; marmori inciden-
dam, ob quam videlicet crederent
indici bellum Romano Pontifici,
ejusq; auctoritatem minui oport-
tere. Sed nequè ullum manda-
tum à Clero Provinciarum sua-
rum Episcopi acceperant tam
grandia & inconcessa tentandi.
Constat etiam illos ipsos Antisti-

tes, qui Parisios convenerant, non liberis suffragiis, sed vi, metuquè, & ex aulæ imperio in cætribus Provincialibus electos fuisse. In ipsis quoq; Parisiensibus Comitibus nunquam tanti momenti causa discussa, & ad examen revocata, nec etiam Episcopis, aliisque Provinciarum Deputatis libertas dicendi permissa, sed omnia ex Præsidis arbitrio, hoc est, ut ex Palatio jubebantur raptim festinata.

Nolo hîc Parisiensi declarationi, quatuorq; propositionibus expendendis immorari, id jam ab aliis factum; ac illis præsertim, qui vanissimas ac plenas imposturis Maimburgi cantilenas (digni videlicet illius Cætûs Protectoris) egregiè refutârunt.

Suf-

Sufficit dicere, Episcopos, qui Parisios convenerunt; & Basileensium, & Richerianorum licentiam superâsse, ac gravius, quàm illi in Pontificis auctoritatem, grassatos esse. Basileenses enim in nonnullis tantùm casibus Concilio Pontificem submittebant; at Parisienses nostri in omnibus & semper, adeò ut si Concilium aliquod legitimè congregatum hæresin postea definiret (ut quondam Ariminense) non posset ex istorum sententia à Pontifice irritum declarari, ejusq; Decreta aboleri. Si priùs Parisienses Episcopi & Gallicanæ Ecclesiæ in Synodo anni 1625. & Conciliorum documenta percurrissent, quàm nuperam Declarationem foras proferrent;

utique intellexisset, illam menti Ecclesiæ Gallicanæ, omniumq; Conciliorum è diametro repugnare; quippe cùm Decreta, legesquè Conciliorum vim & auctoritatem nullam habeant, nisi à Pontifice confirmata.

At ex adverso, si quis Deputatorum, qui Parisiis convenerunt, audaciam animo reputet; meritò dubitare possit, non tantùm an Galli, verùm etiam an Catholici sint, agnoscantq; pro Christi Vicario Pontificem Romanum; sicq; ex hac etiam parte meritò Pontifex morari debuit, Bullasq; retinere, donec de illorum fide & religione pleniùs constaret.

Cæterùm illud quoq; notandum est, quod Talonius ex industria omisit,

omisit, videlicet, eo ipso tempore quo duos illos ex notatis causis Innocentius rejecit, simul professum, se alios, qui Parisiensi Conventui non interfuerant, libenter admissurum; imò sequenti postea anno Abbatem S. Valerij à Christianissimo Rege nominatum ad Ecclesiam Quebekensem in novo Orbe promovit.

Quid hîc rogo à Pontifice non moderatè, non canonicè, summaq; prudentiâ factum? & quis est Talonius, ut plura à Pontifice petat, quam in Concordatis comprehendatur? an vero oporteat Pontificem quoslibet, nulloq; discrimine, digni aut indigni sint, ad Episcopatus recipere? aut fortè examinata, & judicata à Pontifice Talonij examini & iudicio, aut

alterius Tribunali subjaceant? & si Pontifex omnes, quotquot illi à Rege exhibentur, acceptare tenetur, quid ergo causæ est, ut in Concordatis statuatur, si Pontifex aliquem rejiciat à Rege nominatum, obligari Regem intra tres menses alium Pontifici offerre? nec verò insolitum est, aliquos à Pontifice repelli; nondum quadraginta anni effluxerunt, cum ob similem ferè causam nunquam obtineri potuit, ut Petrus de Marca ad Episcopatum Conforanensem, & postea Archiepiscopatum Tholosanum priùs admitteretur (quamvis à Rege nominat⁹, quamvis Gallico Legato omnem lapidem movente) quàm ut aliqua purgasset, quæ in celebri suo libro de Concordia Sacerdotij & Imperij

rij licentiùs contra Romanam Sedem expresserat.

Opponit quidem Talonius;
*Cardinalem Lotharingie in Concilio
Tridentino palàm professum esse, Pon-
tifici Romano donum infallibilitatis
non competere.*

Sed multis rationibus auctori-
tas, & testimonium hujus Cardi-
nalis impugnari potest.

Nam primò nec Paulus Servita,
nec Pallavicinus in historia Tri-
dentini Concilij hujus facti memi-
nêre; at utique meminissent, nec
enim aut ignorare poterant, aut
silentio præterire rem tanti mo-
menti, & tam omnibus notam.

Deinde Instructio à Lotharin-
go ad Bretonem Agentem suum
data, & quam describit Dupuy,

meritò suspecta est, dubiæq; fidei,
& videtur ab hæreticis corrupta.
Quippe Cardinalis in ea testatur :
Concilium Florentinum in Galliis re-
ceptum non esse. At nullus Catho-
licorum hoc dixerit, cùm constet
ubiq; locorum Florentinum rece-
ptum esse, si Græcos schismaticos
excipias. Basileenses quidem o-
mnibus viribus egerunt, ne Con-
cilium Florentinum indiceretur,
& tamen nullus Principum reli-
ctis Basileensibus, Florentinum pro
Oecumenico non agnovit, illiq;
tanquàm legitimo non adhæsit.

Denique ipse Dupuy ad margi-
nem illius instructionis notat, im-
perâsse Agenti suo Cardinalem Lo-
tharingum : *Quæ Pontificem, &*
Concilij superioritatem spectant,
omitterent legere. Ex quibus col-
ligere

ligere licet, pœnituisse Cardina-
lem, & rematuriùs expensâ emen-
dâsse, quæ irato exciderant.

Sed quidquid de hac instru-
ctione sit, recordari omninò de-
buit Talonius in ultimo Latera-
nensi Concilio sub Leone X. aper-
tissimè definitum esse: *Concilium*
Pontifici subesse, & tamen illa ipsa
synodus Lateranensis pro legiti-
ma, Oecumenica, & indubitata
â Ludovico XII, & Francisco I.
Galliæ Regibus, & proprio, &
omnium Gallorum nomine, rece-
pta est. Sed & Cancellarius Pra-
tensis in illo ipso sermone, quo no-
mine Francisci Regis Parlamento
demonstrat, Concordatum recens,
cum Pontifice initum Galliæ con-
ducere, illud quoq; adjungit: *Cer-*
tum esse, Papam, si paucos, rarosq;

*casus excipias, omni Concilio superio-
rem esse.*

Errat ergo Talonius, sequè re-
rum, quas narrat, omninò igna-
rum ostendit, cùm audet tam præ-
fidenter asserere : *Totam Galliam,
Basileensi synodo adharere in ijs, quæ
spectant ad Concilij supra Pontifices
auctoritatem. Totam quoque cum
nupero Parisiensi Conventu sentire.*
At Talonius catenas, exilia, bono-
rumq; proscriptiones amoveri fa-
ciat, dicendiquè, quæ sentiunt, li-
bertatem Episcopis reddi, & con-
tinuò videbit, quàm multi nupè-
ram Declarationem ex corde aver-
sentur, & toti in partes Pontificis
transeant.

Cæterum quidquid Theologi
privatim opinentur, palam tamen
paucissimi ausi sunt, Pontificis au-
toritati

Autoritati litem movere; & inter istos paucos duo illi, qui ad Episcopatus admissi non sunt, nec prius admittentur, quam agnito, correctoq; errore. Sed duo isti facile veniam impetrassent, modò Gallis placuisset, minori fastu, strepituq; rem istam aggredi: at avidi turbarum, flammamq; accendendi, eo tandem devenerunt, ut jam semel accensam ardentemquè, nec velint extinguere, nec etiam possint.

Transit deinde Talonius ad ingentem machinam, quâ Pontificis animum expugnaturum se credit. Prædicit: *Nisi Pontifex Bullas ad vacantes Episcopatus concedat, etiam illis, quos indignos reputat, fore, ut nihil amplius pecuniæ ex Gallis Romam deferatur.*

O simplicem Talonium, qui tantum Pontificem Advocati calceometitur! nimis planè Innocentij animum & genium ignorant, quicunque sperant corrumpi eum posse tam vili pretio: non Thesauro, non regna sufficerent; quanto minùs parum illud argenti, quod ex Galliis affertur, quodq; in tot capita divisum etiam à sordidissimis vix nomen, aut curam meretur?

At, pergit Talonius, Pontifice Bullas recusante, meritò ex parte Regis Christianissimi Concordatum abrumpi posse, reduciq; Pragmaticam sanctionem?

Sed quia nec aulæ, nec Regis Confessario conduceret Pragmaticam sanctionem, & cum ista liberæ electiones Galliæ restitui, ideo

ideò Talonius noster modum
aliū invenit, quo & Concorda-
ta, & Pragmatica aboleri possint,
& tamen jus eligendi penes Re-
gem constitui: *Electio*, inquit, *Epi-*
scoporum olim ad populum pertine-
bat: at populus non amplius in eo sta-
tu est, ut hoc jure gaudere aut potiri
possit: exempla quoq; suppetunt Re-
gum primæ, secundaq; stirps, qui
certis casibus Episcopos eligebant:
cū ergo Reges sint præcipua & no-
bilissima populi pars, possintq; tam
proprio nomine, quàm populi agere;
succedant ipsi, eligantq; Episcopos, quos
postea Metropolitanus, alijque Epi-
scopi Provinciales confirment, con-
secrentquè.

En tibi egregiam Gallici Advo-
cati Theologiam! quam qui legit,
auditquè, meritò suspicari possit,
venisse

venisse auctorem ex ultima Orbis
Brasilia, ubi nulla æquitatis, nulla
rationis, nulla juris Divini huma-
niq; notitia. Talonius tantus li-
bertatis Gallicanæ declamator ni-
hil Pragmaticæ sanctioni (in sa-
cris Canonibus, Conciliisq; Con-
stantiensi & Basiliensi fundatæ,
si electiones spectes) nihil synodo
Aurelianensi deferendum cen-
set, quæ Capitulis Cathedralibus
unà cum Magnatibus, præcipuis-
què Civibus Diæcesis jus eligendi
restituit. Talonius adeò Cano-
nicis electionibus adversatur, ut
eas etiam impossibiles esse con-
tendat, & quas alij quondam Ad-
vocati tanquam præcipuum ca-
put Gallicanæ libertatis omnibus
viribus propugnârunt, ipse sub-
verfas cupit. Talonius, inquam,
non

non Canonum, non Regiorum,
edictorum, non Legum in Con-
ciliis sancitarum, non denique
libertatis Ecclesiasticæ memor
omnia momento deleri optat;
tantum ut in aula mereatur. Jus
novum condatur solâ auctori-
tate, Jurisquè prudentiâ Talonij
suffultum: Galliæ Concordata,
uno ictu truncentur, quippe Pon-
tifici propitia, cui jus permittunt
indignos repellendi: cesset Pra-
gmatica; nam electiones restituit
Capitulis Rege excluso: non se
Pontifex electionibus immisceat:
& denique in locum tot Cano-
num, tot legum, tot sanctionum
tot Conciliorum Rex solus unus-
què succedat, eligatquè Episco-
pos; sic tamen, ut hoc ipsum jus
eligendi nullis Concordatis illi-
getur,

getur, & contra omnium retrò Regum exempla ex solius Principis arbitrio pendeat. En tibi de rebus Ecclesiasticis (quarum præcipua pars electio Episcoporum) Talonij Ideam! Quis rogo Ecclesiæ Gallicanæ vices non meritò defleat? quæ loco sacrorum Canonum, loco Pontificis Summi, ex arbitrio, somniisq; pendeat, Regij Advocati; hoc est, hominis ad nutum aulæ faciem moresque mutantis, cui nulla legum Ecclesiasticarum peritia (nisi cùm fortè ad Declamationes suas farciendas hinc inde aliquid raptimque convasavit) nulla honoris, nulla Conscientiæ, nullâ Edictorum Regiorum cura, sed sola & unica adulandi, aulamq; demerendi libido.

Me-

Meritò hæc Lectorialiena, nec ad rem spectantia videantur, cùm nihil pertineant ad jus Asyli à Gallicis Legatis expetiti; sed oportuit vestigia Talonij legere.

Jam videamus, quid de Jure Quarteriorum dicat.

Primò ingenti digressione in Bullam Cœnæ vociferatur: *Hâc novam, immensamq; Monarchiam Pontificibus stabiliri. Hâc Parliamentâ jure causas Beneficiarias (quoad Possessorium) cognoscendi injustè privari, sicut etiam causas cum reâles, tum personales Clericorum.*

Quæ de hac nova & universali Pontificum Monarchia Talonius exclamat, planè nova sunt, nec in Bulla fictæ hujus Monarchiæ ulla mentio reperitur. Quòd si nomine Monarchiæ statum &
Hic-

Hierarchiam Ecclesiasticam Talonius intelligat, in qua Parlamentum prohibetur jurisdictionem in causas Ecclesiasticas usurpare, non video, quis meritò de Bulla Cænæ conqueri possit; si modò Judices illos sæculares excipias, quibus & antiqua ambitio in Clericos dominandi, & par cupiditas eorum litibus quæstum faciendi.

Cæterùm ex modo, quo Talonius de Bulla Cænæ loquitur, omninò apparet, eam Bullam ne quidem lectam ab eo esse, sed tantum aliorum narratione acceptam.

Primò enim supponit Monarchiam aliquam universalem eâ Bulla stabiliri, cùm tamen nullius Monarchiæ illic mentio fiat.

Deinde

Deinde supponit, censurarum, quæ in Bulla Cœnæ continentur, primum auctorem Julium II. fuisse: & tamen certum est, hujusmodi & ex similibus causis censuras multis jam priùs annis Urbani V. Pauli II. & Sixti IV. Constitutionibus insertas fuisse. Postea secuti Julius II. & Paulus III. aliquè Pontifices, quos, licet nemo odij in Gallos accuset, constat tamen eodem modo, iisdemquè solemnitatibus die Jovis sancti Bullam Cœnæ, & censuras illâ comprehensas publicasse. Nihil ergo apparet, quod in ea Bulla argui possit, nisi, ut dixi, illud Talonio intolerandum videatur, quòd Parlamentum Ecclesiasticis causis judicandis arceatur.

Tran-

Transit tandem post longas digressiones Talonius ad interdictum Ecclesiæ S. Ludvici : *Quod contra omnes regulas , formasque Canonicas esse contendit.*

Sufficeret ad hoc respondere, tam supremâ auctoritate Pontificem Romæ potiri, quàm Regem Parisijs; hoc solùm discrimine, quòd Pontifex Romæ utraqùè potestate, temporali videlicet & spiritali fungatur, Rex solâ temporali; quæ ergo Pontifex semel Romæ judicavit, ea non Parlamenti, non Talonij, non ullius mortalium, sed Dei solius examini & iudicio reservantur.

Cæterùm nulla causa Talonio irascendi ob neglectas Canonum regulas; nam illæ multò severius Romæ, quàm Parisijs, & in Galliis obser-

observantur ; atquè utinam cùm
Regiorum Ministrorum imperio
Monasterium Charonense destru-
ctum : cùm Institutum Infantix
Jesu abolitum : cùm Urbanissæ in-
intrusæ : cùm Cisterciensis , Glu-
niacensis , Trinitariorum Abba-
tum electiones sublata : cùm Re-
galix , aliæquè Ecclesiasticæ causæ
secularium Judicium Tribunali-
bus submissæ ; utinam , inquam,
cùm tam multa contra libertatem
Ecclesiarum quotidie fiunt , æquè
Galli Canonum , sacrarumq ; Regu-
larum , ut Pontifices meminissent.

Cardinalis ergo Vicarius ideò
Ecclesiam S. Ludovici interdicto
supposuit , quòd Rector , totumq ;
Ecclesiæ illius Collegium ausum
est Lavardinum quatumvis noto-
riè excommunicatum ad Sacra-
menta

menta Ecclesiæ, communesq; preces recipere. Constabat de Pontificis Bulla jam Regi, jam ministris, ipsiquè Lavardino, jam prius notà quàm Parisiis discideret; nec potest ignorantiam prætexere, cùm quinque menses post vulgaram Bullam ideò armatus Romam intraverit, ut Asylum quovis modo tueretur, invitoquè Pontifice; & in quamcunq; faciem se vertat Lavardinus, nunquàm persuadebit se ignorasse, quæ tot signis ac velut ex industria mundo patefecit. Romam ingreditur bellatoris more, ac victori similis. Vectigalia ad portas solvere recusat. Bellicis instrumentis & apparatu se munit. Palatium Farnesium gladiatoribus, aliisquè classiariis militibus implet: excubiæ, circi-

tores

tores Palatium totâ noctè obambulant ; credas arcem aliquam , castrumq; vi expugnatum custodiri ; utquè tota Roma intelligat Lavardinum non Legatum , sed militem agere , vigiliæ certis horis distinctæ campano ære indicantur. Jam rogo , post tot argumenta violatæ Pontificis Bullæ , quis ampliùs dubitet Lavardinum non incidisse censuras Pontificio diplomate inflictas ? & si hæc tam nota & vulgata sunt , ut abscondi non possint , nullaq; tergiversatione purgari ; quis neget Clerum , Rectoremq; Ecclesiæ S. Ludovici , qui Lavardinum ad sacra admiserant , censuras meruisse ?

At Lavardinus denunciatus necdum fuerat.

M

At

At Talonium Concordati, & Pragmaticæ reminisci oportuit, ubi expressis verbis notatur: *Cum quis in rebus sacris, ac participatione Sacramentorum cum notoriè excommunicatis communicaverit, posse interdicto, aut etiam excommunicatione puniri, quamvis nulla denuntiatio praecefferit.* Notorium erat incurrisse Lavardinum Excommunicationem: notorium contra Pontificis voluntatem & edicta jus Asyli usurpasse, idquè palam, obstinatequè: neque hoc à Rectore, Collegioq; Ecclesiae S. Ludovici ignorari poterat, quid ergo obstat, ut non potuerint, meruerintq; interdicto ligari: nec refugiat Talonius ad locos communes scholarium more, qui Rethoricam discunt; exclametq; in
damna

damna ex Interdictis nata ; nec enim de Regnorum , aut Provinciarum Interdictis hîc agitur, quæ olim adeò frequentia ; sed de interdicto, unius Parochialis Ecclesiæ, ac Romano Pontifici (quippe in Romana urbe) planè subjectæ ; & quam Interdicto supponi meruit culpa & inobedientia illius Collegij. Frustra igitur cavillatur Talonius, nec quicquam reperiet, quod huic interdicto , sive formam, sive substantiam spectet, solidè opponat.

At Legatus, aliusvè Regis Minister nec peccat, nec excommunicationem meretur, quoties officio suo fungitur, & Principis mandata exequitur.

Quæro , quam Talonius Religionem profiteatur, & an Evan-

gelio credat? nam si credit, negare utique non potest, illis Evangelij verbis: *Quacunque ligaveris super terram, erunt ligata & in cælis*, datam esse Pontifici plenam, nullaq; exceptione limitatam potestatem ligandi, solvendi quæ; si ergo Principum Legati, Regi q; Ministri Christiani sunt, si clavibus Ecclesiæ perinde ac reliqui fidelium, subjecti; si Evangelium eos non excipit; si peccare possunt, etiam eum Principum suorum mandata exequuntur; quâ ergo ratione sustineri potest, eos puniri ab Ecclesia, & excommunicari non posse? Ergo ex Lavardini & Talonij Theologia poterit aliquis ex Principis sui jussu in Ecclesiæ Prælatum manus injicere, eumq; vita privare, poterit patrimonium ac bona

bona Ecclesiæ, ac etiam Jurisdictionem supremam (quæ omnia alia pretio superat) invadere; & tamen quia Principis imperio fecit, censuras effugere à sacris Canonibus latas; at hæc tam absurda sunt, ut hætenùs nunquàm lecta fuerint, nunquàm audita. Imò si usum Ecclesiæ, si Canones ipsamquè Galliæ historiam evolvas, quàmplurima occurrent Regum exempla, qui sacrorum Communione prohibiti sunt: si ergo Reges excommunicari possunt, quantò magis Regum Legati? Tempus me deficiat, si omnium Græcorum, Germanorumquè Imperatorum, si Angliæ, si Galliæ Regum exempla percurram. Clotharij quoquè, Philippi Augusti, utriusquè Henrici III. & IV.

notiora sunt , quàm ut negari ab aliquo , aut in alium sensum explicari possint. Etiam qui in Sedem Apostolicam iniquissimi sunt, fateri coguntur, sub initium octavi sæculi Leonem Iconomachum à Gregorio II. excommunicatum esse; eaque occasione Exarchatum Ravennatem in Italia perdidisse. Sic quoque, qui maximè se Gallos profitentur , negare haud possunt , Clotharium , Philippum I. & Philippum Augustum Galliarum Reges à Pontifice Romano excommunicatos , coactosq; esse, ejectis concubinis, legitimas conjuges thalamo restituere. Nicolaus I. Lotharium , quòd repudiata Teutbergâ legitimâ Conjuga Waldradam concubinam duxisset : Urbanus II. Philippum
in

in synodo Claremontana : & denique Innocentius III. Philippum Augustum, & hunc quidem tantâ severitate, ut nullus cum eo societatem jungere, nemo publicis edictis ejus nomen, aut Regnum subscribere auderet, sed Diplomata hâc formulâ clauderentur: *Regnante Christo.* Plura, qui volet, legat solùm historias Maimburgi (tanti Pontificum accusatoris) illic longo numero exempla Henrici IV. Henrici V. Friderici I. Philippi I. Othonis IV. Friderici II. Conradi I. Imperatorum reperiet, ac multa etiam Angliæ Regum, qui sacris exclusi dedignati non sunt, aut Pontificis, aut hujus Legatorum genibus advolvi, veniamquè precari. Et quid Pontifices loquor? Ipse Fulco

Archiepiscopus Rhemensis anathema minatus est Carolo simplici Galliarum Regi, si fœdus iniret cum Nortmannis Gente Barbarâ & Idolis addicta. Verba Fulconis ad Regem scribentis hæc sunt: *Sciatis, quòd si hoc feceritis, & consiliis nostris non acquieveritis; nunquam me fidelem habebitis, sed & quoscunquè potuero, à vestra fidelitate revocabo, & omnes vestros excommunicans perpetuo anathemate dampnabo.* Et libro 6. Capitularium (quæ ipsi Reges approbârunt) capite 249. Hæc verba leguntur: *Hujus Constitutionis forma servetur, & velut pravaricator Catholica fidei execrandum anathema fiat, & à Domino reus existat, quicunquè Regum deinceps Canonis*
hujus

hujus Censuram in quocunque crediderit esse violandam.

Constat ergo ipsos Reges hanc in Pontifice potestatem agnovisse, ac veneratos esse. Pœnituit, peccasse, veniam aut ipsi, aut per Legatos deprecati sunt: pœnas denique, & delicto, & scandalo impositas læti velut remedia acceptârunt. Quod si Talonium consulissent, quid aliud responderet, quàm *Censuras esse ignes fatuos Vaticani, qui in fenum resolvantur, nequẽ alij, quàm auctori, nocere: carceribus, proscriptionibus, exiliisq; cogendos Sacerdotes Ecclesias pandere, & Sacramenta petentibus dare: Pontificem calumniis onerandum esse nullo falsi, aut veri discrimine, modo ut noceant. Deniq; quoties Pontificum sententiæ displiceant,*

ab ijs tanquam ab abusu ad Parliamentum, ad Concilia, seu futura, seu non futura, provocandum esse. Hæc inquam, fuissent Talonij scelerrata consilia. Sed nihil istorum, magni illi Monarchæ, quippe alia Principibus, alia Advocatis Conscientia. Agnoscebant se instar aliorum mortalium errare posse, & ideò non minùs moneri corrigiq; se patiebantur; neq; in eo Majestatem ponebant, ut Ecclesiam contemnerent, ejusquè auctoritatem pessumdarent indignis cavillationibus; sed in eo potius, ut ejus se legibus submitterent, ut suo exemplo docerent, quàm oporteat Ecclesiæ censuras timere; & deniq; ut omnibus reverentiam Ecclesiæ, ejusq; Capiti, Romano videlicet Pontifici debitam inspirarent.

Verum

Verum quidem est, nonnullos Galliaë Episcopos, plusquàm decebat, auctoritatis suæ anxios, tenacesquè, sibi pro prima instantia auctoritatem arrogasse Reges excommunicandi; unde in illa verba contra Gregorium IV. prorupète:

Si veniret Regem excommunicaturus, ipse Excommunicatus discederet.

Hæc Talonius exaggerat, aptatq; suæ causæ, quæ tamen, si aliquis huic Togato pudor, æternâ oblivione delenda, & ex Galliaë annalibus planè oblitteranda fuerant.

(a) Qui enim Episcopi Galliaë, ut audeant in Pontificem Romanum,

M 6

Chri-

(a) Ipse Aimoinus, qui hæc verba Episcoporum recenset: *Presumptuosos & audaces* vocat. *Aimoinus lib. 5. cap. 14.*

Christique Vicarium sententias, pœnas imò anathemata dictare? num Pontifex non solum Concilio Oecumenico, verum etiam tumultuario Episcoporum manipulo subiectus; Hæc tam absurda, tamq; indigna, ut pigeat refutare.

Illud ergo verum est, constatque ex Galliæ historiis, Capitularibus, Conciliisque, olim Episcopos sibi, ut dixeram, auctoritatem adscripsisse Reges excommunicandi; cum verò hâc potestate aut factionibus, aut etiam Civilibus bellis abuterentur; sæpè Pontifices rogati, ut soli id facerent. Quòd si Talonio otium fuisset Clementis VI. aliorumq; Pontificum Diplomata evolvere, ac etiam instructionem Caroli IX. ad

ad Paulum IV. pro Regina Navarra, supplicesquè libellos d' Angenes, Perronij, & Oſſati Cardinalium pro Henricis III. & IV. Regibus Galliaë; id ſolum ſufficeret, ut Talonius continuò fateri cogeretur, agnoviſſe Reges, ſe poſſe à Pontifice Romano excommunicari; & poſtquàm excommunicati ſunt, abſolvi poſtulàſſe: ac inſuper, ut hâc poteſtate ſoli Pontifices, non Epiſcopi, uterentur, enixè rogàſſe. Juris etiam Conſulti, Advocatiq; prioris ſæculi, quamvis hæreticorum opinionibus imbuti, quæ tunc Galliam impleverant; quamvis negârint, poſſe primo occupanti Regna exponi, aut interdicto ſubjici (de quo nulla modò concertatio) ſemper

tamen facti sunt , posse Principes
excommunicari , idq; Theodosij,
Leonis , Fridericorum , Regumq;
Galliæ exemplis comprobârunt.
Hoc ergo tam notum certumquè
est, ut inficiari nemo possit, nisi qui
velit Ecclesiam auctoritate suâ pri-
vare, illâ, inquam, auctoritate, quæ
supra Petram, imò supra Christum,
ejusq; Verbum immutabile fun-
data, non locis, non temporibus,
non hominum arbitrio moveri
potest, evertiquè.

Fixum ergo ratumq; sit, posse
Reges , posse Regios Ministros
Censuris percelli, etiam cum Prin-
cipis mandata exequuntur; siqui-
dem ea ipsa executio cum aliquo
delictorum conjuncta sit , quæ
Censuras merentur, ut nuper cum
Lavardino contigit,

Quæ

Quæ Talonius narrat de ijs, quæ Neapoli & in Sicilia contigerunt, indigna sunt refutatione, quippe palàm & indubiè falsa.

Constat enim nonnullos ex Consiliariis statûs, Regiisq; Ministris à Nuntio Apostolico excommunicatione percussos sacris abstinuisse, utque Natalitia festa obire possent, prius veniam postulâsse, atq; etiam obtinuisse, cum clausula tamen de *Reincidentia*, nisi à Nuntio imperatis obtemperarent. In Sicilia quoque cum ob violatam Ecclesiasticam immunitatem, & Vice-Regem, & alios Regis Ministros Panormitanus Archiepiscopus anathemate percussisset, non prius absoluti sunt, quàm Archiepiscopum adirent, publiceq; ac solito ritu veniam poscerent.

Ea quoq; prætereo, quæ de Ignorantia Bullæ, deq; ejus publicatione, nunquàm in Galliis facta, ab aliquibus recitantur, & ipse quoq; Taloni⁹ ea tantùm cursim obiterq; perstrinxit. Nam ut eo Pontificis Diplomate ij saltem, qui Romæ morabantur, obligarentur, sufficit illud Romæ promulgatum esse, Romæq; dependisse. Nolo hîc quærere, Legatus fuerit, aut non fuerit Lavardinus; quamvis enim multis rationibus evincere possim, non fuisse pro Legato habitum, cùm videlicet non sufficiat aliquem pro Legato mitti, nisi etiam à Principe, ad quem mittitur, pro Legato admittatur: & quoties ipsius Pontificis Nuntij, cùm ad Galliæ limites pervenissent, jussi sunt redire, nec unquàm admissi,

non

non aliâ ratione, quàm quòd Regi non placerent? Sed sive Legatus sit, sive non sit Lavardinus, sufficit jam dicere, non ignorâsse illum, imò nec ignorare potuisse, sub pœna excommunicationis ipso facto incurrendæ à Pontifice vetitum, esse, ne quis Jus Franchitiarum, Quarteriorum, & Asyli prætendere, multoq; minùs usurpare auderet. Scivit hoc Lavardinus; usurpavit tamen, nec monitus cessavit; non celari delictum poterat, non ullo privilegio purgari; meruit ergo Censuras, incurritquè; & quòd postea, non petitâ, nec impetratâ veniâ, Parochialem S. Ludovici Ecclesiam intraverit, adieritq; Sacramenta; contemptus & injuria fuit, Pontificis Ecclesiæq; auctoritatem cum fastu calcantis.

Post-

Postquàm Talonius nullo fundamento dixit , à Pontifice non posse Legatos excommunicari, adjungit , multò minùs potuisse ob jus Asyli & Franchitiarum : *Has enim esse jus merè temporale, sicq; excommunicationi non subjacere, tantoquè magis, quòd illud immemoriali prescriptione in Regem transferit.*

Sed primò quærimus ex Talonio, quis Parlamento hanc potestatem tribuerit, inter Pontificem Regemquè causam Romanæ urbis, deque jure Franchitiarum judicandi ? num ergo & Pontifex, & Roma, & utriusquè causæ ad parlamenti, Regisque tribunal pertinent, ut ab isto delegari, ab illo (cui tantùm causæ privatorum submittuntur) decidi, finiriquè debeant?

Deinde

Deinde, ut rem ex suis principiis examinemus, videndum est, quænam tandem sint illa jura, quæ in Romanam urbem sibi vendicant Legati, quæq; eorum rationes; nam si Talonio credimus, potest Rex Galliæ in Romanam urbem supremam sibi auctoritatem asserere; potest Pontificem throno movere. En nova Talonij jura, quæ nec Pithæo, nec aliis (Regiorum in diversos Principatus jurium Collectoribus) in mentem venêre; nam quòd hâc auctoritate in Romanam urbem Rex interim abstineat, gratiæ Talonius & indulgentiæ adscribit, sic tamen, ut quando Regi placuerit, commodumq; fuerit, uti possit hoc jure, Romæq; dominari. Potest Rex, *inquit*, totâ Româ potiri,

nunc

nunc aliquâ tantûm ejus partē contentus est, quam Legatis suis cedit, & Quarterium vocant; nam ædes ipsas, Palatiumquē Farnesium quod attinet, in quo Legati morantur; nec Legatorum, nec Regis est, sed Ducis Parmensis. In hoc ergo Quarterio, seu in hac urbis Regione (præter lucrum, quod ex illis, qui huc confugiunt, Legatorum familiæ accedit) contendit Talonius, posse omnibus proscrip-
tis, sicariis, veneficis, Latronibus, Atheis, sacrilegis, Adulteris, Meretricibus, omnibusq; criminosis stationem & Asylum patere: huc Justitiæ Ministris accessum non esse: neminem hîc capi posse: nec ullum esse tam reum. quem, si huc confugerit, teneatur Legatus petenti Magistratui restituere, imò qui-

quicumquè & cujuscunquè Magistratûs Pontificij imperio hoc sacrarium intraverit vinciendis reis, posse à Legati Ministris percuti, occidiquè. Hoc ergo esse grande illud Gallici Regis privilegium, quod non deleri, non alienari possit, & deniq; cujus gratiâ Parliamentum humillimè Regi supplicat, ne illud violari quovis modo patiatur.

Subit planè animum admiratio, tantos, tantaquè sapientiâ præditos Senatores, quantâ illi gloriantur, qui Parisiense Parliamentum componunt, non erubescere causam tam frivolum, tam novam, tam injustam, & omnibus legibus Divinis humanisque contrariam sub oculis totius Europæ sustinere, suamq; illi auctoritatem

ritatem præstare: & saltem moderari decebat, & aliquâ exceptione coërcere, si enim Rex auctoritatem aliquam, & jus præventionis. Reos puniendi in certo aliquo, exemptoq; urbis territorio sibi assumeret, novum quidem id esset, nullaq; ratione subnixum; ferri tamen utcunq; posset; quippe & delicta in aliquo tandem territorio punirentur, & totâ Româ publicæ quieti provisum esset. Sed nihil horum Regis Legatus. Imò quantacunq; sit hujus prætensi juris, aut privilegij injustitia, non desunt Regi nec in aula, nec in Parlamento, nec in ipso Conscientiæ foro Adulatores, qui, ut illud tueantur, Regiq; persuadeant, Caroli Magni, aliorumq; Galliæ Regum & liberalitatem, dum Ro-

manæ

manæ urbis dominium concessere, & modestiam extollunt, cùm tam modicâ urbis parte, quâ videlicet Quarterium extenditur, contenti sunt.

Sed Talonius nec Caroli Magni, nec aliorum donationes, nec alios titulos moratus, vult quorumcunque criminum reos, ut primùm Legati Quarterium (quo magnus ædium & platearum numerus continetur) attigerint, continuò exemptos fieri, crimen extinguere, accusationes cessare, eodemq; momento, non examinatâ, non iudicatâ, non remissâ causâ omnium scelerum absolvi. Quòd si alij Principum Legati eâdem ratione, quâ Lavardinus, Romam invehantur triumphantium more, Palatia & Quarteria sua militaribus stationibus

nibus impleant, armisq; ut nuper Lavardinus jus Asyli invadant; & deinde Latronum aliquis aut domum expilet Lavardini, aut aliquem occidat ex ejus domesticis, quanti ab illo strepitus, quantique clamores? *Asyla corruptelae esse, quae ferri non possint: provocare omne genus flagitia; obstare naturali, Gentiumq; juri; extirpanda igitur & excindenda esse, nec minori severitate è medio tollenda, quàm in Gallia Regno jura quaedam Dominativa sublata sint, quamvis longissimo & antiquissimo usu jam dudum inolita.*

Quòd si à Talonio quæras, quæ tandem sit ratio, ob quam tantâ contentione, grande hoc privilegium Regi suo asserat? cùm nullam, neque in publicis, neque in privatis documentis reperiat, cogitur

gitur totam fiduciam suam in possessione duorum Galliæ Legatorum collocare, Pisanaq; Conventionem, quamvis nihil tale, imò contrarium hæc dicat. Sed singula videamus.

Quæro igitur ex Talonio, fateatur, an neget supremam Romanæ urbis Jurisdictionem ad Pontificem pertinere? Non credo equidem negaturum, cum facile ex historica narratione convinci possit, ostendiquè, multis antè sæculis Pontifices Romano Principatu potitos esse, quàm Stirps, ex qua moderni Reges prodière, thronum conscenderet. Si ergo suprema & Regia Romanæ urbis potestas semper Pontificum fuit, adeò ut nec Cæsaris, nec alterius Principis dominatum agnoscat,

N

meritò

meritò ostendere Talonius debet,
 quî ergo in ipsa urbe Domina-
 trice , ac Ecclesiastici statûs
 Metropoli Rex Galliæ sibi hanc
 Jurisdictionem vindicare possit?
 Certum enim est , atque apud
 ipsos Galliæ Jurisprudentes re-
 ceptissimum , Juribus supremæ
 Jurisdictionis ne centenariâ , imò
 ne plurium quidem sæculorum
 possessione præscribi posse. Ad-
 ditq; Lebretus Advocatus Gene-
 ralis in suo *de Jure supremiæ* Tra-
 ctatu , omnium jurium , quibus
 Principes potiuntur , præcipuum,
 maximeq; necessarium esse, jus vi-
 tæ & mortis, puniendiq; delicta.
 Si ergo Pontifex supremam in toto
 Ecclesiastico statu , ac præcipuè
 Romana urbe , potestatem exer-
 cet : si hanc ipsam omnes in Pon-
 tifice

tifice Reges agnoscunt, & ideò illius Legato primas concedunt: si hæc potestas præscribi non potest: sequitur ergo, non posse Pontificem hanc potestate privari, nec ullam præscriptionem validam esse.

Quòd si Talonius negat, Regum Galliæ jura præscribi, aut alienari posse; cur non æquè Pontificum jura? nisi fortè Talonius aliâ lance Galliæ jura, aliâ Pontificis expendi velit. At supremæ Jurisdictionis eadem conditio est, in quocunq; sive in Rege, sive in Pontifice reperiatur. Gaudeat Lavarinus, omnesq; Galliæ Legati hoc Jure immunitatis, si modò eandem immunitatem Pontificis Legato Parisiis concedant. Quòd si Parisiis negant, quâ rogo conscientia

hanc Romæ petunt? sunt enim reciproca jura Legatorum, proveniuntq; ex Gentium jure, quod idem ubiq; est, sicq; immunitas à Gal-
lis optata aut omnibus Legatorum, aut nullis debetur. Legat tantum Talonius Grotij libros de jure belli & pacis, videbitq; longè alia esse, quæ de Legatis, eorumq; immunitatibus Jus Gentium disposuit; quàm ipse effinxit, ut posset iniquissima Lavardini postulata quovis modo sustinere.

Cùm ergo Pontifex in urbem Romanam supremâ jurisdictione gaudeat, & à nullo Principum dependente; cumq; hæc ipsa suprema jurisdictio præscribi nunquam possit, & hæc ipsius jurisdictionis præcipua pars sit, jus reos puniendi; manifestè sequitur, ne hoc quidem

dem jus posse præscribi : adeò ut prius Jurisdictio adimi Pontifici debeat, quàm potestas criminosos puniendi, capiendiq; , ubicunque locorum (intra tamen Pontificis ditionem) reperiantur, ac etiam in ijs urbis Regionibus , quæ Quarteria appellantur; nec posse à Principum Legatis Ministros Justitiæ impediri, multoq; minùs puniri, maleq; haberi.

Deinde, ut Talonij rationes propiùs examinemus. Quæro an hoc Asyli & Quarterij privilegium velit Talonius annexum esse, insertumq; officio Legati, sicq; omnibus Legatis deberi, an verò soli Galliæ Legato? in omnium Principum aulis locum habere, an in sola Romana? & quia Pontifex Princeps Ecclesiasticus est,

& nec voluntatem, nec vires habet, quibus torrentem sustineat Gallicæ Potentiæ; quæro inquam, an ideò præ aliis Principibus hæc servitute gravari debeat? Rursus explicari à Talonio velim, quo tandem titulo hanc Legatorum immunitatem fulciri velit? Privilegij? feudi? belli? Conventionis? Concordati? an verò possessionis viginti ferè annis à Legatis usurpatæ? Volui tot titulos consultò numerare, quia in nupera Declamatione nullum Talonius distinctè expresfit.

Si ergo hæc Asyli immunitas officium Legati comitatur, sequitur deberi omnibus Legatis, & in omnium principum aulis, quod nunquam Gallia concedet. Si soli Galliæ Legato debetur, quæro quo
titulo

titulō huic potiùs, quàm aliis Principum Legatis ? nullum enim Talonius producit , non Conventionis, non Concordati, non Donationis , non denique Belli ; nunquam enim Galliæ Rex Romam expugnavit, reddiditque Pontifici hâc conditione , ut Asylum pateretur.

Nec mihi Pisanam Conventionem objicias ; illam enim vix cursum, timidequè Talonius attingit ; quippe indignam judicat , quæ huic causæ suffragari possit. Illa enim non de Jure Asylorum , ac Latronum, proscriptorumque patrocínio agit, sed de Legatorum, & qui illis famulantur, securitate ; deque observantia Legatis debita, quam Corsi milites violaverant. Imò quamvis Galliæ Legatus eâ

occasione usus saltem arcam Farnesio palatio addictam peteret, quæ Asylo donaretur, nunquàm Alexander Pontifex id concedere voluit.

Cogitur ergo Talonius totam deniq; demonstrationis suæ summam ad possessionem trium Legatorum referre, quos dicit hâc immunitate gavisos esse. Sed ex hisce tribus duos Talonio non admitto; Tertius, qui hoc jus palàm usurpavit, est Dux Estreus. Constat gubernante Ecclesiam Clemente Decimo, tam hujus, quàm præsertim odio primi ejus Ministri conspirâsse Principum Legatos, propriaq; auctoritate hoc jus Asyli & Quarteriorum occupâsse. Jam quæro ex Talonio, an credat se mundo persuasurum, violentam
usur-

usurpatamq; possessionem, & totū Pontificum diplomatibus adversam, ac toties damnatam sufficere extinguendis Principum juribus, inducendæq; præscriptioni? & idcò spoliari suâ jurisdictione Pontifices, quia iniquitas temporum, metusq; pejorum coëgit illos aliquamdiu connivere? Et si ita est, cur ergo Ludovicus XIV. Galliarum Rex tot abolita & antiquata jura in integrum restituit, sibiq; asseruit, de quibus nullus Galliarum Regum hætenus cogitaverat?

Nulla ergo præscriptio obtendi potest; sed nequè modus accusari, quo Innocentius hoc malum extinguere aggressus est. Quamvis enim jam in ipso limine sui Pontificatûs agnosceret, nullum Romæ aut graviorem abusum

vigere, aut remedio digniorem; non ideò tamen illi è medio tollendo inconsultè, abruptimq; accinctus est, sed lentè placidequè; jam Rege per Nuntios tentato, jam Legatorum discessu, jam morte expectatâ; nec priùs visi satellites circa palatium Farnesium, quàm extincto Estreo Legato, conditoquè; adeò ut etiam cadaveri reverentia haberetur. Hoc est Galliæ hostem profiteri? hoc, ut causatur Talonius, Regem ex industria irritare? imò hoc ad justitiam, publicamq; quietem pertinet, nec aliud vulgatâ Bullâ, sublataq; flagitiis securitate ac impunitatis spe (quam Quarteria provocabant non minimam urbis partem complexa) sibi Innocentius proposuit. Imò nequidem ad
vul-

vulgandam Bullam processit, nisi prius per Nuntios & repetitis vicibus monito, rogatoquè Rege, dignaretur Legatis, quos Romam destinabat, imperare, ut hâc immunitate & Asylo abstinerent.

En tibi Innocentij Pontificis delicta & culpas, ob quas dignum eum censuit Talonius, quem pro Gallorum hoste, Hæreticorum verò præsertim Jansenistarum & Quietistarum Protectore traduceret. Cui unquam in mentem venisset, eo ipso tempore, quo Galliæ Rex tantum Catholicæ Religionis Zelum ostentat, tantumquè ardorem omnes, quotquot in Galliis hæresin profitentur, ad Ecclesiæ sinum revocandi; reperiri tamen ex Regiis Ministris, qui famosis libellis & calumniis longè indignissi-

gnissimis famam Romani Pontificis, Sedisq; Apostolicæ inquinare audeant?

Evenit ergo aliquid etiam hoc tempore, quod nulla deinceps posteritas credet. Ministros videlicet illius Regis, cujus auctoritate Justitiam totâ Galliâ florentem videmus; velle tamen, imò extorquere à Romano Pontifice, ut asylum, tutamque stationem omnibus flagitiis, in quæ ædibus Legatorum Romæ aperiat: & Pontifice tam injustis conatibus adversante, continuo & Romæ Lavardinum comparere armatum, pugnacemq; & Talonium Parisiis tot faces, quot calumnias, vibrantem in eum Pontificem, quo vix alium ex ijs, qui Ecclesiam gubernârunt, pietate

tate & sapientiâ superiorem invenias: in eum, inquam, Pontificem, cui non alia cura, quàm DEI, Ecclesiæque sibi commissæ; cui nulla cumulandi Thesauros, augendæq; familiæ cupiditas, qui se totum, suasq; curas & vigilias in id solùm impendit, ut nomen Christianum longè lateq; extendat, deleatq; infidelium potentiam. Qui denique virtutibus suis meruit, ut cum eo Rex Christianissimus vires & amicitiam jungat, exemploquè aliorum Galliæ Regum pietatis & gloriæ suæ partes ducat, studia Romani Pontificis promovere, Sedisq; Apostolicæ dignitatem auctoritate suâ fulcire.

Et verò, si Galli reverentiam observassent, & Principi, & Pon-

tifici debitam, sufficere Innocentio poterat sub pœna læsæ Majestatis Asyla & Quarteria prohibere; nunc verò postquam alia rerum facies; quid aliud Pontifex potuit, quàm ut tollendo abusui tam infami, plenoq; periculis totam explicaret Ecclesiæ severitatem? & tamen ne hanc quidem sufficere, imò à Regiis Ministris Calvinistarum more contemni, experientia nimium docuit. Quid ergo sufficiet, quando nec Religio suffecit ijs coërcendis, qui tam impia consilia, tamq; scandalis plena Regi suggessere?

Restat ut alia percurramus à Talonio objecta: *Non potest*, inquit, *Pontifex esse judex in sua causa.*

Ergo, nec Rex, nec Parlamentum; quòd si nihil hoc aut Regem,

gem, aut Parlamentum impedit, ut non possint leges & dicta vulgare, quibus jura cum utilia, tum honoraria sua tueantur; cur impediant Pontificem? Potuit ergo Pontifex tanquam Princeps supremus Romanæ urbis edictum Bullamq; conscribere, quâ publicæ quieti, justitiæq; provideret; cumque & Bulla, & Bullæ executio in sola Pontificis ditione locum haberet; non opus fuit, illam aut in Gallia promulgari, aut Lavardino insinuari; nam neq; Galliæ Rex Leges suas aut Legatis aut exteris, qui in Gallia morantur, promulgari facit, & tamen omnes volentes invitoque constringunt nemine conquerente, Regem non posse in causa propria judicem esse.

Illud

rum, ac præsertim sui Vicarij, injurias plerumque vindicante, Verbo: *Timeat orationem, qui non timuit exhortationem.*

Tandem objicit Talonius: *Non posse ob jura, causasq; mere temporales quemquam excommunicari?*

Respondeo, aliud esse res temporales, aliud crimina, quæ rerum temporalium intuitu committuntur, quid magis temporale, quàm ipsa pecunia? & tamen quis nescit, tam universalibus Ecclesiæ, quam particularibus Galliæ Canonibus fures expilatoresque Templorum sacrilegij damnari, ac etiam excommunicatione puniri? & quid in Gallia frequentius, quàm ut ex præscripto novi Codicis cogantur Ecclesiæ Ministri in causis merè temporalibus prius

prius monitoriis, deinde censuris & excommunicationibus in Contumaces agere? Demus ergo causam Asyli & Quarteriorum esse merè temporalem: at crimen sacrilegij, quo se obstringunt, quicunq; jus illud usurpant, prohiberi, puniriq; excommunicationibus potuit.

Cæterum res ipsa & veritas est, bonorum, juriumq; Ecclesiasticorum usurpationem, unum ex atrocioribus delictis, & sacrilegium, esse, mereriq; excommunicationem. Sic antiqua Galliæ Concilia, quæ solâ Regum auctoritate coacta esse Talonius contendit; sic Caroli Magni, Carolique Calvi Capitularia loquuntur; quibus omnes, quicunque decimas, Jura, feuda, terras, proventus & Jurisdictionem

nem Ecclesiarum invaserint, aut aliàs usurpaverint, anathemate puniuntur.

En tibi Galliæ Regum sententiam, quâ res & Jura Ecclesiæ inter res sacras reponuntur, eorumquè usurpatio pro sacrilegio habetur excommunicatione digno. Quòd si feuda & alia Ecclesiæ Dominia ad Episcopos aut Abbates pertinentia rebus sacris adscribuntur, quantò magis suprema Jurisdictio Ecclesiæ Romanæ Christiquè Vicario debita? quantòque grandius sacrilegium, si ista rapere aggrediaris? non ergo ut sibi falsò Talonius persuadet, quæstio Asyli & Quæstionum ad causas pertinet merè politicas, prophonasquè, sed ad causas maximè sacras. Quocunque enim modo suprema Romanæ urbis

urbis Jurisdictio ad Pontifices devenit, constat multis jam sæculis fuisse ab illis possessam; constat quoque eodem momento, quo ad Ecclesiam pervenit, Deoque consecrata fuit, mutasse naturam, & de profana in sacram evasisse, sicque ex sacrorum Canonum Galliæque Conciliorum sententia, quicumque sibi illam usurpaverint, anathemate dignos esse.

Quamvis ergo & suprema Romæ, totiusque Ecclesiastici statûs Jurisdictio, & ingentes Principatus, quibus gaudent Romani Pontifices, à Carolo Magno, alijsque Galliæ Regibus provenisse concederemus (id tamen multi in Gallia Auctores non admittunt) negari non potest, ab eo statim

momento, quo absolutè, nulloq; reservato jure feudi, aut superioritatis Ecclesiæ, Christiquè Vicario donata sunt, non posse à quocquam violari, adimiquè Romano Pontifici, qui illam tot jam sæculis possedit. Alioquin & sacrilegus erit, quicumquè in res DEO dicatas manus injecerit, & reus anathematis, omniumque pœnarum, quas hujusmodi usurpatoribus infligunt Galliæ Concilia, quasque in ultimo Diplomate Innocentius reperiit; nec enim novi aliquid decrevit, sed antiquos tantum Canones revocavit.

Et planè si injustitiam consideres, & ingentia mala, quæ ex Apylis, & jure Quarteriorum proveniunt, indignum profectò Pontificiâ